

青天雨脚秋聲號眼前傾覆何草草世路不須驚蜀道
洗盡哇淫兩耳清拍手雲中招五老我懷謫仙哥浩氣
涼風萬里來天河杜陵有客更相憶頭白不歸將奈何

題谿山小隱圖

自我初陟浮丘峰十年往還如夢中向來門舊半
只有山色當時同青橙叢邊數間屋夜夜白雲檐下
道人心境雲共閒嘯傲雲林謝塵俗橋頭野客行遊
歸來似有東林期一聲清磬萬山暝知是上方禪定

題方方壺畫

方壺老人年九十醉把金壺傾墨汁染得蓬萊左

空濛樹猶濕危橋過客徐徐行白石下見溪流
家樓館在何處雲中彷彿聞鷄聲古臺蒼蒼烟景暮
芳草春深滿山路招取吹笙兩童我欲凌風從此去
題西嶽圖送熙陽布政還陝西

黃河東流合渭水嗟峨巨嶽中天起玉井花擎縹緲間
雲臺樹落空濛裏秀拔西嶽第一峰仙人掌上金芙蓉
缺鎖盤盤上青壁勢壓秦關天下雄王君聲譽動京闕
千里春風回使節朝天洞口叫希夷馬頭雲氣如飛雪
畫圖彷彿寫高寒紫薇花深清晝間他年報政書上考
重來接武夔龍班

題趙希遠畫蟠松玉兔圖子昂趙公鑑記

天水王孫重毫素愛寫蟠根萬年樹上有徂徠五色雲
下有中山雙白兔清陰散作秋滿林咫尺高堂起烟霧
丹桂吹香野菊黃玉葉金枝亂無數迢迢錦水泛蒼鳥
漠漠青天飛雪鷺人間畫手非不多自是王孫得真趣
浮玉山人列仙侶雅與王孫同出處妙畫題來字字
兵後收藏乃奇遇宣和遺譜世莫傳良岳荒涼風景
眼中人事已非前畫裏山川尚如故老我披圖一檢
落日長嘯弔南渡

蓬萊山人爲鄒德中作

三山樓臺隔烟海清水黃塵渺何在瑤池幾度宴蟠桃
金母蒼然鬢容改蓬萊山人滄海客綠髮童顏布衣窄
養成鷄犬服丹砂曾向瑤池掌仙籍幻遊或在長安市
咫尺毫端移萬里有時舉步青冥中笑引吹笙兩童子
仙裳縹渺去復停風中環珮秋泠泠人同望之如列星
揚言自說山人名翻身下視鼇頭島一入滄溟眼中小
揮手塵寰不可招風露無聲洞天曉

養拙詩爲洪希羽作

人間大巧多覆轍吾樂吾真養吾拙萬事不理總由天
兩鬢從教白垂雪學宮寥落如鄭虔座中賓客寒無氈

濁醪有在時一飲桐琴挂壁誰張絃浮雲富貴寧自保
但使身安貧亦好何須苦學柳儀曹再拜天孫重乞巧

峨眉高一首奉蜀王令古題峨眉山圖

峨眉高高插天百二十里烟雲連盤空鳥道千萬折奇
峰朶朶開青蓮黃金獅座聳岌岌白銀象駕來翩翩晨
鐘暮鼓何喧闐風林水鳥皆談玄牛崖陰霧見玉佛六
時天樂朝金仙月輪掛樹光團團平羌影落秋波寒日
前勝境不可狀畫圖彷彿移岩巒吾王此地受封國大
法付囑從靈山願憶靈山當日語五十四州均化雨化
雨慈雲滿錦城佛刹王宮同按堵峨眉高高萬古

送戒定巖往中竺

天竺諸山天下雄支那勝處惟中峰玲瓏不假五丁鑿
飛來小朶余芙蓉懸厓嵌空不可上千歲神僧舒寶掌
杖頭靈骨去無迴世外高風猶足仰浮漚道人蒲室孫
京都試藝新承恩三衣欲挂稽留石一錫初辭白下門
佛國迢迢松九里五月涼風清似水劫灰掃盡古石前
樓閣重開白雲裏送君此日懷舊遊別情渺渺隨江流
月明何處寄相憶滿林風露天香秋

送瑄蘊中住持處州南明禪刹

南風吹沙江雨晴道人挾錫辭神京金陵故舊走相送

柳枝折盡勞勞亭輕舟挂席二千里山落南明如畫屏
三平老禪獨跨虎谿頭撫掌來相迎老禪尚行世所重
叢林草木皆知名高陽洞口洗鉢處石門日暮聞鐘聲
仙都勝境在咫尺四湖龍去仙山青龍髯隨地化碧草
服食壽與天齊傾道人此地重經營兵餘樓閣猶崢嶸
蘭燈繁月夜皎皎天花吹雨朝冥冥龍河倦客雙鬢星
作詩贈別難爲情明朝悵望隔山岳少微一點雲邊明

送沈公桓還天台

諸梁後人多好文天台瘦沈尤超群平生讀書一萬卷
胸中浩氣凌青雲賦詩不誇章句好得酒高詠散逸

樊頭王粲謾多愁跨下韓生何足道竭來相見金陵陌
雄論差差劔鋒白漫遊未久復東歸疲馬蕭蕭布衣窄
南風五月生微涼鏡湖百里荷花香征帆早晚拂天姥
寄書慟我遙相望

送琬藏主往處州長樂

括蒼之山天下雄控引百粵橫西東高城月出海蓮白
野亭鶯囀山花紅伍喬光芒映南服知有高人居林麓
濛濛碧霧際江天冉冉閒雲蔽幽谷大峰嵯峨仙所都
軒轅上天遺四湖川水秋沉莫耶劍石龍夜吐摩尼珠
長樂山人樂禪寂捧檄東歸苦何劇江湖鷗鷺惜離群

叢社象龍趨法席恩波浩蕩人如天五雲迴首蓬萊邊
明年我亦訪遺逸獨騎白鶴來青山

賦得講經臺送石田禪師之虎丘

講經臺臺何高關中聖者說法處琪閣白日天花飄千
年化迹精靈聚碧草不侵臺下土聽法遊仙去復回詩
魂夜夜啼秋雨青山削壁勢欲墮劔花照水芙蓉開霸
業如烟去無迹象龍還繞香雲堆君登講經臺我折白
門柳吳訶江上來不必陽關酒月明鐘鼓響空山白石
纍纍齊點首

送祿天然往東山

白門柳色青垂烟春風曉送龍江舩四明南
上且卸帆鄞水邊丞相祠堂在何處花發東山
高風尚可扳振錫玲玲入山去金鵝峰前
巨麓夜戴三山出晨鐘吼徹寶谿霜粥魚催上塗
此行何以報君恩天花吹雨來紛紛登臨稽首
關晴空靄靄江東雲

待旦軒為指揮作

東方將軍文且武一片丹心思報主主恩未報不遑
寧起坐轅門待天曙城頭落月照西營明星爛然河漢
橫披衣耿耿不成寐南埭鷄鳴朝已盈丈夫立功垂不

朽者鞭豈在他人後驂騮驟去疾於風金印懸來大如斗擊劍高誦夜氣浮劍光凜凜橫清院長纒繫取單下頸巨杯擎出月支頭將軍才華燦雲錦軍中更置婆留拖太平 天子尚宵衣我獨胡爲自安寢

壯笏軒詩爲王指揮作

將軍晉代參軍孫青年好武仍好文華軒新構題壯笏燕坐看度三山雲三山雲收復雲起朝來爽氣清如水斑簾十二捲晴烟采采芙蓉落窻几侵晨劍履侍王廷歸來夜讀子籤書丹心何以報 明主人人生須作此吾橫槊高誦氣如虎萬里封侯真自許樓頭王繫

才幕下邠生何足數綠楊陰轉春日低群鴉影沒西山西銀箋何處寫新詠深院隔花聞馬嘶

題李府丹桂軒

公家甲第連青雲堂前丹桂吹清芬曾軒高開坐涼夜撲簾香霧來紛紛金風不動露華潔月裏仙人降瑤節奇葩點綴黃金枝靈種移來白銀闕秋林蕭灑秋氣清牙籤萬卷開前楹自是燕山尚清貴肯與桃李爭芳榮花下詩成宮漏盡廣樂聲來九霄近貂蟬世世沐天恩不用淮南賦招隱

貧樂軒爲何給事賦

君不見并州長史王叔朝
登山情獨暢在官不爲
世務移千古清風真足尚
九葉蕪邑長范史雲室
中破甑從生塵蓬門寂寂謝干訶至今青史高其人丈
夫貴賤不易守燁燁聲光垂不朽黃金滿屋珠斗量浮
雲過眼吾何有賢哉給事師仲尼雅與王范同襟期官
居侍從寧自耀處朝不異山林時一室條然淨如洗退
食歸來心似水柴牀高枕樂悠悠明朝又逐鷄聲起

送明照菴往江西北禪寺

大江西來山水雄臨川古郡多靈蹤青蓮梵宇拓岡下
五峰削出金芙蓉石門老人著書處谿外茅堂依綠樹

僧史流傳三百年猶有山靈爲呵護君今領薦向此行
飄然去就浮雲輕獨携金錫度前嶺野花啼鳥爭相迎
涼風蕭蕭吹客袂黃葉紛紛下庭墀當時露地牛
好與諸郎同守歲

白雲樓詩爲滋上人賦

越山東南多白雲結樓正與雲爲隣朝似賓客
暮對白雲如故人有時隨鶴度松頂散作半窓影
有時從龍作雨還倏忽銀濤三萬頃平生亦雲爲徒
看雲每想雲中居沃洲在望不可到幾度欲寄支郎書
樓中之人道機熟野心已被雲羈束臨風獨唱白雲篇

落花飛滿姚江曲

贈杜監令

我聞昔者城南杜居室去天才尺五爭似中朝供奉郎
夙夜忠勤侍 明主憶曾隨駕征四方手持櫛鍤心違
違南臨衢婺北淮海東下毘陵西武昌白旄所指無不
在天下承平養頰改聖上從容問舊時感歎俄驚三十
載朝回館舍即閉門關披貝葉忘朝昏但願清貧得長
壽萬歲千秋蒙 帝恩

送珂月屋還處州予得清風峽

巨靈何年移五嶽石壁開兩崖削峽中六月清風寒

仰視青冥何漠漠碧溪脈脈海眼通白日靈光人
勾連石棧不可梯縹緲烟中見樓閣山人不歸今十年
幾度空林愁夜鶴帝城遊覽豈不嘉還念仙都舊
江淮雨過秋氣涼金錫玲瓏度寥廓山川雖好丑又
架梁暫挂西巖角玻璃瓶內浴香泉早向雙溪問
題仰山圖爲新古銘作

大江西來美林壑大仰奇峰翠如削雲中簫鼓二三
木末烟霞四藤閣昔人從此開法筵百神効力爭
懶逕苔衣雨花積龍湫瀑布銀河懸水絃一斷難
古銘重唱陽春曲赤手移來覩史陀碧瓦朱堯耀陵谷

以圖彷彿如舊遊會當看我巖之幽此君亭上一掃
水蓮花發三千秋

敬題岷峨保障圖

壯哉岷峨雄蜀都屹然保障西南隅四星倒挂玉井終
雙眉削出青芙蓉金牛有路自天關斧斤虛傳五丁力
黑水南流失故墟太白西來橫絕壁連峰飛閣相縈之
六劔小劔參差開敷張不盡左思賦紬繹謾許相和才
聖皇封建列寰宇特選賢王鎮茲土豈誇富國為萬
要使文風比齊魯向來竊據皆苟且公孫王猛何足
山川形勝信有待龍種自與常人殊江南十月天
牙櫓直指巴江道長戈短戟耀官兵廣袖寬衫來父老
忠爲藩兮孝爲屏五雲日夜瞻瑤京願將此意入圖畫
萬歲千秋誦太平

秋夕病中

夕雲歛中天月出萬象正九野聲影消平湖湛寒鏡驚
風着露草栖螢光不定嘗新感時物金氣颯已應扶羸
捲前幔銷肌怯虛靜憂來復就枕蕭條發孤詠

次韻方雲林登蓮峰

峰回青蓮高石泉迸飛縷樵歌出叢靄烏道緣險阻崖
陰歸夕雲林清過涼雨風禽晴百轉松鶴時一舞道人

佳賞排雲上，榛卉谷轉失。前蹊洞豁怯，深府投開慕。
真隱憩靜得，幽所盛景易。徂謝俛仰異，今古禪翁寂不
起。此道日悽楚，徘徊望烟閣。臨風獨凝佇，殘陽沒西嶺。
蘿月快新覩，樹杪聞踈鐘。巖前值仙侶，茲遊吾所羨。無
從躡遐舉，始願諒無違。他年覓支許。

趣上人蘿壁山房

我懷雲林居，復在蘿壁下。幽花落空扉，秋藤覆欄瓦。重
巒紫翠深，中有忘機者。壁觀坐來久，風骨更清洒。聲沉
萬境寂，妄遣百慮舍。何事支道林，區區猶愛馬。

偶地居爲瑾師賦

有生如浮雲，閒踪本無着。出門隨所之，去住安可托。茫
茫三界內，百年同旅泊。瑾師了空相，偶地得餘樂。去歲
辭東州，今晨往南郭。山褐秋風涼，林鐘暮烟薄。何處覓
禪栖，孤筇徧前壑。

虛亭秋月爲實上人作

幽庭坐虛寂，月出青松林。流光入禪戶，涼思滿衣襟。六
根淨無垢，萬境亦消沉。蕩茲着有想，快我遺世心。浩歌
秋水篇，聊續寒山吟。

孫仲善玄默齋詩

知白貴守黑，處寂在忘語。道人得此意，澹然葆冲素。青

山晝掩靄白雲暮來去欲覓全椒居落葉迷行路

題沈文舉窓岫卷

淮州有高士落落無常居辛勤五載間始就城邊廬開
窓俯四野縱目聊自娛青山望中來白雲與之俱迢迢
芳樹林濯濯朝雨餘良時會佳朋尊酒散襟裾豈無榮
寵念窮達各有途萬事貴偶然矯飭非良圖疲盡子孫
力可笑愚公愚

芥舟一首爲謝敬明作

客有列仙儒揚言芥舟子朝發崑崙崙隅暮泊扶桑涖萬
象歸運載滄溟入杯水我欲從之遊可望不可邇浩蕩

青冥中時聞權歌起

題宋祭酒白雲茅屋圖

白雲何英英護我林間屋朝向欄前飛暮歸欄下宿觸
石起膚寸變化一何速散之彌八荒歛之不盈掬依依
蒼松顛冉冉青山麓銀濤忽萬頃浩蕩浸崖谷去來本
無心悠然謝羈束憶昨隨天風萬里追黃鵠裴回九霄
上祥氣靄紛郁天章發晴漢燦爛耀人目 皇猷載黼
黻還念舊松竹聊寫滑臺山庶以慰幽獨踈廣東都門
賀老鑑湖曲二子雲中人吾將繼芳躅朗詒白雲篇清
風振林木

冲漠軒詩奉 潭王令旨作

大化浩無迹邈焉同太虛靈扃一啟鑰萬境遂紛如乾
坤豁兩戶日月跳雙珠飛光不斲駐愆忽朝已晡真人
秉化機燕坐究玄樞冥心太始間身與造化俱撫弄盤
古頂蹴躡康胡雖澹然樂無爲笑傲混沌初

詠適可齋

賢達處寰中何往非我適營營問井間胡乃自勞役陶
公辭五斗笑傲樂無極二疏散黃金都人重歎息所以
高世士去就真自得聊持一壺酒獨醉松下石可人期
不來長誥海天碧

次王右軍韻

涼飈起高林葉露光如雪招邀西齋賓坐玩東池月玉
宇清且寬銀漢淡欲滅笑進寒筵冰寧知畏途熱
待月軒爲式藏主作

月出青松林照我松下戶床前光未滿裴回更延佇蓮
漏下初更綠烟散東塢浩誥步中庭衣露濕如雨
題錢選畫

太峰青蓮高千仞苔壁古招提隔層雲孤逕入深塢鐘
鳴谷口風木落溪上雨何處夜猿啼歸帆下秋浦

寄鍊厓先生二首

時留京摠裁禮樂書

蓬萊宮闕五雲東，龍虎山川錦幃中。盡說黃金延郭隗，誰知白壁起申公。春秋衮鉞諸侯懼，南北車書萬國同。卻望鈞天終咫尺，一琴涼月寫松風。

先生謝客居東里，使者傳宣拜下床。樂府謾推梁子範，禮經須問魯高堂。酒湏銅馬來光祿，賦到龍旗說太常。賜老鑑湖猶有待，山陰茅屋未淒涼。

缺厓先生挽詩

玉笙聲斷泣龍君，撼樹蚍蜉謾作群。一代春秋尊正統，兩朝冠冕在斯文。他生有約尋圓澤，後世何人識子雲。舊業門生今幾在，下車空拜馬陵墳。

客山陰寄湖上諸友

蘭亭燕罷送群賢，獨客歸來閉戶眠。夜壑有聲都是雨，春山無處不啼鶉。放歌強挹浮丘袂，乘興難迴剡曲船。因念少游平昔語，孤燈相對益悽然。

正月十五鐘山書事并簡陶禮部

上念群靈殞劫灰，法筵親向蔣陵開。雲垂五采金仙降，燈擁千官玉輦來。旌旆影寒香旆旒，簫韶聲轉月徘徊。清朝盛典誰能記，白髮詞臣漢史才。

十七日謝恩奉天門

金殿重重護采霞，天門賜坐擁袈裟。尚方晨鉢分雲子

中使春杯獻乳花雉尾風清天咫尺螭頭香煖霧橫斜
聖恩特許還山蚤官柳黃時喜到家

二月三日泊瓜州渡與吳菴同賦

淮烟漠漠夕陽收楚樹昏昏翳客舟風度鐘聲來北固
帆將燈影過揚州雲銷碧海天無際波撼金山地欲浮
獨恨壯遊非昔日滿江風露夜如秋

湘湖謔興一首寄獵微生

藕花風起晚涼多高據柴床聽棹謳芳草不歸支道馬
白沙唯見右軍鵝人家隱隱連桑柘僧梵悠悠出薜蘿
今夜湘中好明月相思無奈故人何

寄樸隱南州二首

聽徹南岡杜宇聲東州故舊獨關情湖鄉草色迷春雨
水院楊花落晚晴百寶不如燕石貴一錢誰買越江清
唯應便覓支郎去馬上看山直到城

柳上歸來百事慵一春愁病似衰翁卧聽溪閣三更雨
數到江花幾信風舊日親朋多楚越孤雲踪跡尚西東
舵樓晚飯人如玉清夢無時落鏡中

舜江楊邦彥家扁二首次劉允若韻

百官東下望群山翠掃巫陽十二鬟藥草春風迷客路
桃花流水異人間龍將白雨山腰起鶴帶晴雲海上還

支許風流吾所羨幾時騎馬渡游浚 右青山流水軒

十里烟沙接野塘五株垂柳覆蘿牆宦情都付河東老

往事休談洛下莊翠影連雲春正晚鷺聲到夢日初長

相邀須待花飛盡倦客愁多易感傷 右午橋柳莊

三月廿八日早渡浙江

塵事縈心不暫安天涯憂抱若為寬人因病久交遊絕
士到名成出處難水國鷄鳴催客渡山城花落送春殘
會當一壑忘情去得共雲松老歲寒

登大雲菴

倦遊未卜一枝安每想登臨試看雲屏山九疊

海日三竿長腰飯顛充齋軟廣舌濕雲屏山九疊

逼人頭易白豈容元亮不休官

寄伯貞戴公

東望湘雲客思多故人歸計近如何江都夜月瓊花夢
海國蠻烟荔子訶落日麒麟猶草野滄江鷗鳥亦風波
碧桃窓下聽春雨誰肯金貂換綠蓑

題雲門翠微深處

溪閣重重翠崦遮無時雲氣濕袈裟千峰樹色藏朝雨
六寺鐘聲送晚鴉筆塚天寒收柿葉茶壇風落掃松花
倦遊每憶消閒地早晚扁舟向若耶

過何氏山林

十年海國厭風波，地老天荒此地過。
白髮幾人江左老，青山無恙越中多。
社尋廬阜沙門遠，詩愛揚州水部何。
要看仙家棋局散，不妨松下爛樵柯。

寄顧雲屋

浮丘山下見劉蕢，每說交遊獨念君。
鼠尾謾誇狂博士，龍頭誰識舊將軍。
孤舟夜雪臨丹壑，破屋秋風補白雲。
最是玉山堂上客，幾時呼酒細論文。

答倪元鎮

清談屢有期，茶烟想見鬢絲垂。
春風水榭停

夜雨何山寫竹枝，甲煎沉香都入夢。
新蒲細柳總堪悲，鷓鴣飛處重相憶。
擬和樊川五字詩。

寄上海令祝良英

堂上琴聲久不聞，江花江草思紛紛。
珠光夜淨浮滄海，蜃氣秋高化白雲。
漢室將軍雙玉節，家天馬五花文。
上書欲叩天王陛，願爲吳民借寇君。

題張伯雨初陽臺倡和卷

笙管聲沉綵鳳飛，朝陽出海散晴暉。
一時文物推延祐，五夜丹光起太微。
歲月無情詩卷在，山川如故昔人非。
祇應湖上梅花月，照見荒臺獨鶴歸。

次韻懷冷泉禪師

八年京國雁書沉每見遊僧問好音已喜法支流日本
賸傳詩價到鷄林馬嘶赤撥晨朝散花落糶稊午定深
今雨不來春又暮鷺峰烟樹綠成陰

送源無竭赴開化

鳴榔秋浦發長謠子去南鄉幾日過眼底雲山吾老矣
夢中風雨夜如何半城兵後居民少石鏡歸僧古剎多
重覓新題何處是功臣堂在碧山阿

四月九日與斯道衍公登虎丘

紺宮高涌碧崔嵬曾是秦皇駐蹕來虎石半銷金氣盡

翠崖中斷劔池開岩僧掃月千峰淨山鬼吟風萬壑哀
老我登臨春已晚落花吹滿講經臺

寄宋無逸先生

草玄閣上揚夫子每說江南宋玉才應問書來船比上
蠻谿花發馬南迴青衫無淚沾歌袖白髮多情照酒杯
處士一星雲霧裏客樓東望幾徘徊

宿重玄寺簡淨上法師

海城一別三年後雨榻重玄四日留林蝶不知花事晚
草蛙爭鬧麥田秋人間白水無行路天畔青山是沃洲
愛爾祖孫同骨肉闔門燈火話綢繆

次韻答戴雪樵

新溪勝友無多在舊雨故人今復來
險步莫經龍伯國虛名已付蟻王臺
小園芳樹迷青草空屋殘花落紫苔
安道詩成情更苦未容輿蓋泛舟迴

贈鑿生沈自牧爲張叙賦

髯張久病苦吟哦瘦沈高情奈爾何
千杵玄霜分玉兔一杯香露薦金鵝
黃花葉老秋風晚丹杏花飛夜雨多
要使疲癯俱壽考昆邱賦裏問維摩

題珉上人所藏嘉禾石

一從杭汭隔風塵四見南朝舊曆新
戰士淮襄悲割土

長河洛望頌春淹留歲月周家統
牢落乾坤夏正實
其說當年郊祀地吳山烟草更愁人

十一月十九日崇福菴對雪

海城三日北風顛南雪今朝見臘前
一色盡封閒草木
雙眸驚失舊山川逐臣愁絕藍關馬
倦客思回剡曲船
冷殺梅花吾不恨疲民多少望豐年

贈海上六如仙

祇陀園裏六如仙不住僧房即市廛
歲月消磨囊底藥
雲山廢盡杖頭錢老來白雪秋盈鬢
訶罷青天月滿船
自說麻姑新有報海波昨日又桑田

題耕隱爲王子安作

讀殘書卷雨聲稀耕破春雲曉色微
瓦缶自傾蒼朮酒金貂不換綠蓑衣
江花未落秧針短隴草初深繭栗肥
翻笑義熙陶縣令田園荒後始知歸

次龍門韻并柬宋憲章鍾仲淵

雪後龍門步早春老禪風骨淨無塵
鷗弦白雪吟山鬼繭紙烏絲寫洛神
天近可招牛渚客月明長送虎溪人
鍾繇宋玉工詞翰來往風流莫厭頻

二月二日早發湖口簡韓侯并似孫廣文

煖風初散隔江烟黃帽催呼早發船
夜雨自添沙草

春潮不動海鷗眠已闌花縣良侯政
雨愛芹宮博士賢生齒漸繁民俗化
倦遊今日是歸年

賦雪堂用千松老人韻寄能仁大徹法師

雪屋高開似玉堂下看世鼎沸如湯
臨臯步屨人堪畫剡曲回舟興亦狂
華散翠微朝講歇詩成白戰午茶香
冰牀翻憶先宗事一滴醍醐莫謾嘗

二月八日過西湖北山

淖水沉街雪半殘出門愈見客途難
浮雲頃刻成陰靄落日千峰起暮寒
師相宅前哀廣益將軍祠下論張韓
都將眼底乘除事付與山翁獨倚闌

龍井觀室成呈山容老人

元祐高僧迹未陳
兵餘喜見草堂新
風迴南磎迎天樂
雲散西窓送日輪
投老幾爲同社客
相逢多是半途人
蓮華漏底光陰好
不用千金別買隣

石蟹泉

神鼇驅水到禪家
清出龍泓味更嘉
晴帶溪雲穿曉籬
暗隨山雨走寒沙
玉臍圓映波心月
瓊液香浮沼面花
擬待春風招社客
焚香來試九溪茶

贈吳山隱夫

神武門前蚤挂冠
吳山山下足盤桓
東風花柳三千巷

樓臺十二闌去國有詩懷
杜曲封侯無

酒披雲卧未羨羊裘把釣竿

宿

鐘動春城客到初
蕭條官舍見兵餘
登山筋力年隨減
涉世心情日漸疎
西上未酬匡阜約
東歸先寄沃洲書
蓮花國外皆塵土
莫認他鄉作故廬

次韻答南州

一卧滄江歲月深
舊盟寥落不堪尋
故人消息雙魚素
子衣裳寸草心
界內有生漚起滅
眼中何物瓠浮沉
幾擬同看月可奈寒雲作暮陰

過張侯舊宅

畫戟門開宿草新一過此地一沾巾歸來燕子驚新主
開到梨花又暮春雨榻無因連海曲星槎何處泊天津
夢中相見猶平昔翻訝傳來信未真

寄湯德師

月旦曾評物外遊衣冠合數晉風流寧知後世非房琯
卻訝前身是惠休黃鳥催人訝伐木青山滿眼賦登樓
多情惟有花溪水不厭年年送客舟

七月十八日重過何氏山林與張守約同賦

南塢新秋穀正花步從真侶入烟霞山林重過將軍宅

天漢初回奉使槎滿地江湖身是客終宵風雨夢還家
十年爲說燈前事却望青雲路轉賒

送馮以清調成都衛知事

越客傳來浙上書故人闕下拜新除荆門馬度霜晴後
峽口猿啼月上初鍊筋灰寒參畫外戈船風動咲談餘
清秋幕府多閑日爲訪文貞舊隱居

送方藏主遊浙東

四明南上水雲寬振錫都忘道路難潮白小江過九堰
天清大海望三韓頻伽聲落秋林晚舍利光騰古塔寒
佛地遍遊歸及蚤慈闈鶴髮久凭闌

次韻答唐羽士

長笑千金養客軀，靜將雙眼閱乘除。盡拋身外無窮事，
遍讀人間未見書。鏡曲西風來款段，槎頭新水上鱖魚。
悲訶幾度懷同谷，雪後黃精擬共鉏。

五月廿四日受誥奉天門

薰風金殿曉生涼，紫誥新頒出尚方。傍日捧來雲欲動，
白天題處墨猶香。千年雨露沾華梵，一代文章邁漢唐。
報答君恩知有地，函經惟祝壽無疆。

瞻匄堂爲嶽藏主作

野水筠江走白沙，堂開瞻匄似毘耶。黃金未采霜前實，

白玉須看雨後花。靈種何年移竺國，天香午夜襲袈裟。
道人色相空來久，一嘿林中坐結跏。

送寧藏主東歸

王謝溪山擅一州，送君重感昔年遊。白雲流水荒城晚，
黃葉空林古寺秋。歸路先經神禹穴，舊題多在偃王洲。
却慚不及秦淮水，去逐東行月夜舟。

送海龍門住持武昌洪山禪寺

天際洪山一髮青，大江南北快揚舲。浮鐘落日來滄海，
廣樂清秋奏洞庭。潭底蒼龍驚洗鉢，樓中黃鶴聽談經。
白頭正是扶宗日，竚聽嘉聲到闕廷。

林叔平還松江次韻以餞

毳袍歸路北風寒白首趨朝懶拜官車上塵來天欲曠
船頭月落夜初闌故園舉目盤龍匯往事傷心喚鶴灘
留得墨莊春意在看花不必到長安

送楊知府之夔州

使君清白舊傳家夔府之官不憚賒蛇勢中流開八陣
猿聲午夜落三巴蒼童不治庭前草紫馬時看陌上花
戀闕丹心知更切定依南斗望京華

送璫瑩中住山東華嚴禪寺

恭承 王命出巖阿歲晏江亭奈別何天下好山聲魚

勝濟南名士古今多帆將落日寒收港馬蹴層冰曉度
河好播玄風參國化春城鐘鼓答弦誦

次韻答葉夷仲

大荒南去渺烟沙萬里曾乘奉使槎得句多留支遁室
藏書未減鄴侯家風清曉殿陳三策日靜秋庭判五花
惆悵西齋涼月夜山柈誰共薦槐芽

題惠師霞城清隱

雙闕嵯峨入畫屏勝遊彷彿記吾曾江流似帶東西遶
霞氣如雲日夜蒸華表未歸滄海鶴竹房還住翠微僧
題詩欲托新秋興却愧任翻兩度登

贈瑞光

吳城泰伯曾封地千載猶懷揖讓風短棹獨行秋浦外
亂山都入暮雲中赤烏舊塔祥光在麋鹿荒臺伯業空
會有白龜重聽法寄書須到大江東

天台吳思哲施田與瑄上人以成親坐

僧中孝行頌台瑄况復延陵助墓田金地方懷給孤氏
義莊猶說范忠宣山回海國青鸞舞日落松丘白兔眠
我有毋瑩千里外爲君含淚寫新篇

正月二日徐瑾見過

卧疾維摩戶倦開喜聞天上故人來梅邊雪到新年

外春從昨夜回聽雨久懸徐孺榻繙經合築謝公臺
花歸去長安道躍馬題詩屬俊才

送康郡馬北征

比望交河紫塞遙將軍鼙鼓撼晴霄兵臨大漠雲初合
馬度陰山雪盡消中貴爭隨李曉騎胡兒驚見霍嫖姚
氐羗谷蠹無多種收取奇勳答 聖朝

次韻答蒲菴

憶共承恩上赤墀暮雲回首隔京師風流合入鐔津傳
水雪爭誇越上詩花落蒲團春寂寂香清蓮漏夜遲遲
懸知此外無餘事一飯跏趺祝 帝禧

贈畫士閻仲斌

浮玉山翁骨已仙
松雲筆意得真傳
石田瑤草春迷路
野水茗花月滿川
無酒不過揚子宅
有書都載米家船
濠梁共說雙臺夢
又是人間二十年

送盧東牧

雨窓無那驛程催
握手論心日幾回
縱筆解圖金粟影
題詩真許玉川才
兩淮烟樹隨人遠
百粵雲山入望來
吳楚一天同月色
可無清夢到莊臺

贈孫子通

淮州西北海溟溟
千里歸舟一葉輕
梅子雨晴經白下

花風起過臨平
豈無詞賦追孫綽
應有丹青到李成
最恨鳳城城外柳
使人長動別離情

寄山東獻長老兼簡方伯修胡隆成

秋林禪月夜纖纖
悵望令人別恨添
千載麒麟悲魯史
四筵龍象讀華嚴
方干可但工詩律
胡廣從知起孝廉
曠種白蓮重結社
東山今日有陶潛

次韻答康郡馬

支許三生是舊遊
遠征不必動新愁
胡奴蹠進蒲萄渌
宛馬騎嘶苜蓿秋
雪外屯兵開鶴陣
月中飛箭落旄頭
要知別後相思處
但看長淮日夜流

次韻答靈隱禪師

沉沉蓮漏滴初乾，忽忽天涯歲又闌。
貝葉讀殘香篆盡，梅花吹斷角聲寒。
舊文每許聞人錄，新句寧容俗眼看。
共喜太平林下客，暮年生計託蒲團。

送瞬上人還越

越城烟樹曉蒼蒼，歲晏征車驛路長。
禹穴書存懷太史，曹娥碑斷吊中郎。
歸鴉半帶江雲黑，佳菊都隨野草黃。
正是叢林搖落際，天台未葉好流芳。

次韻沈文舉忽見梅花

看梅曾感故園情，每到開時別恨生。
樹已從兵後盡，

新枝忽見水邊橫。夢回山閣梨雲白，月滿江城畫角清。
欲寄西湖早春信，楚天霜冷鴈無聲。

欽和 御製賜全室季潭叻禪師詩韻三首

坐卧經行總是禪，身閒不出寺門前。
諸緣放下原無累，一念空來豈有愆。
天上恩波深似海，夢中塵業散如烟。
白頭歸向京城老，荒却槎峰種芋田。

痕翰新頒出尚方，龍光五色夜輝煌。
梵天經到堯封廣，明地人空漢道昌。
飛詔岩前徵懶贊，談玄殿上憶清涼。
慶雲甘露時時見，和氣由來解致祥。

竺乾西望路悠悠，曾記題詩過隴頭。
日近樓臺官寺曉，

月明鐘鼓禁城秋歸子只覺丹心苦老去應無白髮愁
其沐 恩波當盛世消埃欲飲無由

題冶城道士山林隱居

城市山林孰是非 塵居能與世塵違
函關紫氣青牛到 遼海秋風白鶴歸
天鼓扣殘明月墮 洞簫吹徹綵雲飛
誰知寂寞江天外 長使人間望少微

遊天龍寺詩和同菴簡禪師

長江如帶自西來 幽谷重重梵苑開
白水遶隄羅剎石 青山隔岸越王臺
六朝陳迹俱成夢 一指靈光獨未灰
落日憑闌無限意 海門天遠鶴飛回

欽和 御製郊祀詩

禮成郊祀悅 龍顏海不揚波社稷安
五色香雲金闕近 九天風露玉樓寒
星垂華盖春連野 神降靈旂月滿壇
大輅還宮千騎擁 樂聲齊奏萬年歡

送寫照陳中復還四明

四明南下水悠悠 三月龍江送去舟
折柳獨憐今日別 看花重憶少年遊
病身自笑維摩詰 圖象寧煩顧虎頭
應念皇都桑梓地 故鄉不復戀并州

送道士劉松溪回松江葬師

令威仙去白雲鄉 海鶴歸來重感傷
地入五茸青草短

天連三泖碧波長
麥舟尚憶當時義
荷鋪空憐一世狂
有約玄都種桃處
他年花下覓劉郎

題滕王閣圖

江水東流去不回
滕王高閣倚江開
廬山秀色雲中見
彭蠡謠聲月下來
談笑尚懷都督宴
文章誰有子安才
鳴鸞佩玉知何處
霜落楚天鴻雁來

欽和

御製賜左覺義天淵住靈谷山居詩二首

習觀偏於靜處便
豈圖間舍與求田
宣公每受天厨供
政老曾辭國士筵
日用要知皆是道
虛空誰信不離禪
伎拏兀立千峰外
拱固皇基億萬年

歲暮空山落葉多
衡門寂寂少人過
逢僧嬾舉無生話
得意聊吟樂道謠
雲去北山朝更好
鷄鳴南埭夜如何
此生要了三空旨
一念先除五蔭魔

次韻贈空同外史

懶掛風瓢學許由
悠然一室客皇州
日高松頂眠方穩
月落梅邊詠未休
老去不趨朝士列
醉來聊作野人謳
憑誰爲寫維摩影
安得丹青顧虎頭

欽和賜僧季潭卧病律詩

散心修道類蒸沙
病本將除力未加
竺國夢回山更遠
蓮邦望去路非遐
烟霞癖甚終難起
雨露恩深不用嗟

杜口毘耶無一事從教室內雨天華

雪洞

玉戶玲瓏巧製裁冰壺皎潔絕纖埃千秋不解崑崙凍
七日驚看混沌開花散瓊臺春不盡光浮銀海月初來
道人坐久心源淨一水泠泠曉定回

次韻題趙子昂趵突泉詩卷

玉堂文采古今無歷下亭前酒一壺聲譽要同丘岳重
墨痕不逐水泉枯謫仙浩氣橫青海賀老清風滿鑑湖
春日題詩重悵望濟南山遠白雲孤

欽和 御製江東橋成詩

西郭橋成壯玉京盧溝灞上漫垂名碧潭雷吼蛇虺驚
滄海雲收蝮蝮橫河漢九天黃道正華夷一統泰階平
輪蹄滾滾長安客宵旰寧知 聖主情

題紹禪師清碧山房

近峰如黛接平沙葦屋翛然道者家萬頃雪波魚散子
半簾山雨鳥銜花金燈夜照胡僧錫銀漢秋回漢使槎
自古清江幽勝地會分一室課楞伽

題六龍圖

生綃誰寫出淵龍不是僧繚定葉公雨黑雷霆生晝暝
夜涼鱗甲動秋風九重天遠恩波闊五色雲開氣象雄

莫向雙睛加點染恐隨飛電入長空

送原本初之槎山圓通寺

清淮西北渺三洲送別令人感昔遊
種杏山前豈直奉觀魚臺畔弔莊周
丹楓葉盡霜連野白雁聲沉月滿樓
池上小亭吾有記笑談猶想舊風流

登泰山詩奉齊王令旨賦

岱嶽嵯峨起日邊春風飛蓋上層顛
天低青海一杯水山落齊州九點烟
秦世長松神闕外漢家靈栢古壇前
詞臣好紀游觀事樂只堯封億萬年

敬餞蜀殿下之國

萬里分茅鎮蜀邦千官扈從擁旌幢
絲雲晴護黃龍舫紅樹秋連白馬江
文獻表儀寧有幾蘭陵才思果無雙
置心要在蓮花國吟對西山雪滿窓

送蔡指揮之成都扈衛

雄藩新向蜀中開衛將聲光耀上台
閱武好觀諸葛陣題詩真許馬卿才
西山白雪無今古玉壘浮雲自去來
收輯金戈揚聖化錦城花柳待春回

送朱士林陪西平侯往夷陵

疋馬親陪社稷臣白門送別早梅春
詞章豈讓登樓客贊畫真爲入幕賓
江水西來開八陣風烟北去接三秦

列侯談笑平蠻燹不惜詩報遠人

次韻答沈白雲

一自長干送別時幾看明月到岩扉黃金可就仙難學
白雪重訶和轉稀洗劍滄江龍氣濕步虛清夜珮聲微
誰能謝却人間事獨有張良早見機

題高彥敬竹木畫

尚書縱筆寫新圖古木踈篁半有無
屋雨未收泉散漫山雲不斷雪模糊
鳳鳴朝日來阿閣龍去秋天泣
前代風流那復見幾回清夢遶燕都

欽和

御製賜雲水僧

短錫輕包萬里來仰瞻金闕壯懷開
元勳大將蕭曹畧白髮詞臣賈董才
鴈度江天心共遠鷄鳴驛樹定初回
四方朝會多賢士當日燕昭謾築臺

欽和 御製暇遊鷄鳴山賜僧道本詩一首

衲衣幾載習餐松要向喧中立靜功
淨垢本由心所作去來唯是影相從
酥鐙夜照空王殿香霧晴熏大梵宮
樂道無由酌 聖化電光三昧悟身空

送葉無傳住楓橋寒山寺

何處招提隔遠峰姑蘇城外有靈踪
雲埋虎阜千年石

月落楓橋半夜鐘寒雁叫殘沙漠漠昏鴉歸盡樹重重
泊船不見題詩客吳水吳烟自淡濃

遊廬嶽

帆掛東風十幅蒲西行五日指匡廬柳垂湖口知彭澤
山落船頭見小孤白雨亂峰皆瀑布紫烟高處是香爐
茲行安得王摩詰爲掃蓮花社客圖

從海雲過天平與行斯道同賦

覽勝當初夏雲嵐處處幽竹輿輕似馬林屋小如舟日
薄桐陰晚風清麥氣秋忠宣祠下路真共遠公遊

哭亡友端章父

執手言猶在論心願獨違
湟空蕉鹿化桑盡爾蛾飛泉
石清緣斷鷺花昨夢非
砧聲隨處發誰復念征衣

題墨梅

一樹花如玉山房看畫圖
夕雲收庾嶺寒月到西湖
索
咲思何遜行吟憶老逋
孤禪幽夢熟青鳥莫催呼

文上人西麓圖

西嶮幽居好新圖見巨然
庭花妍露夕山果熟霜天
路
隔王官谷人疑阿對泉
何因營此地一榻寄安禪

次方東軒遊查峰韻

深山忘伏臘下界浩沙塵
寂寂岩中叟悠悠世外人
李

源尋舊隱房瑄悟前身想像蓮花國推窓送日輪

寄奉聖長老慶雲峰

北上丹陽道東來萬竹林千年留白土一日變黃金
歷曾經處悠悠遠別心何時坐新構月夜共清吟

寄揚州僧綱尋長老

秋來淮上夢幾度到江都綺閣真虛幻瓊花定有無
海田豐黍稷野水足菰蒲悵望天東月清光求夜孤

題樂善郡馬三士談經圖

暫掠朝簪貴來分水石清三生寧有約一笑已忘情
山色呈真相松聲演妙經誰將麟閣像共結虎溪盟

寄古春

惜別兩經年衰容覺我先遠居紅日下悵望白雲邊
浙水迎朝鼓稽山載月船尺箋書易滿離思更綿綿

送管時敏

相見驚新歲論交感舊遊春風揚子宅明月庾公樓
白雪詞難並青雲志已酬別情何所似不盡楚江流

答桂獨芳

禪居近市闕一室道情閒圃樹年深長溪雲日暮還
清貧高士操衰謝老夫顏會待秋風冷來看菊蕊斑

哀空同子

空同方外士混世取時容諧謔
方朔踈狂念嗣宗香銷天界
磬風斷石城鐘不見橋西客
蒼苔一徑封

次韻王右軍詠雪

凍合歌梅重風回入竹斜誰將
銀漢水散作上林花光照翻匙
飯聲消沸鼎茶衝寒有官騎時
訪野僧家

南池次王右軍韻

何處消長日池南景最閒
卧看西嶺雪夢到沃洲山川
水流無返溪雲去復還
陽春誰解和人在鳳池間

題畫二首

石林霜葉錦爛熳南村北村
秋意聞道士莊前一聲笛

放翁艇子出三山

積雨平原烟樹重翠厓千丈
削芙蓉招提更在秋雲外
只許行人聽曉鐘

黃荃雪鷺

聯拳却立頂絲垂水闊風寒
欲舉遲首鳥不飛魚在藻
黃蘆叢底雪深時

明皇小車圖

宮門日出乳鴉啼宮漏沉沉
樹影低朝罷千宮無一事
車聲又過壽陽西

錢舜舉畫黃花翠竹

擬買陶家地一弓卻看圖書感秋風向來翠竹黃花圃
多在空山暮雨中

墨菊

義熙嘉本久塵埃誰剪幽香染麝煤秋色不如前日好
晚風零落紫霞杯

題朱澤民畫

白沙黃草際窮山何處西風獨客還應是白頭班定遠
蕭蕭羸馬王門關

寄勤無逸

相思何處異雲泥石上猿聲馬上雞今夜煮茶泉畔夢

隨風直到太行西

遊白塔寺次伯溫劉先生韻

春草禪扃路欲迷白頭感慨故宮西鐘聲送盡寒潮水
月落冬青杜宇啼

題倪元鎮墨竹次鄭德名韻

渭水秋聲動萬竿小窓新雨一枝寒坡仙老去風流盡
誰向何山秉燭看

顏生以芥汁代墨寫叢竹色意迥別爲題絕句

度民不可有此色賢士豈堪無此君莫教野水流黃葉
留取長竿掃白雲

題畫菜

故山菘圃久荒涼，坐對新圖味轉長。
青甲半叢和露煮，人間何物太官羊。

題日觀畫葡萄

短衣狂走至元僧，醉唾驪珠十斛冰。
定起山樓寒月上，一窓風影寫秋藤。

題黃鶴樓圖

仙樓縹緲隔蓬萊，黃鶴西飛竟不回。
倚遍闌杆秋水闊，征帆一葉漢陽來。

題老子畫像

五千道德本無言，浪說虛無及自然。
不識函關西度後，人間何代赤明年。

題湯德師畫蘭蕙二首

湘纍舊畹半榛蕪，又見春風入畫圖。
欲展幽芳貽遠客，九疑雲冷隔蒼梧。

百畝湘田野草深，餘香何幸托幽林。
援琴欲鼓宣尼操，翻恐羈懷不自禁。

水仙二首

露瀉金盃玉液新，凌波誰賦襪生塵。
建安才子風流遠，空向山陰寫洛神。

玉圍金鈿價難論浪擬梅磬作弟昆不有洛翁憐寂寞
天寒誰爲賦招魂

錢舜舉秋瓜圖

秋風無夢到東陵坐看龍蹄上露藤誰遣妖蜚吞月壁
憑將白羽扇青蠅

鷺絲

雨聲瀝瀝瀉瀉秋荷雪羽翩翩映綠莎莫倚前灘栢息鷺
江湖一日幾風波

題太白少陵像二首

訶罷秦樓月滿闌天風兩袖錦袍寬花前莫草清平調

飛燕深宮不耐寒

關山雲冷笛聲秋一曲南征感舊遊滿地月明雙鬢雪
斷腸今夜望鄜州

題越王臺

輦土爲臺積恨深營門金氣尚森森當時吳破非兵力
只在西施一捧心

宿參寥泉

湖寺吟行日已西水花烟柳接長隄秋燈照見空梁字
猶是坡仙手自題

宿靜因觀堂次徐廣文韻二首

雲海微茫走百川藤蘿咫尺是諸天
旨公禪榻青林外只許徐陵聽雨眠

壞服枯形祗屢憎衣盂無計托盧能
風流未爽三生約月夜來尋五竺僧

題山農畫紅梅二首

天女花來紺殿春將軍樹老錦衣新
暗香流出溪頭去悞殺漁郎遠問津

姑射仙人厭雪霜染花重換壽陽粧
空令巨室癡兒女寒夜燒燈看海棠

題墨菊二首

陶家舊本徧林丘野草無端亦姓劉
典山河無寸土籬邊分得一枝秋

西風落葉萬山空一夜玄霜染玉叢
寄語湘濱憔悴客秋容不與向時同

題商學士畫蘭

商公握筆倚清酣愛寫光風並半含
無限王孫芳草恨盡隨烟雨入江南

寄淨慈同菴

十月江城風怒號鴛鴦鷺各求曹
秦淮過客重回首只有南天一雁高

寄延慶應中之官寧波

海不揚波社稷安太平
緇侶拜新官袈裟帶得天香去
不怕江城蜃氣寒

題張士衡墨竹

湖州太守風流遠空谷佳人翠袖寒
老子胸中一千畝
醉來隨意吐琅玕

題王冕畫菜花鳥

雙鳥交交語晚晴東園花發近清明
梨園弟子傷春去
一夜新愁白髮生

棘石圖

白石空山秋暮時棠梨子熟露垂垂
林間幽鳥休驚託
鸞鳳無心到棘枝

蒙賜衣履禪衾謝恩二首

赤履頒來雨露新青鞋不復想雲門
人間舉足皆王土
跬步寧忘答聖恩

特賜禪衾荷至尊石牀從此得春溫
願推仁覆如天
德挾纒無衣總被恩

過露筋廟

烏鳶蚊蚋孰踈親血盡何妨肉露筋
多少全身售人者
扁舟過此一酸辛

泗州僧伽寺

峩峩龜阜鎮東南石上靈踪尚可探草木荒涼山殿冷
月明金索響寒潭

三月八日過毘陵

冢紙飛灰雪滿城綠楊水國又清明故山松葉知誰掃
腸斷東風母子情

樂春爲盧東牧弟作

朝春未已暮還春消得人間粟萬鐘却歎淮南無此樂
一家兄弟不相容

楊花

楊花三月滿長堤風裏顛狂更復西風力定時狂亦歇
野田隨處便沾泥

題許由棄瓢圖

風瓢厭聽樹間聲擲向中流弊屣輕喧寂於人本無繫
先生何事未忘情

宋高宗題觀瀑圖

千仞顛崖勢欲傾飛流濺眼雪花明天風捲入秋雲去
都作江南夜雨聲

題畫

半塢晴雲湧翠巒兩崖飛雪洒清湍眼中好景無人領

付與隣翁作畫看

題折枝竹

笛聲湘浦秋雲晚燈影何山夜雨寒正是江南搖落後
清風留得一枝看

題畫猫二首

山翁性僻愛狸奴豈惜盤分頓頓魚圖向幽齋增氣勢
蒼颯不敢夜窺書

踞如獰虎視眈眈更愛脣蟬一點含幽館日長山鼠靜
黃鶯花下睡初酣

題宋高宗跋劉松年畫送別圖

露萼輕勻蝶粉風花亂織蛛絲舊雨故人何處夕陽獨
立多時

崑石重圍舊岳湘簾半捲新晴喚起北窓幽夢綠槐陰
裏蟬聲

池蓮朝垂紫葍山葉夜響枯藤張掾乍歸吳下荀卿猶
在蘭陵

暝港雪迷歸櫂曉齋寒徹重衫恹底欄釵落盡春風昨
夜江南

釋夢觀集

盛明百家詩 釋方澤集

方澤不知何許僧亦不詳何寺院讀其詩益正靖間
嘉禾人也隆慶春姚山人以其詩一冊寄予詮輯如
左是堂山人俞憲識

燕坐荅項如臨用王雅宜韻

物虛城是壑心遠地皆山清梵笙歌外深禪憶蓋聞攬
衣雲共宿持鉢鳥同還愛爾探幽谷乘風每叩關

訓彭冲溪法曹

昔年題柱里今日晝遊歸花外停征憶雲邊問衲衣風
篔簹奏響烟樹翠成帷由來簪組意不與薜蘿違

虛白齋對月

夜久心境寂月高窓戶虛誰分銀漢水來浸白雲居人似冰壺裏堂疑雪舸餘雖然隱几在今我已忘了

游項少嶽南園看牡丹作

日暮天氣嘉言尋仲蔚家誰知蕭散地仍有豔陽花彩眩千重錦香蒸一片霞道人空色相亦復惜年華

送吳九湖還山

去昔不可駐來今紛又過其憐衰謝日獨木亦別離何雲擁吳門樹風搖震澤波唯應明月夜相憶臥烟蘿

項墨林夜過

寂歷香臺夜清森雜樹林正看江月上復值花風弄僊梵和天籟玄言寫道心自多山水趣非假伯牙琴

同友人遊項光祿山園適如臨至

谷窅猶窺豹潭明歷數魚繁花迷杖屨藉衣裾

九月晦日陳靜觀諸彪湖陪張石川伯過山

川翁今鵠舉岳子舊鸞鳴入寺僧同定穿林鳥不驚江山供麗藻羅薜骨閒情幾處尋松子前朝亦城天虛星彩聚月晦露華清頓入空王裏因聽夜磬聲

杪春同諸友赴彭比部南湖之游遂眺烟雨樓得開字

烟雨樓前霽景開
乘風相與步虛來
湖光倒寫雲天入
海氣平浮島嶼迴
盃到欲辭花更舞
春歸不事鷓鴣還
催蘭橈向晚歌聲發
總是清朝白雪才

寄同學怡禪師時住天目山

聚沙相逐憶爲童
鷓鴣舉鷺鴦我未同
俯視高從天目裏
故居忘在五臺中
松龕寂寂春雲祕
金磬泠泠夜壑空
見說閒心無住着
風柯露草盡圓通

秋日晏坐

紫荳紅薇覆院香
翠屏蒼壁暗生涼
陶心淥水魚初躍
流目層霄鳥正翔
避地而來追月里
入秋親覺近羲皇

昨宵與客當明月
木榻茶鐺已坐忘

賦閏七夕牛女

星筵前月沸笙歌
銀漢今仍帝女過
烏鵲橋邊重駐輦
鳳凰機上兩停梭
香浮翠帳恩逾積
羅結蛛絲巧更多
獨有空山雲臥者
僊槎無路欲尋河

寄仲九山中翰

長統才名四十年
置身今在鳳池邊
閒攀桂樹心猶結
欲寄蘭蓀路未緣
北斗光華搖劔佩
南天氣稜間山川
懸知祕省承恩暇
獨自焚香檢道篇
項少嶽過山燕集次冲溪韻

歸鴻嘒嘒暮天虛征騎駸駸客至初小院青梧風葉亂
香臺碧草雨花踈相如卓犖曾題柱揚子摧藏已著書
莫漫奕棋臨谷口令人疑是避秦餘

送少嶽北游

楊柳青青黃鳥鳴川途繚繞向燕京孫弘閣上飄裾入
郭隗臺前緩轡行澤國舊多玄草祕風雲新夢筆花生
他時憶爾千峰下遙夜松蘿對月明

詠百舌

霏霧凝烟雜樹陰幽禽宛轉寫春心聽來不覺簾櫳曉
臥起初疑管吹音逞巧驟翻羣鳥弄含嬌還過百花林

莫教語學如鸚鵡自遣雕籠綉柱深

有所思

美人青雲士遺我明月環置環懷袖中出入恒再看豈
無瑛瓊瑤報子平生歡舟車不我假山川多險艱抱此
耿耿心日暮還采蘭

九日同諸友集半郭山堂因登龍淵寺

霜降秋氣肅天宇曠且高羣公屬間豫泛舟越城濠姚
生丘園秀肆筵促中庖佳辰菊始花清芬被蘭臯觴酌
叙欵言申咏宜鬱陶俯瞰鴛浦流仰睇冥鴻翔冥鴻何
翩翩千里將其曹皎皎瓊樹林顧予間蓬蒿西登玉龍

寺彷彿見玉毫嘉晤良不虛誰謂攀陟勞

對雨憶周山人崑陵

鷓鴣啼過越王臺五月江南雨不開莫是長安偏近日
坐令遊子不歸來

塞下曲

長隨驃騎度交河雨雪天山夜負戈莫謂歸家貧到骨
黃沙白骨不歸多

溪庄即事

寒逼西堂布被重江頭楓葉想應紅天明自起看霜色
不在江頭在鏡中

懷項上林少嶽

今年詩上乞休書消息傳來想又虛一片閒心誰共委
小池開遍白芙蓉

懷吳西洲

楓落吳江鴈影斜燕京遊客未還家可能別有春風在
不怕秋霜兩鬢華

送姚山人玄岳入京

故人多半在燕京病裏逢君話北征自惟秋來無定力
千重離思一時生

鄭山人至

別後翩翩幾處遊
馬蹄強半在皇州
六街笙鼓閑相聒
可似青山一榻幽

贈天台陳茂才二首

笑指天台是爾家
衣裳猶帶赤城霞
連宵醉臥諸侯榻
歸去應迷玉洞花

懸瀑如雷百道長
曇花亭外月蒼蒼
因君憶得雲遊事
宛似前身到石梁

釋方澤集終

盛明百家詩 盧羽士集

羽士盧大雅不知生何時亦不知焚修何宮觀
皇明風雅以爲龍虎山人嘗載其詩數篇因爲廣搜刻成
茲卷隆慶庚午四夏無錫是堂散人俞憲識

題錢塘勝覽圖

南渡衣冠委草萊
危亭高處海門開
雲霞都邑雄中國
月露軒窗逼上台
春夢已隨流水去
寒潮自領夕陽來
小樓題畫因惆悵
豈獨昆明有劫灰

舟中寄張外史

棹郎催踏春溪舫
阻我辭君散木亭
江水未應春去漲

鄉山偏向別時青，烟波釣艇新衝雨。河漢仙槎舊犯星，
輪輿仙都吉居士。一簾山雨聽鶉經。

春曉

弱柳搖烟落絮輕，綠陰初長小池平。杜鵑處處催春急，
不是東風太薄情。

頂山

路轉青楓逕，泉通古石橋。規模靈隱小，景像上方遙。書
壁藤牽袂，尋源草沒鐮。每懷登覽日，東海暮生潮。

子游舊宅

列國雄吞際，人材比學難。淒涼吳邑里，惆悵魯衣冠。

宅址迷穎新祠倚，杏壇一橋通。夾巷蔽井樹，陰寒

追哭張伯雨外史

身似浮雲半在吳，玉鈞橋外是西湖。花前微雨白鵝唼
樓上好風金鴨爐。李泌只宜留北闕，劉郎不得老玄都。
人情翻似東流水，洗出青天一鳥孤。

姑蘇懷古

胥目懸門鳥喙過，至今哀怨入吳歌。山河不爲興亡改，
城郭其如感慨何。廢苑春深芳草滿，荒臺秋盡夕陽多。
醉來一覺扁舟夢也，勝豪華逐逝波。

挽鐵崖先生

玉笙聲斷泣龍君
撼樹蚍蜉謾作羣
一代春秋尊正統
兩朝冠冕在斯文
他年有約尋圓澤
後世何人識子雲
舊業門生今幾在
下車空拜馬陵墳

答王叔潤

天祿然藜嬾校經
鶻丹隨處入鷗汀
西風舉扇無王導
東海移家有管寧
溪雨初晴雲更白
湖霜未落草猶青
客樓寂寞江天外
幾度遙瞻處士星

題張伯雨初陽臺倡和卷

笙管聲沉彩鳳飛
朝陽出海散晴暉
一時文物推延賓
五夜丹光起太微
歲月無情詩卷在
山川如故昔人稀

紙應湖上海花月
照見荒臺獨鶴歸



盛明百家詩 章羽士集

羽士章清源 國朝成弘間人名志宗號逍遙子蚤
焚修于建州松溪之文昌觀壯習五雷法頗通其術
既而篤好文學遂解吟哦年逾八袞卒平生刻有道
遙集二卷言既鄙俚人復迂誕又每援儒入墨以丹
學自欺而欺人本無足取特以羽流所難采刻成卷
用張黃冠之赤幟或可汲引後進云爾或曰此蓋有
託而逃古玩世自嘲之士也觀其自吟還自和佯醉
卧林阿鑪中丹未熟日月慢相催等句槩可見矣果
爾則豈惟羽流之傑出者已乎而或未必其然也時



隆慶辛未首夏八八野翁錫山俞憲氏識

山居

入市事何雜山居日倍長柴門無過客花草自生香
四時晨昏結末詠七首

春

陽德方中半乾坤盡是春氣隨元化轉驀地運天輪
夏

赫日臨鶉首人間大火流三宮升降處真氣貫崑丘

秋

萬物收成處天空草木彫殺中有生意麩麥長新苗

冬

陽極陰司令寒威日慘然三田湏固濟符火運週天

晨

屋漏初生白扶桑景正清虎龍交會處滿鼎走金精

昏

殘照入濛汜陰陽氣兩停下功修二八真氣自熏蒸

結末

悟得循環理乾坤在一身斗杓輕幹處四序總成春

閒中吟

文章本載道非道文不取君看古聖賢不事虛言語

端午

今日端陽節瑤池宴列仙爛蒸雲裏鶴細膾海中鱸鳳
管吹三島龍舟闢九淵忍將蒲泛酒遙酌逐臣前

壽藏

尋得佳山水窮年得所依鑿苔開塚塔種樹作簾幃莫
訝滕公喜休教荏老譏他年仙化去還有鶴來飛

述懷二首

會得神仙意都忘踈與親參同無二道認取本來真靈
府生金液明窓散玉塵百年歸化境天上作真人

路僻烟霞杳林深不置門一窩真洞府千古靜乾坤世

上人遊山山中我猶身藏修無不可長日掛瓢

出入不礙手行藏賴爾扶莫辭行路遠應念老人孤下

水山深處探朋窺在無待看仙詔下携次上清宮

春來何所事脩道學長生藥自山中採丹從是處

宮開壽域北府掛仙名運轉元丹金龜

自適

茅屋居來好悄然人事踈身如泥不動心自空同虎咬
皎松間鶴脩脩水裏魚縱橫皆自得無事亦無事

四景

荷葉驚秋半老菊花已迸新苞自唱無音之曲
拍板輕敲

閒述二首

種竹何曾滿徑栽花都不成叢放下了然無事任他
野芄芄

胸次仁風披拂腰間老劍光芒斬斷三尸六賊九重天
上翱翔

林泉

一炷清香一卷經琳琅振響微雲倚仙人跨鶴凌

然得趣少人知莫將閒累縈心境

子真善談論寂然淵默雷聲者

當年苦節人

遊武夷九曲推歌

武夷之山冠天下九曲溪流徹底清我來特訪神仙迹
直向大王巖上行

咏玉女峰

三曲仙機掛碧岩
前樹草亂毵毵
天孫織罷停機杼
曾與人間作話談

山中秋日

山中秋日冷蕭蕭
一谷寒雲冷似簫
寥黃菊傲霜花半老
綠荷翻雨葉聲涼
因霞迤邐掃林樾
小鏡未還丹歲月遙
試向西皇問消息
一掃不負窮樵

咏公鷄抱子

雛鷄失恃恁驚寒
嗚呼公鷄羽翼寬
暮宿常懷四五子
朝餐輒喚兩三番
孤信自人間少
扶弱無如禽類難

田家難猶尚義庸夫空自美衣冠

應世

營茅屋兩三間
不着丹青也好看
翠竹黃花閑裏翫
山流水靜中彈
幾回大醉非干酒
一任開眠總是丹
萬慮不侵心自樂
數聲啼鳥韻林端

自適

生來命合處林泉
托迹烟霞樂自然
紫府黃庭身內景
祥雲瑞氣性中天
詩吟邵子胸中趣
琴鼓周文指下絃
世味悠悠何足問
任渠滄海變桑田

春夜

日裏無如夜裏清閉門留住滿腔春空虛一室燈光現
長短數篇詩句新萬卉萌芽當子半百蟲出穴在春正
古人亦有宵遊者百歲中多壽五旬

燕窩成以詩賀之

賀爾窩成得所依相呼相喚入柴扉雙飛檻外離仍合
共語梁間去復歸空裏取蟲衝暮雨簷前展翼曬朝暉
一年強半相親近猶勝交人惹是非

鏡中燈

青銅磨出光於月一點金星裏面紅似是似非休着相
不離不倚恰當中有無交入生光彩彼此含容盡貫通

內外混融無間隔却從處處認真踪

秋興

不寒不暑好天時靜裏燒丹姤坎離鼎內青龍交白虎
規中姹女協嬰兒園中菓熟鳥先得砌上花香蝶已知
休道秋光多冷淡偏從淡處見天機

夜坐

窓間獨坐意悠悠一盞寒燈伴寂寥風是故人能自至
月爲佳客不須邀金甌泛酒飄春霧石鼎烹茶響夜潮
一卷蕊珠閑誦罷紛紛鸞鶴下青霄

再禱

非儔樓閣又再晴誠心一至雨收聲陰雲迅掃星辰現
沴氣潛消海宇清禾稼發生呈秀色禽蟲鼓舞動歡情
旋將吉兆回凶兆萬載乾坤屬大明

林泉高興

山中無事日如年物外家風別一天嘉樹飄香來棐几
奇花弄影拂香筵呼童汲水烹新茗與客吟詩改舊聯
操捨縱橫皆自得看雲閑對落花眠

寄葉涇翁

八耄仙翁福壽長步如流水性洋洋養生自得南華術
燕客頻傾北海觴詩卷長留天壤內機關不掛利名場

高由藜杖閑來往碩德深仁冠一方

述意

方外堂堂一丈夫非賢非智亦非愚生無論道經邦術
居有栽花種樹書雲裏謾乘蕭氏鳳雪中休策鄭生驢
孰云蓬島無緣到一片靈臺是坦途

生觀齒

齟齬生時近耄齡枯株那復一番新情懷寥落如慵鶴
蹤跡蕭條似倦鱗咬得菜根方有味煉殘丹藥未成真
玄曹注筭當今日再住人間七十春

閒述

天無一點雲萬里清如洗八面風不搖塵埃無由起我心亦如之光潔難倫比莫教閒累侵便合真仙理

一日仙

一日能閒坐人間一日仙莫教人事擾胸次便茫然住世須忘世敬天便有天但存心上好莫信口頭甜

坐忘

坐忘夫如何心與物俱化是身如閒雲不着絲毫掛目視於無形耳聽於無聲形骸如槁木超然不世情子淵去已久斯文誰與陳

坐馳

坐馳夫如何心與物俱往主人已離舍客氣日侵長門戶生荆棘白日遊魍魎精神斷喪盡靈府無資養經營四海間何日迴輪鞅

無爲

無爲萬事足有爲事事非浮生一頃吏何如露易晞身非金石資危如一綫微三尺土饅頭終湏一夕歸假饒多貨財焉能賄化機假饒善語言焉能免落暉是身如閒雲久矣與世違山中且高卧自在看鴻飛

至人

至人尚高潔不爲名利關開廬卧白雲把酒對南山南

山青翠律流水聲潺湲冷然清我心我心今正閒但得
心中好何妨頭上斑雷神常護我同出復同還

人生

人生天地間乃是天地子語默合天機動靜必循古禮
義爲階梯誠敬爲門戶堂堂六尺軀慎勿自輕侮忠孝
兩箇字宜實在胸臆惡則天加殃善則天加輔吾曹要
爲人烈烈當如此

不言錢

阮籍性嗜酒嵇康不言錢二公生頗異誰賢誰不賢我
無嗣宗才亦無夷甫權懶向陌中走祇愛山中眠釀泉
成美酒作詩成長篇求道心是道修仙身是仙不斷是
命召須待玉詔宜何時出世間騎鶴上青天、

四景四首

春日景氣溫和紅紫滿園多丹田遊姹女神室會黃婆
黃庭內景經三卷莫問東風事若何

夏日景又增長掃石坐焚香驅龍行雨澤散作四天涼
高卧北窓清氣足此身如在無何鄉

秋日景氣淒淒不熱不寒時清風如有約明月不須期
坎離交姤功夫就抱箇蟾兒月下歸

冬日景閉關眠火候運週天一陽初動處父母未生前

窓外梅花花外月偶然相對闔嬋娟

春晝

刺桐花開春晝長粉蝶雙飛過短墻萬彙器誼誰主張
布谷催耕春正忙黃鸝啼散暮天碧白鳥點破春山蒼
三春好景可人意安得長繩繫太陽大哉化工陶萬物
蠢動臭腐皆生光人生有如石邊火隨生隨滅何遑遑
細推物理探元化日向東風笑幾場

四皓奕碁圖

何事山中閒奕碁顏如丹渥鬢如絲不將白眼看浮世
且向山中歌紫芝之歌紫芝之心蕩蕩羸秦殘忍知不知若

無張子房安肯出彤墀羽翼太子難動移雖有繒繡將
安施扶弱安劉今幾時畫中見之恍在斯問之不答亦
不顧妙筭還他一着奇

耕

清曉荷鋤過小橋鷓鴣聲裏雨蕭蕭治生喜有田千畝
何用沽名入市朝莫是谷口鳳莫是南陽龍埋名隱姓
在田野自歌自樂常從容當今風雨自調順四海穰穰
多六種春耕夏耨不違時自家儘勾自家用明年納粟
莫烏紗戴出街頭甚尊重

西江月一闕

深隱烟霞窟裏都無閒累關心垂幃默坐片時辰四大
安和靜定 那用休梁辟穀何須點石成金三處六賊
猶消沉不做神仙不信

行香子二闕

學道希仙安分隨緣竒特漢胸次脩然優游自在笑傲
林泉好飢來餐渴來飲醉來眠 妙用玄玄鍊汞烹鉛
神丹結龍虎盤旋壺中日月鼎內山川須駕蒼虬持紫
詔上青天

竹閣松窓花木交香紫燕兒閒語雕梁人生何事竟日
匆忙但且從容且和氣且安常 蒲腹文章珠玉戒行

誰說着千倉萬箱家無甌石富敵侯王可摘仙桃會仙
客飲仙漿

目盲

安得雙目盲不見諸人物人物事紛拏掣拽無由脫何
如顧自家守箇金蟾窟金蟾窟裏主人翁無去無來閒
突突古來學道人盡是含光者心不掛絲毫如聾又如
啞一朝道果成雲裏馳風馬

自在歌

自在自在真自在自在清閒誰不愛身如雲鶴搏九霄
東來西去自輕快了官錢酬酒債有則用兮無則戒深

山谷裏是安居酒肉筵中是魔寨樂是悲否是泰窮則
通方成則敗世間萬事揜非真自在兩字無人解有人
讀我自在歌天下橫行無罣碍

示邀飲者

一日清閒一日仙本圖將息養殘年鄙夫不解神仙忌
徃徃催人上酒筵

落花

庭前俄見衆花開陣陣飄香入座來何事東風太無藉
紛紛吹落滿蒼苔

五羽士集終

盛明百家詩 錢羽士集

古今詩僧爲多而道流獨少蓋習氣然也予輯明詩
亦坐是歎讐刻將完忽友人以丹丘漫稿見貽乃羽
士錢君作也羽士吳越王鏐二十一世孫法名月齡
別號霍山道人卯角時受度吾錫之洞虛宮平生自
負頗大蚤善醫灸兼通祈雨之術居閒好吟吟亦成
章爲予故友陳近思先達羅建寧諸公所取其師呂
鍊師太寧其徒錢道會國恩至今世玄業于洞虛云
隆慶庚午冬日太湖七十二峰長醉老漁是堂俞憲
書于讀書園之青元閣

無題二首

天澹烏飛飛山青雲杳杳道人默坐時樓閣空中小
昨日又今日朱顏忽蒼顏允歸造化本無令空往還

四皓圖

四皓商山居同人樂于野不爲漢儲出寧知避秦者

澄江登君山

洞庭高聳翠此亦重留名太古蒼茫色長江晝夜聲暮
烟橫北固曉日近東瀛玄武昭靈勝行宮煥紫清

春雨幽居

苔堦春色遍蘿屋雨香純一起龍蛇蟄咸歸天地仁栽

花宜土潤詠物見情新有鳥聲相應無媒道自親

初夏即景三首

衰微吟思健戶牖自南薰散髮惟高枕清歌遶白雲課
分蜂曰蜜香護燕巢芹不暇探幽賞滿庭空綠筠

盆池新過雨添石種菖蒲漫自耽幽計憑誰說異途澹
烟雙燕子綠樹幾鶯雛相對互賓主吟懷信不孤

梅子青林雨茶香紫閣烟晴簷看鬪雀午夢入遊仙野
飯彫胡淨餘生白髮偏經時無一語習靜自成緣

同友人登山寫興

小適登臨意霏微雨濕裳皺紅榴破蠟新粉竹含香潭

月禪心朗松風客夢涼同游二三子歸路澹相忘

銅井訪僧

曲曲桑麻路層層紫翠臺遠尋銅井去先訪竹門開雲
宮採茶入瓦罌沽酒回三生不盡話松日照蒼苔

人日喜雪

瑞占人日雪况復未逢春素染梅邊白光搖海宇新信
傳瑤島鶴詩寄草堂人掃入烹茶鼎吾廬興頗真

浮槎自况

欲尋仙島勝故作此浮槎風外青帆捷烟中白鳥斜滄
洲夜吟月闌苑曉看花華髮天隨子清波到處家

訪僧田舍

北里尋僧舍青山水郭田短筇孤墅入紅樹碧溪連菰
米炊香積茆茨帶夕陽相懽復無語我亦愛逃禪

飛來峰

此峰西竺有何代遠飛來空洞玲瓏竅天香紫翠臺金
鰲湧地出靈鷲倚天開奇勝復奇遇躋攀得幾迴

甘露寺

弭棹東溪步尋詩比固遊大江空有月多景已無樓秋
草埋香積黃蘆覆故洲不堪南入望吳晉兩荒丘
夜雨書屋贈陸明府雲濤

志士歸休所東城箭水潯一生忠孝義萬卷聖賢心剪
韭春風早留賓夜雨深高情每如此隱几復彈琴

寄周龍山羽士

仙隱知何所東湖楊柳陰遠空黃鶴侶長日白雲心月
色水樓淨草香溪路深火流西已近涼意會幽尋

寫懷

寄迹青山外游心大化中不知今日短已悟此身空庭
露栖殘草江雲送斷鴻年來又年去滾滾水流東

對酒口占

把盞臨窓樹驚心葉半黃有愁消臘醕無計避秋霜浮

世蝸粘殼勞生蟻戰場生涯從爛醉拂石卧殘易

朝天宮

太祖開基日與邦建此宮塵清沙漠外春蒲 禁城中
星閣璇霄近仙儀上界同茗泉嘗太乙心境自昭融

奉和泉翁邵尚書點易臺韻二首

繡嶺縈迴抱此臺風雲長爲護崔巍侵衣月白踈松漏
洗硯泉香古澗來尼父象文隨化著羲皇爻畫自心開
六虛行盡天機健數片梅花點翠苔

古今靈異此山川遠海高丘一望前煦煦陽和隨意領
玄玄太極妙心傳松陰三尺焚香石花底千尋滴露泉

何處道人來倚杖海天亭畔和瑤篇

龔守誠社長水北山庄作會

好事常開水北堂柳陰曲曲兩三行時來喚渡投吟社
每共看山坐石床烏角風情歸錦里黃華籬落傲柴桑
詠訶半是投簪客常布相輝錦繡裳

鄉村訪友

亂鴉古木夕陽村野客尋詩遠到門竹逕逗烟茶正熟
地爐聯榻酒重溫寒泉寫意琴三尺午夜論心月半痕
一別忽經三十載喜君生子又生孫

至日

群陰剥盡見天開一脉陽和地底回已見閉關敦古道
又從噓管試飛灰飽食不自知年歎喜節還應畏老來
改歲春風知不遠故將消息問寒梅

吟仙閣初成志喜

碧樹遙連海上峯朗吟仙子舊相逢銀潢倒影天街近
玉屑浮香露氣濃一笛落梅飛逸響五絃流水寄遐踪
鈎簾獨倚西闌暮雲在青山鶴在松

登樓曉望

海日生明紫閣開塵空真界却消灰赤城霞色千峰合
滄島雲光萬里來老眼猶能觀變態飛仙應許挾浮盃

曠然不悟身何處白鳥青天去復迴

謝近思惠紫霞冠

玉人遺我紫霞冠似得明珠掌上看雲匣深藏靈氣暖
星壇高戴步虛寒雅觀近傍三花樹得意初成九轉丹
從此不羞華髮短行歌塵外想飛翰

喜山人送菊

有花便放看花顏一日花前幾往還送酒未知何處客
懷仙欲寄海中山陶翁高節時携杖潘老無詩晝掩關
爲謝山人能好事帶霜分慰道心閒

辛丑新春苦雨漫成寄友

坐看舊雨入新年冷落梅花草屋前空洞無人還有我
素琴有調本無絃未消渴思茶甌澁漫擬新聯石鼎圓
許借東山雙短屐踏歌芳草待晴烟

明陽觀感懷

太息盧仙去不回野花無語有猿哀千年藥臼憐湮土
今日松壇慘護苔誰解荒涼能復業空餘惆悵此停盃
夕陽閣晚無鐘磬歸路淒迷漫草萊

寒夜

幽寂虛齋楮袖爐香茶美酒向誰呼歲將窮處春將復
人到貧時事到無書卷自翻風葉亂燈花細剔雨簾孤

絲絲一種清愁髮掩映寒梅野雀圖

中秋

桂魄風清散夜氛人間秋色正平分
九華煉液金承露五彩浮空錦作雲
脫蚌明珠從海出侑觴仙樂自天聞
廣寒只尺隣虛閣躡景慚無象緯文

夢覺

萬象空懸夜氣澄夢回虛閣獨高憑
塵埃不起華夷靖雨露咸滋品物凝
山月半銜醒睡鶴海風初動欲搏鵬
泠然不附莊生蝶富貴憂虞頃刻曾

中秋無月

對月歌坐來無月意如何淡雲微雨樓中夜
鏡裡魔搗藥暫教閒玉兔乘槎空自想銀河
惆悵一歲風情逐逝波

對寂寥中霜月清華照戶空寒色轉欺衫袖薄
行酒盃同欲參太極追周子未就丹砂愧葛翁
物物有情俱是幻但將幽意寄絲桐

落花和韻

春風庭院瑣窓開那忍紛紛點鏡臺
巫峽清霜愁鬢改昭陽斜日玉顏頰
飛香馥郁徒傷耳濃陰清涼亦快哉

鏡亦士身
一老
枝上纍纍皆證果休憐狼籍遍蒿萊

登君山再和近思韻

大觀天下此江山石磴烟蘿得共攀蒼鶻搏風孤島外
白鼉晒日斷沙間天低縹緲紅雲閣世隔岩堯紫炁關
莫信當年劉阮事留連花下遇仙鬟

秋分日同友人山行

羈愁暫撥作山行秋日平分氣轉清溪影照人風已息
稻香撲袖雨初晴古今在眼青山色歲序驚心白雁聲
更喜同遊俱物表採芝坐石看雲生

六十自壽

忽忽年華六十來無爲化裡此胚胎烟霞古洞新吟闕
星月寒江舊釣臺香雨細看抽草帶東風先爲破舞顛
一瓢分取泉中月聊爲饑年作壽盃

用韻答諸君子見贈

谷口逢人問我家紫芝一畝秀靈華宵堦獨步穿林月
晴閣遙看疊嶺霞酒澁未招枌社客詩新不闕建溪茶
寄言小讌秋成候市有清醕菊有花

重遊致道觀

拂衣重上老君壇廿載流光指一彈星檜倒懸臺上石
月泉香浴井中丹雲龍歸洞靈湫黑露鶴翻巢碧樹寒

金牙子角 一者三
爲覓舊遊今已矣臨風搔首起長歎

壽藏自賦

倏忽年來卦氣周黃芽未熟雲盈頭了心頗定歸藏計
畢世終同造物游日上松梢開繡嶺月明海外是瀛洲
從今不掛塵中念好待空懸黍米浮

聞鶴

林臯夜靜鶴聲遙萬里秋清破沈寥入耳頓醒蕉鹿夢
洗心未數玉人簫靈書渡海來三島羽駕凌風上九霄
赤壁遊吟想坡老山高月小水迢迢

聞雁

城頭霜落夜初分嗷嗷悲鴻枕上聞塞北未全收戰馬
江東漫自起愁雲驚心落葉敲窓雨轉眼流光過隙驢
寒夢易醒人易老吟懷牢落豈堪云

洞壑山宗姪重遊張公洞

洞口四時花木鮮探竒還入洞中天丹留宿火仙家灶
芝秀靈根石上田霹靂何年開此竅躋攀今日付清緣
阿咸亦是高情者蔬笋行庖几杖邊

宿善權寺遺一清長老

善權千古重僧寮理棹重尋豈憚遙雙澗合流歸洞口
群峯拱翠出林梢豐碑未泯吳王迹玉帶還存李相橋

龍象又添新法界紛紛花雨下重霄

新雁

遙天霜白四更初夢轉藜牀斗室虛塞雁一聲驚遠到
邊愁千種想來餘莓苔岸滑飛鳴健菰米波香飲啄如
好待春風回倦翮爲傳南國太平書

人日登山宿林泉房

雨留禪榻兩宵眠話盡三生豈偶緣好事真能安几席
有情久擬借林泉青春誰送淵明酒白社終投惠遠蓮
臘雪未消春雪至不勝和氣兆豐年

訪吳竹沙隱君和王如山

君豈偶緣閒情翠竹白沙前拂衣松徑沾清露
曳杖苔階損綠錢圯上重逢黃石老山中又見紫芝仙
春畦過雨多栽藥甘苦嘗來爲引年

葵近思二君早遊鄧氏園亭

清秋得與勝遊俱城市山林到此無潑潑魚心外
倦踈踈楊柳景中圖四三人空臨流影一兩鳩來帶雨呼
濯罷滄浪塵迹遠浣花溪水遠城隅

牛首山

高林殘暑散秋風牛首登臨法界中杉檜參天隨上下
江山極目自西東獻花白鳥來何際掛樹青猿叫暮空

老眼欲探堯率境梯雲千尺月朦朧

癸丑春日重過林泉院和魯泉韻

點易臺前此室廬海桐新翠舊僧居高眠每借禪翁榻
渴飲重尋石子渠露蘂溥香春閣暗月林散影夜臺虛
依稀洛下風流在真率相携任所如

賀庚友徐仁齋壽器

孺子當年未白頭家聲籍籍重南州早將歸計生前了
儘把閒情世外遊碧漢秋風吹老桂滄波夜月載虛舟
請君看取冥靈葉萬古青青發瀉流

華藏重遊

秋水微茫秋日清重尋烟寺蕩舟輕偈留法界雲端月
菓摘香臺樹杪橙露氣千巖浮沆瀣潭光一鏡湛空明
獨山門外湖波杳無限青山白鳥情

重九節登西山東山二首

遲遲胥口上湖船林屋來尋古洞天仙馭未逢嗟世幻
橘林初熟是吳田登高舊與籬花約覽勝新收震澤編
靈異嶮巖觀莫遍蒼茫獨立五湖烟

振袂東山最上峰道心物意兩冲容五湖天外陶朱宅
九日花前靖節筇紺帶楓林凝夕霽甘流橙橘剖霜封
與闌歸棹鷗波濶渡口夕陽帆影重

秋懷十七首

浪遊玄圃自年年未信霜華到鬢邊
天造流行何足計世途高下漫隨緣
風牽庭葉蛛絲亂露洗盆花鶴頂妍
感興有詩還感物一迴開落一凄然

碧天風露灑梧桐雲錦浮華月正中
仙侶夢隨三島遠野人興寄一杯濃
丁丁玉斧侵圓魄隱隱鸞笙度半空
願得年年當此夕清光長照醉顏紅

土屋葺脩意氣和不知門外有風波
雲開洞口花應好雨過臺前草更多
知己未酬青玉案閒吟復和紫芝歌
鑄成慧劍知何日要斷詩魔與酒魔

獨上高臺思若何鈞天雲外送咸和
龍飛泗水黃河淨牛渡關門紫炁多
栢子篆烟葺石室桂香浮月繞巖竊
丹台景絕知誰會一聽清商一浩歌

露砌幽花抽玉簪娟娟淨碧
何有侵虛室破壁惟應掛素琴
鹿飲頻來定斷繞巖深

莫將此意聞朝市恐解塵纓到
雲松娟娟澗淙淙此是巢由飲犢場
和塵外景醉撈明月水中光
洞庭新橋憑誰寄閨怨
自是足我嘗不向此中培命蒂
浮生白日幾何長

樹底鳩聲呼晚晴樹頭斜日照窓明
雲霞收護希夷枕

風月閒隨子晉笙豈有事來驚寵辱絕無客到謝將迎
鬪鷄走馬非吾意白石清泉過此生

雙眼摩挲對一燈更憐白髮又新增試消冰夜杯浮蟻
忽擾清懷扇撲蠅水殿涼風能自起石闌明月共誰憑
晨興好與雲門子樹裡看山拄瘦藤

愛看秋水出城西徐步梁鴻十里溪濠上儵魚浮更沒
磯邊鷗鳥亂還齊泮泮注海天連碧混混歸源路不迷
小杓分携續清興松簷煮月稱幽棲

心游玄古若昏愚斂食鶉衣分自如天下生民堯舜世
案頭卷帙老莊書琴臺雅調懸孤月劍閣寒光動碧虛
老鶴行來枯葉響始知秋色到吾廬

物物皆由造化生如何忽忽見枯榮杏園凋落多無主
菊徑荒蕪尚有名古院簾垂秋日靜小樓笛送晚風清
白堯筆硯荒踈甚未聞佔一半情

江漢東流不復還霜風亦自促頹顏兩丸競走何時歇
百歲都看幾日閒鳴鴻秋高天外翼鸞輪雲隔海中山
興來欲拊洪崖背同倚瓊樓十二闌

高臺風露逼衣單催起雙砧搗月寒好事覺來隨夢散
此心休處足餐食稍知浮態輕人易應道同心會面難
窮取碧巖流水意牀頭綠綺不須彈

西鄰僧舍白雲重
夢枕驚回破曉鐘
身寄百年猶過客
老添一日漸消容
江雲併起沙頭雁
露砌吟餘草葉蟲
好事山人愁不寐
起來和露看青松
利濟功於世外事
尋常文字石每留心
但新指下經書卷
何在囊中積有金
貧來惟露巖野情
隨處是家園
人知亦苦天知好
聊把行藏付短吟
心切年來早滂期
青囊遙授武當師
風濤二度萬餘里
旅食一食十二時
拂劍試開雲鶴路
呼雷曾起雨龍池
更思及物功無著
恰對西風鬢亂垂
不解追歡不解愁
藥爐薰鼎事清脩
旋收橡栗充饑腹

輕剪芙蓉作翠裘
碧漢枯槎凌博望
涼空仙袂挹浮丘
元宮不聚三華秀
總是侯王也白頭

和秋懷前韻十首

悠然獨把菊花枝
紅入衰顏借酒滋
好景易過嗟短日
浮生不飲待何時
野蕉題句頻教採
活火烹茶不用吹
山犬一聲驚靜定
呼狗杯下問來誰

竹搖簾外珮聲和
片瓦池心水不波
跡散動隨雲去遠
簷低不碍鳥來多
心存寥廓虛中景
語入空同象外歌
靜篤自知還自守
肯教一刻染塵魔

澄澄碧漢掛銀河
爽逼靈襟思若何
列子風前虛步遠

謫仙月下醉吟多百年老去空雙眼萬象藏來此一窩
如此好懷如此景人生何事不高歌

清溪環繞碧空虛露滴松梢曉氣初一勝微陽
六爻隆德在謙餘巖居中曷隨持製山室登
客至遲留還竟日不妨明月到階除

蚤慕喬松海上仙何能携手駕蒼烟未參衆妙冲虛裡
且守無爲太古前小有亭臺聊憇息不多泉石亦清緣
誰言方外無生業和露深耕種玉田

可人語笑接來稀朝日無言到夕暉靜定頗知玄默理
炎涼休訝世情非藤蘿月白牽幽思竹樹秋寒澹翠霏

欲醉清醑榜鶴去野雲隨意守巖扉

最無根蒂是浮生景色隨草木榮季子金多難鑄入
伯倫酒少豈爲名風高許杪聲初戰月定波心眼獨清
默向此中觀物理有求情外是無情

此心待物每應虛瓢飲能忘陋巷居雨洗莓苔秋色淨
風侵薜荔夜寒初緼袍零落鞵仍破短髮蕭蕭搔齒復踈
世後倘收貧士傳瓶無鼠粟甌甕餘

曳步空臺弔影單凄凄風露不勝寒栽雲浪說能爲服
煮石誰云可作餐象外寄形聊自適竿頭進步信知難
不應自棄吾家物倏忽流光指一彈

凌閣鵲噪惡聞鴉似喜聞花怨落花事有相違每如此
吾何不樂更咨嗟古壇禮罷香猶在石鼎聯成日未斜
開道 聖君遙返駕旌旗草野耀龍蛇

巖居即事

未得食雲吸紫霞飢來一任採山花懵騰不識人間事
流水聲中寄歲華

秋日客至小集

涼送庭梧數葉秋殘蟬吟斷暮烟收一尊少盡看山興
長笛聲中客滿樓

夢社飲得首句覺而續成柬雪谷舊社長

傍水清風灑竹涼盍簪夢裡舉吟觴覺來省着諸公在
只有鬢仙鶴髮長

石塘菴夜宿

石塘春水浸漁磯燃暮尋僧未掩扉野話清燈照無睡
一枕涼風送月微

悟涼雨石窓虛汎汎蒲觴興自如樂在此心憂在彼
鏡捨未息海東隅

湧金亭紀勝

青巾一幅勝烏紗徑裡香泥踐落花盤礴午涼亭樹畔

金剛集 卷三
尾覺分汲煮春芽

對酒二首

人生行樂對酒歌對酒不樂空愁何謫仙不惜金貂換
長安市上風光多君今不飲空白首世事紛紛春夢夢
客來貧居與不孤街頭買酒雙提壺昨朝酒醒今復醉
何用屑屑悲窮途寄言賢達當樂飲積與子孫今在夫

花前

有酒當醉花前人莫教啼鳥傷殘春流光轉盼赴壑水
好花回首飛紅塵請看自古繁華地年年惟見蓬蒿新
奉和荆溪吳學士題先師林石圖韻

雲海峯頭訪真跡仙顏彷彿丹靈
松下十年空白石怕烟青梧雨碧成
時夕虛留鐵筆暗霜砌忍見松苓長餘及劍佩秋
水空醉下岳陽隨所適精神恍惚與天遊微妙希玄
太易

巴亥秋庭信

嗟哉閨七月
還使火龍
顛風兩目動地來
掀拔庭梧倒寒碧
九色散落鳳巢傾
哮吼中聞

鳳兮鳳兮喙且休月明那復葉枝頭待我明朝
健自起荷春錦重紅深園常使風

春暮獨遊歌

若水洞口雲漫漫飛瓊漱玉侵骨寒
蒼松偃蹇虬龍蟠圍來拂袖舒長
午烟起處一聲鐘貝闕崔巍金照
茶香玉乳花濛濛冷然不覺在人
山下遊人不知數綺羅明媚香風變
幾解來尋苔石卧而我離披成獨遊
烟嵐翠染芙蓉去
太和一吸足真味便欲遐舉隨浮丘
清山相對誰公主

山亦無言我無語隔巖啼罷數聲鳩
四月八日素翁拉遊華成阻風還遊
惠泉顧山人虛舟同席

麥秋飛爽梁溪曲兩岸新陰肥雨綠
放歌還水遠
相逐鷓鴣與鳧鶩潘岳高年才白頭
文簡風流書錦明香英結社紛
虛舟天地遨遊獨我得奇逢笑
流觀欲上望湖亭共和滄浪濯雙

風急船頭浪花簇舟子徘徊進未
急呼挨柁順東流好覓青溪與翠
麓村

處處農桑催布穀峯聳天外白雲飛
香文
觀物還登點易亭逃禪更擬精藍宿
其
到處相隨看脩竹古松巖底蟠蒼虬
小洞花開
醉翁之意不在酒山水投閒屏凡俗
文
往往唱酬憇與效
嗟乎此樂何必遠尋華
平林院石那有風流駭心目

錢羽士集終

盛明百家詩 楊狀元妻詩集

正德辛未榜首升菴楊公慎予嘗刻其詩比亦知其配王氏能詩然僅得于傳聞無集本也邇來廣爲搜拾因得崑山張文學鈔稿所載并入後編名曰楊狀元妻詩集升菴公坐讒枉謫戍終于嘉靖間故其配止得以氏稱云王氏亦成都人去戍所金齒不遠隆慶己巳首夏錫山是堂野史俞憲識時在諼節堂松下

寄夫

鴈飛曾不到衡陽錦字何由寄永昌三春花柳妾薄命

六詔風烟君斷腸日歸日歸愁日暮其雨其雨怨朝陽
相聞空有刀環約何日金鷄下夜郎

庭榴

移來西域種多奇檻外緋花掩映時不爲秋深能結實
肯干夏半爛生姿翻嫌桃李開何早獨乘靈根放故遲
朶朶如霞明照眼晚涼相對更相宜

春日即事

金針戳破窓兒紙引入梅花一線香
螻蟻也知春色好倒拖花瓣上東墻

寄升菴夫子調黃鶯兒

積雨釀春寒見繁花樹樹殘泥塗滿眼登臨倦江流幾
灣雲山幾盤天涯極目空腸斷寄書難無情征鴈飛不
到滇南

盛明百家詩 馬氏芷居集

世傳金陵馬孺人詩十四篇名芷居稿石亭陳翰林
繼室之作也石亭失其元配楊知孺人賢而有文遂
娶焉聞今年近八旬尚健在不廢吟咏書法蘇長公
亦得其筆意頗與石亭公相類石亭予通家嘗刻其
詩一卷列于前編題曰陳行卿集蓋石亭丁丑進士
官止山西行太僕卿也芷居乃孺人所扁室名隆慶
巳巳秋七月朔錫山是堂俞憲識

暮秋

秋色滿園中間情立晚風菊花含雨艷楓葉醉霜紅

斷機圖

賢哉軻氏母能惜寸絲工萬世真儒學成於機杼中

有感

春風零落後秋圃恨開遲總是宜男草傍人也未知

白蓮花

水蓮初放白芳氣漸生涼涓涓自標格何必更添粧

石榴

火令吐丹花風晨簇絳紗子成秋未老珠向掌中誇

苦雨

雨翻盆愁人欲折危雲上屋角野水沒籬根楊

深藏徑梨花靜掩門聲聲偏入耳寂寞自

暮春

紗窗睡起藹朝暉滿院鶯聲花正飛聞裏不知因其事
春來容易送春歸

七夕

靈鵲成橋事有無人間今夜憶星姑倚窗坐久愁聲動
一葉西風到碧梧

綉鏡囊

錦段親將月梭裁五紋刺出白花開願囊寶鏡能神聖
長照朱顏不下臺

題六姑娘素便面

剡藤素滑勝輕羅，月樣裁成一半多。
若使佳人笑遮面，分明影裏見嫦娥。

題方夫人墨竹便面

一枝翠影舞孤鸞，瀟洒清風澗谷寒。
想是仙娥明月夜，數聲吹下珮珊珊。

謝羅七嫂香囊

簇錦纏花巧製囊，芷居風暖細生香。
一針一線知心事，佩服終身肯暫忘。

謝蔣大姐寄鞋

金蓮小瓣墜瑤池，想像深閨結繡時。
無限巧心勞造化，費多不忍下堦墀。

庭中牡丹盛開詩以賞之

翠霧紅雲護短牆，豪華端稱作花王。
洛陽宮殿春深後，吳國臺前西子粧。
芳露淡勻腮粉膩，暖風輕度口脂香。
開時亦自知珍重，靜鎖春風白晝長。

馬氏芷居集終

盛明百家詩 孫夫人詩集

予輯明詩後編無女婦之什姚山人曰嘗見棟川長
秦次山有孫夫人詩遂手錄見遺按次山小序夫人
楊氏仁和人故裕州守應獬仲女幼聰慧日習古文
詞及笄歸姚江大宗伯孫文恪公爲繼室內範克端
母儀婦道俱稱天官正郎鑰宮諭翰讀鋌進士鏘皆
夫人子也嘉靖甲午余識裕州于都下厥翁忠烈公
先端敏癸丑同年也故知兩姓爲詳夫人始末茲序
備矣予雖不識楊公與季泉公素相善蓋嘗從季泉
公得見夫人詩云季泉名陞字志高以錦衣籍中乙

未進士第二卒謚文恪忠烈公名燧嘗爲都御史巡撫江西死于宸濠之難端敏公則次山之先子吾錫之鉅工也名金號鳳山憲有通家之誼夫文非女德哲非婦宜今觀夫人詩皆合倫則又忠貞文獻之家風也宜刻以傳隆慶己巳長夏錫山是堂俞憲識

秋日懷親

玉露沾花濕金風透幕涼天連秋水碧山帶晚烟蒼撫景嗟時序懷親憶故鄉倚闌凝立久心逐雁南翔

月夜鳴琴

小堂明月夜捲幔理絲桐素魄千門皎清音一院通落

霞飛指下流水瀉絃中停曲聊延佇高天度遠鴻

秋日新晴

浙浙涼颼至昨宵新雨過雲開明玉宇日出漾金河樹裏鳴蟬亂空中去鴈多乾坤舒望眼秋色足吟哦

至日

至日潛春意天機故透梅漸看殘臘去行待艷陽來刺繡添宮線吹葭散琯灰光陰何荏苒又是一年催
余兄寓京師偶赴河間詩以憶之

親闈天際迥悵望信音稀賴有同群雁那堪異地飛蕭條棲旅館咫尺隔皇畿去去將旬月如何尚未歸

孫夫人詩集 卷全
詠梅

昨夜春初動江梅綻早芳翠枝懸玉蕊素艷晃寒光帶
月籠踈影隨風遞暗香最堪調鼎鼎留取薦明堂
早春懷鋌兒

玉律風初轉金堤柳漸舒感時懷仲子望日倚門閭骨
肉天涯隔雲山望裏踈歸鴻聲嚙嚙不見寄來書

余辛丑之京今歸吳城得省母氏追念先府君遐逝
詩併及之

昔在燕臺下瞻雲隔海涯今歸吳市裏傍水是吾家慈
母身猶健嚴君迹已遐宵堂集悲喜月色澹窓紗

寄鐘兒

燕山聽鹿鳴早歲已成名隱霧今棲豹搏風即應鳴言
懷遠遊子無那倚閭情欲寄平安字炎天雁不征

寄鋌兒

念汝留京國春花兩度紅讀書丹禁裏試筆玉堂中才
美名應振官貧道不窮百年須自勵清白舊家風

示鈞兒

又是清和候梅黃細雨天流光人競惜向學汝須專美
贊元難恃虛名亦枉然能酬題柱志始見馬卿賢

示鑛兒

汝年亦漸長學業可無成莫效頑愚子須齊賢俊名青
萍方在匣綠綺未聞聲何待三遷教傳經有父兄

採蓮女

若耶採蓮女日出蕩輕橈玉手攀蘭槩金釵壓翠翹羅
裙欺葉色粉面比花嬌慣識谿中路歌聲入畫橋

聞笛

何方吹玉笛夜靜感人深月向山頭隱龍從水底吟暗
飛落梅曲巧作斷腸音羈旅那堪聽思歸不可禁

越館懷歸

心來三月風光條已殊昔看堤匝柳今報井飄梧旅

鄉曲烽煙淨海隅呼兒買蘭棹新漲愜歸途

中秋雨

逢三五承歡侍太君今宵增感慨罷賞閑斜照擊
窓入長松撼木聞吾心愁見月天遣翳玄雲

關山月

漢京今夜月萬里照關山秋葉仍看落江人尚不還寒
光凝厚甲孤影對愁顏懽宴高樓者

夕晴

天氣爽四月宛清秋遠漢青
聲恰恰浴鷺晚悠悠更有堪題

嘗新茶

越茗憐新摘烹來滿盃

滋味偏真雀

舌應堪擬龍團未足珍

江南第一

歲貢

雪霽

竟夕天飄雪同雲翳遠空曉來看霽色光彩映簾櫳素渚迷寒雁瑤圖入畫工東山明月上疑在玉壺中

隴頭水

隴山高不極隴水日悠悠百里依官道千秋動客愁霜風飄落葉戰士理征裘鄉思方蕭索那堪耳畔流

代南別女

又迢向南國五月發長安惟念鳴環女初令事伯折言難盡車停日又闌行行復回首淚下不能彈

臚日憶女

臘日起嚴風冰花西復東因之懷道韞遙傍上陽宮吳國三千里燕關百二重何時仍聚首詠雪向長空

登樓

飛樓縹緲接穹蒼直上憑闌望大荒遠障雲開千疊翠近宮日耀九重黃楚姬佩玉供歌舞秦女吹簫引鳳凰古意今形書未了又看明月出東方

聞雁

帶月穿雲晚亦過數聲嘹唳近銀河川源萬里來何遠
關塞千重度更多曾寄尺書歸上苑還拖秋影落寒波
天涯旅客愁聞汝喚起鄉心柰若何

除夜

青陽初轉歲將闌燈火熏天夜不寒已識年華明日改
且酬節序此宵懽盡堂列席鋪金玉寶鼎飛香蕪麝蘭
贏得春前一回賞梅花滿眼笑相看

黃金臺

燕主偏安易水隈千金不惜選良才四方豪傑今何在
極與圖尚自開北塞黃雲連海濱天紫氣繞蓬萊

聖人臨御恢疆宇誰向瑤京說舊臺

見湖亭

草堂卜築倚山隈捲幔湖光入望來十里碧波穿地入
四圍翠巘插天開中流橋迴虹霓落傍岸花繁錦繡堆
對此如遊仙界裏世人何必覓蓬萊

憶姊和韻

昨夜寒梅已着花新枝折取寄天涯鸞翔霄漢還千里
人隔燕吳本一家無那看雲憑盡檻懸知望月倚牕紗
錦牋况復傳佳句詠雪高才未足誇

寄兄

憶兒同客京華日不覺蹉跎屢閱年此去音書憑雁寄
向來詩句待誰傳春風湖上堪移棹夜月窓前合撫絃
兩地幾時重會面迢遙燕越意空懸

避寇越城感述

雲白山青宿霧收越王臺下水悠悠停針倚檻渾無語
避寇移家可自由延望燕關常系念回瞻慈隴漫生愁
為憐骨肉棲三地幾度臨風欲淚流

越城懷古

海國淒涼千載恨滔滔都付水流東千年霸越人何在
一戰吞吳事已空弱柳新隨黃鳥

只今惟有稽山月曾吐金輝照故宮

擬內閣觀芍藥

禁署名花本自奇上公相對更相宜風香暗度黃金闕
國色新分白玉墀傍檻開時如索笑當堦翻處欲催詩
栽培地位元殊絕贏得年年雨露滋

冬日釣兒應試北上用韻一首貽之

束書殘臘發南州直北風煙萬里浮為汝衝寒馳遠道
令人連夜絮征裘驛途逢使音須寄酒幔臨河棹莫畱
回首飛雲應習念且依棠樹近 宸旒

憶京華鑪鉞鈞三子次韻

旅居抱病自躊躇荏苒流光逼歲除天畔雙魚無處覓
日邊三鳳竟何如文園司馬應裁賦漢闕孫弘待上書
南土只今多寇盜倚門焉得鬱懷舒

白門哭夫

石烈山頽人共嘆春曹行館跡無聞殘書架上猶存帙
比翼空中已失群鍾身月明孤鶴唳秦淮風急亂蛩聞
相如寶劍埋黃土獨隸支君哭暮雲

秋日檢笥感述

日月如馳去不留金瓶又動井梧秋班姬愁劇題紈扇
共女憂深賦柏舟遺墨尚存人已逝開編感愴淚難收

子雲博得才名在惜早寒煙鎖暮丘

聞蛸

蛸鳴亦太早宛宛出青林初訝城鳴角還疑室撫琴風
前偏美響雨後更長吟羈旅愁無那懷歸思莫禁向來
家樹聽不是此時心

端陽有感

憶昔年年逢此日細斟蒲酒勸姑嘗今年此日人何在
迸淚如泉倍感傷迸淚如泉倍感傷為悲姑逝是端陽
几筵仍捧蒲觴奠荏苒光陰又小祥

對雨漫述

宿雨蕭蕭暑氣微
庭花芳菲故園桃李今何似
凝睇江雲獨倚扉

聞徵瓦氏兵至

傳聞瓦氏勇超群
萬里徵來淨塞氛
多少材官屯海畔
策勲翻仗女將軍

夢醒口占

越城避寇來旬月
旅夢還家已數迴
夢覺寥寥不成寐
漏聲時聽四更催

江上別兒

季子辭家在北
返班照榮祿
又南見塌翅如凡鷁

仁日翻飛上

帝州

初夏即事

朱明初屬夏
暑氣漸生煩
日午槐陰密
風晴柳絮翻
黃雲連夏壠
紅雨落桃園
恰恰鶯聲老
喃喃燕語喧
鈎簾對清景
欲賦已忘言

孫夫人詩集卷之二

盛明百家詩 潘氏詩集

碧天吟稿者集女郎潘氏詩也按吟稿舊叙云碧天
道人吾台山東提學潘留鶴之女貢士裘西川之妻
善吟咏其詞讀之隱約深厚守禮不放嘗見宋天聖
間有女郎謝希孟集二卷歐陽公爲之序謂其有古
幽閒淑女之風雅非時婦人之言希孟不幸爲女子
莫自章顯於世其詩竟賴歐陽傳之噫碧天豈在希
孟下哉使世有歐陽公殆謂何如婦人女子之作近
不多見拾存稿若干首用梓以行時在嘉靖甲申仲
夏今梓除前刻外共得詩二十九首爲隆慶庚午冬

仲前刻搃稱淑秀今刻專題曰潘氏集云是月既望
錫山是堂散人俞憲識

秋月

暮雲棲野樹秋水蕩寒波板橋明月夜織女渡天河

夜坐讀周南

獨坐難禁夜色寒滿窓新月度春殘臨文徒媿無經濟
只把關雎仔細看

題畫

屋傍青山下人歸蒼苔中未開雲外戶先聽水邊松

桃源洞

蒼苔白石映空山
白雲封

漁人著蓑水光山色與偏多試看塵世浮雲夢
黃葉秋風下遠波

月明一首

月明如水碧天高照得人間萬里遙
夢入紗窓雲影裏啼鶯驚醒在花梢

梅花雙鵲圖

雙雙枝上共徘徊點點梅花向日開
不識飛禽綠底事

高聲似欲報春來

隨任夜泊晉陵

寒雲薄霧五湖秋風動蘆花
蕩客愁幾處家山何處是
青天孤月思悠悠

題扇

萬里飄然一葉舟
烟波渺渺清江流
多少歸來與
看盡人間富貴愁

杏花

春日遲遲上碧苔
一枝紅杏向人開
微風透花香落
紫燕依稀今又來

清明偶題二首

三月黃鶯飛上林
野花開盡杏花深
清明時節春風暖
楊柳堤邊綠陰

江花江草水萋萋
雲靜青天日墜西
風景不殊圖畫裏
好懷獨聽鷓鴣啼

咏柳二首

烟柳青青葉已齊
半簾紅日小鶯啼
玉樓人靜悲橫笛
惟有東風吹向西

剪剪輕風二月天
如絲楊柳滿庭前
子規驚動深閨夢
起捲朱簾看翠烟

梨花

梨花滿院向人開
幾陣幽香到客懷
野鳥一聲春晝靜
又看蛺蝶過牆來

春詞二首

春光淡淡鶯聲歇
病眼觀春不似春
世事千年多是夢
乾坤一咲屬誰人

小窓閒坐月朦朧
望斷天涯思不窮
黃蝶亂飛花影裏
却疑春在杏花中

夏詞

花開倦倚玉闌干
碧樹蒼苔對小軒
月自西生光

水流東去白連天

秋詞二首

秋風颭颭令人哀
細雨霏霏落葉悲
野鳥不知何意緒
低頭似欲向人啼

風光蕭瑟自悠悠
正是幽人獨倚樓
何如落葉隨風舞
共作鄉園一段秋

西園

依依楊柳映蒼苔
滿樹桃花映日開
不知燕子棲何處
此際東風依舊回

春遊

野草萋迷一徑清
飛花無語怨春情
微風初月穿簾幙
喜聽黃鸝樹上鳴

連雨

久雨堦前鋪綠衣
烟迷竹樹影稀微
黃鶯交坐窓前語
說盡春愁來往飛

月下撫琴二首

碧天素月理瑤琴
流水高山我自尋
最愛南風歌一曲
了然真見古人心

靜坐蒼苔理素琴
青山綠水作知音
林間碧落幽閒處
白月微風伴我吟

赤城暮春

滿山濕翠四圍青
千里同雲映赤城
林鳥數聲聞白日
野花黃蝶暮春情

清明值雨

春風到處柳條新
萬紫千紅盡不成
昨夜庭前新月上
今朝風雨過清明

寓金陵寄長兄野泉

萬丈華峰瀾水東
天涯秋晚思無窮
兄南弟北三年別
越水吳山兩地同
明月曉光移檻白
芙蓉秋色映江紅
鵲鴝誦罷情無已
片楮聊將託便鴻

新秋

窓前初月掛銀鈎
水色山光總是愁
花落碧苔間
白晝鳥啼庭樹弄
清秋紛紛黃葉隨
風舞落落寒泉傍
檻流月色滿簾多
意趣蕭然物外自
神遊

潘氏詩集終

盛明百家詩

續俞繡峰集

予弟汝立性以不羣爲尚至今之娛詩文者亦若羣
馬多厭棄弗爲予刻明詩後編迺謂曰刻後編而無
汝集可乎日月易邁塵事多端即日濡墨可也乃復
得此然亦止三十餘篇耳列爲續集觀者或可竟其
志云隆慶己巳夏忘言老人兄憲再識

姚山人七十自壽和其韻二首

道在何嫌山澤臞猖狂還咲泣窮途卜居井邑真高隱
不挂朝紳豈賤儒雪上履穿寧是病衆中詩話半稱迂
空谷逃名名自好薰膏無用未爲愚

戰勝知君久不懼藉君猶復指迷途白衣無意山中相
蠟貌恒卑叔季儒鉛槧窮年忘老老交遊却餽任踈迂
吾衰甚渴同茶夢賸有磻溪也厚恩

元宵雨中胡兵馬携酒家兒宅次韻

翳燈風雨惜初元有客移觴棹軒坐愛九微明永夜
繆參八俊接清言誼勝金石俱心契道濟蒼生匪手援
笑視乾坤何曠曠人間空自異藩垣

贈郡尉周衛陽公赴召

句園星象邇來虛民自無冤頌碩儒法席經時聊問鹿
官衙如水絕懸魚晴沙鷗鷺隨行李遠道驪駒過草

留得晉陵棠樹在朝端還佇皂囊書

母舅嶧峒山居次王憲僉韻二首

愛學林宗折角巾烏紗藏去作山人此身竟是菩提樹
萬事消除麩米春耽寂每從僧結社避喧甘與虎爲隣
李生亦有天衢志謝却塵緣一諦真

西神深處紫綸巾竹逕裘羊肖古人石上黃花歷霜雪
爐前素髮混冬春降龍伏虎應非幻面壁浮杯可作鄰
沈氏有甥堪自咲仙翁何術返吾真

巡按侍御温公平倭輿訟一首

柱史巡行代 乘輿玄威仰伏靖疆隅電飛驄馬從天

下潮湧鯨鯢尅鬪鉏仙詔九重來寵錫群黎萬姓慶安
居還朝密勿許辰告千羽雍容邁有虞

家兄園亭賞花次鄧山人韻

雨霽春深日正長名園取客共飛觴樂事不教踈白髮
閒情偏得昵紅芳坐無艷質非金谷人有耆英是洛陽
四美年來諳社燕三旌辭去效屠羊

和沈石灣兄見懷韻

故人何契闊忽復寄雙魚備藥誰收爾論文我欲渠
江淹鮑謝卒究困荆舒早晚桃源棹梁溪倘過余

初冬同王澄原汝直弟登家兄長嘯臺暮觴

韻

萬木蕭疎已隕黃登臺聊復送斜陽朋來恰比商山老
勝賞還同斤竹岡最憐作賦宜軒是何用吹簫引鳳凰
壽客寒香勸紅友清宵留醉百年觴

贈蘭溪王春軒相士次仲山翁韻二首

唐舉原知伎入神照心明鏡絕纖塵微言一咲驪黃外
與爾同爲出世人

如君藝術自通神未到蓬萊已出塵李廣難封王老嘆
余今非是殺降人

冬日雨中天寧寺訪月泉上人觀念菴先生詩墨用

韻貽之

且從法席傳三昧，懶向儒宗列四科。元亮攢眉投惠遠，
姚興屈體事鳩摩。扁舟雨雪相過少，香室閒經入悟多。
蒲軸蛟龍誦佳句，螺川桐水柰愁何。

壽致齋殷翁九十

砥柱黃河萬里奔，吾鄉吾獨愛斯人。貪泉試酌心彌爽，
介石寧辭衆笑貧。淇澳有文還琢玉，磻溪不遇自垂綸。
耄期况復親書卷，孝行科名付子孫。

家兄蓮葉舟成有作次韻一首

仙舟共載薄侯封，十丈花開華嶽峰。下瀨定知先紫燕，

涉江誰擬負黃龍。書畫米家何鄭重，絃歌姚令自從容。
靈槎夜夜侵牛斗，欲問君平路可從。

夢游西湖二首

西湖佳麗半生聞，載酒行吟未有因。一夜夢飛湖水碧，
頽然却似倦游人。

吳山越水海東濱，急管哀絲秋復春。夢覺不分俱是幻，
風花送盡古今人。

題畫

高高月出畫樓東，玉笛聲淒楊柳風。少婦當軒望夫婿，
碧天無際有飛鴻。

送別

送君莫惜酒盃頻此去歸期未可論隄上柳條長幾許
貫牽離緒與愁人

鄧山人謝送寒菊有潯陽無酒之喙用韻解之

秋色交情誰淺深寒花携贈似予心江州正乏王弘酒
彭澤徒煩元亮吟帶露食英真味在烹茶厄水舊愁侵
聞君斷飲延年歲朝夕欣逢壽客臨

臺試以病自免聊短述

場屋遭迴四十年依然坐卧舊青氈漢廷虛下求賢
淮甸徒貽招隱篇多病虞翻窮到骨長貧干木逝

浮雲不肖孤飛鶴應有鸞鳳共一天

以病除名自述

老去履斯境胡然空讀書家將身共病名與累俱除心
已通仙籍身還滯草廬何須論得喪性外揔吾餘
元日二首呈家兄

浩劫輪迴際生辰又此年昊天傷隔世幸海愧爲川貧
病苦人後兒孫慰眼前從兄春正永吟嘯日隨肩
曆紀昨日盡支干改建初登樓愛雲物倚架愜圖書岐
路宜隨馬艱虞故墜驢一窮無別計易歲祝多魚

立春日遣懷

庚甲初週逢此春頭顱老矣興彌新年光十日和氣遍
梅花蒲枝生意真物我自知無徒羨藝文誰道棄孤貧
百齡心事何須問且盡芳尊任隱淪

穀日喜晴

洪荒衆食鮮上天雨嘉穀懿哉虞后稷有相惟率育粒
我億兆人秬秠及種稷躬耕作農師飽煖萬事足羲氏
紀佳辰繁殖詔比屋勤生俯仰餘不昏自窮獨欣此風
日暄豐亨兆多福而我時苦飢糠粃僅充腹炙背坐南
軒首瑞書汗竹

哭成后山長史二首

一疾不濟鬢冠裳赴夜臺生平無愧色吾黨有餘哀
圃芝方秀軒車轍豈迴年年花下宴此日爲誰開

鴻都通桂籍世德紹箕裘志以艱虞奮才因簡拔俱齊
東移牧伯河內佐王侯名迹留輿誦浮生付浪漚

花朝雨中鄧山人招飲次韻紀興

春深風雨底須憐叢筍尋花費酒錢簾戶沉沉寒尚在
文龍款款老多緣若催桃李還祈日且混身名莫問天
半醉濡毫無好句朽株難置鄧林前

再贈秦貢士伯雨

關門求士有虞同運屬休明豈易逢即看霄漢騫孤鳳

已見瑯琊起卧龍性術溫文違俗韵才猷醞藉翊
皇風一日聲華動京國歐陽元自識蘇公

閒居遣愁

貧交到處不相求書卷爐燠只自由忽爲春歸傷客思
幸逢花咲解人愁王門鼓瑟知音鮮陋巷操瓢雅意投
但使寸心無愧怍此身何用曲如鉤

寄從弟汝直司訓上虞

東浙名邦已得師棣華翩處繫遐思衰顏自分甘人棄
令聞真能副所期梁溪水漫無雙鯉虞嶺書頻此一晴
景秋西歸知不久惟清堂上酒盈卮

贈近山吳君

九龍西去多喬木最是君家住近山朝靄夕霏連謝岫
停雲歸鳥接商顏携壺命僕傳呼應着履看花倏忽還
况復友于懷陟岵季方爲弟並稱難

貽壻吳城

湖社名家幾百年堂基載廓碧山前靈椿有蔭南薰足
誼草忘憂至樂全春日豔天宜鼓瑟秋風稼穡每盈廬
須知用譽惟勤勤莫傍閒人學靜便

初夏課樵山中一首

溪盡入湖處亂山朝暮青勸歌樵作伴踐石鹿偕行涉



國家圖書館, NATIONAL CENTRAL LIBRARY, TAIWAN, R.O.C.

草衣常濕乘風屐轉輕芻蕘故吾分白首李夢形

徐自修集

卷三

七




盛明百家詩 續俞伯子集

長子淵素業儒雖屢蹶場屋而課程之暇輒事吟咏
予喜其不羈也嘗為刻詩篇以誘其進越數年則專
意課程無事篇翰矣豈其急於進取而忘性情之學
若是耶因迫其吟稿刻置後編名曰續俞伯子集隆
慶己巳春忘言老人是堂翁再識

南都恭送元旦 表時流聞

肅皇上賓

上國霜寒節序催驚逢獻歲 五雲隈千群虎士旌旗
暗萬堞龍城鼓角哀 玉几由來西鎬重金函堪為億



年培儒生草莽心徒切慚愧猶緣射策來

格壽堂成謹次 家君原韵奉獻

皇輿趨捧廿年餘舊業依然此築居開圃自宜追綠野
旌門曾見下 鸞書已瞻保又天心洽應遣承傳祖德
如恐為蒼生起安石無能晨夕獻吾廬

訪弘濟寺逢老僧坐話移日

暑日出城去江聲到門急連峰開雲秀娟娟翠微濕遊
子務探竒下馬對山立縈紆石磴斜劃然衆靈集龍象
肅塵念香花助脩習絕壁俯空明丹崖海潮吸陰廊語
鈴韻傑閣凌層級指顧空淮徐平蕪繡原隰偶然老僧

至隨意午飧給几席搖波光絺衣嫩涼襲綢繆話無生
渾忘夕陽入

送王少麓

鳳凰臺上春雲曉山色江光盈樹杪此時烟雨動離愁
却恨從前歡會少畫舫翩翩五兩輕慙慙十酒送君行
江臯一去同黃鵠千里扶搖是客程

謝同邑諸公招飲

諸君能結客賤子幸同群交誼今如此羈愁安足云話
深輕遠道賞慙戀斜曛酒罷歡成句狂書白練裙

鳳臺秋月篇為汪裁吾賦

秣陵城鏢鳳凰臺上曾聞儀鳳來吳晉悲涼那可道
古今白也稱雄才千秋塵跡悵已矣惟有明月常如此
灝氣光涵滄海雲澄輝影落空江水月色江聲並可憐
吳天秋半桂花妍憑君折取高枝去待得春深雨露偏
送陸麗涇

江上同為客今朝送客行恨迷花外路心折水中萍別
館經潮遠歸帆帶雨輕無能齊去住把袂自含情

秋雨後寓目觀音閣

白冶秋高桂影沉棘園初解一登臨長江日溜千巖水
傑閣雲聯萬樹陰清梵偶依慚見性高山遙對想知音

如何郭隗臺前路偏繫窮愁望遠心

八月廿日何龍崖藩伯為予試張桂席於園池之上
酒酣因出王仲山年伯詩畫縱觀樂而賦之

共羨使君能結客為園真與洛陽倫花暖翳高窓日
酒榼頻移小洞春坐久喜聽玄論溢醉餘驚見墨華新
壯懷竊擬乘嘉興桂宇芳筵不隔旬

客窓與錢敬亭

失意逢君好晴窓不吝過友情踰肉骨高論決江河客
久貧難給途窮歲易磨紛紛裘馬者誰復是常何

白雲梯

此下八首係牛頭山雜詠

登頓百餘級置身出層霄望迴眼界別諸天成寂寥
虎跑泉

禪汲藏山腰滄泓落深綆試煮趙州茶堪令塵垢屏
辟支洞

巉巖辟支洞草樹何葱鬱安知石頂雲不是洞中佛
塔倒影

何年古佛塔亭亭插危嶺應從了悟來幻成空處影
文殊洞

洞小深不測相傳貯梵音到來趺坐久塵想亦能祛
兜率巖

翠壁排空起岑樓構其下欲識大士心試從觀空者
捨身臺

興至忘身倦危臺上覺便欲因超衆有或以降諸天
龍王池

雙峰入天際上有一泓水漱水可滌煩所虞毒龍起
送陳清瀾先生還東筦

滄江一卧歎離居不為干時亦著書谷口久耽嵇阮僻
濠間常樂惠莊魚東山應念蒼生起前席曾緣楚傅虛
京國到來秋正好憐君何事又脂車

同友飲竹泉僧舍因憶半峰上人不能遂往漫賦此

續前集
章

歲暮長千古寺邊一尊聊對野僧筵
阮生獨抱窮途恨謝客能參上乘禪
白眼儘教除黑業紅塵那許溷青蓮
坐閒欲覓支公去追憶過從又數年

偃曝

扣關無客出無車環堵蕭然僻有餘
獨愛慇懃趙衰日曉窓常伴郝隆書

春日寫懷

飄泊風塵意不揚肯將遲暮殉年芳
心懸雁帛愁千里目斷鵬程淚幾行
荆璞直遭三刖耻董帷空下十年強

放情自合遊江海浪跡渾忘客
帝鄉避弋野禽投舘窺人新柳亂橫塘
春來多少關心處坐對殘編祇自傷

坐雨呈袁吏部

兩年留滯已難禁况是經旬積雨侵
斗室坐閒黃潦入荒階人遠綠苔深
漂零真是愁溝壑濩落無能起陸沉
魚鴈不逢過從絕燕臺空說築黃金

自白下還途中值風雨

疾風朝送雨乍暖忽生寒騎阻康莊逸
花飛故苑殘一身常抱恨匝歲不承歡
歸路猶逢此令人意自難

簡樂菴上人

擾擾風塵裏無緣一語同烟霞疑色相雲水識虛空沙
界終教入慈航肯為通懸知苦海上濟拔有神功

長歌行贈別史龍江還吳

金陵自古龍蛇宅閣道縈紆紛畫戟琪園瑤圃鳳皇臺
琳宮貝宇長干陌我昔頻緣射策來氣酣直遣河源回
邂逅相逢便相昇狂歌那信朱顏頽十年遊藝只如此
一勝難償三北耻末路悠悠安足論世人視我尋常爾
去年卒業成均時感君意氣心相知昵好堪將骨肉比
同心誓把金蘭持通宵呼酒還抽筆出門聯騎揚

雅論偏教鄙恹除清歡坐遣窮愁失一旦君開徐淑書
青春欲返臨河車琴尊未作京華別魂夢先應到闔閭
闔閭城北春風早處處垂楊映晴昊錦纜徐牽綠漲肥
芳原踏遍王孫草此時羈旅正含情把袂那堪別淚傾
相逢未久忽分散臨岐恰惻何能平去年看花春色好
今年送君春易老馬周未獲遇常何風塵掩冉長安道
丈夫坎壈心不疑結交肯為新知移乘時加飯各努力
莫令青鬢愁成絲即今當宁求賢切暫許攜經去巖
穴一朝月桂發天香期君共向天邊折

訪半峰上人為予誦自述詩倚韻酬贈二首

一住名山戀翠微
偶來何幸得皈依
憑師話到無生處
浮世真成過鳥飛

每歎人生會面難
無端一別舊盟寒
好開吟社追蓮社
莫以言詮作相看

奉憶 家君

春日庭闈好琴書
滯客程憂端結眉宇
離思動心旌夢
繞斑衣舞情牽桂籍
榮如何倫叙樂翻以利名輕

留別袁吏部吳門公鍾比部古愚公李民部仰山公
黃庫部思蒼公

旅食經年後窮途
返棹時片言難盡意
三疊易成悲

鷓鴣方千里鷓鴣復一枝
同心不同適歡晤恐無期

留別李登瀛

君住京華我故園
離魂黯黯向江門
南陽空自愁平子
西蜀何人薦士元
兩歲風塵孤寶劍
半生蹤跡委丘樊
勲名嗣續俱無那
縱對相知不忍言

歸途風雨暴作締苧生寒憂集恨并聊用攄寫

每愁書劍滯江臯
歸路風塵豈憚勞
驟雨連山迷日月
狂飈入樹起烟濤
憂來祇自隨劉錡
寒至誰當贈范袍
聞道網羅今更密
肯容吾輩困蓬蒿

家君新製舟成有作依韻奉和

片帆隨意破雲封門外清溪湖上峰偶接仙槎疑犯斗
常邀李郭比登龍濟川曾及時多難浮海非關道莫容
應有米家書畫舫爐烟茗盞日過從

杪秋訪友信宿溪館時席間有出扇索題者

仲蔚結廬今若何聞君掃徑漫相過風雲野外秋容好
雞黍村中樂事多元亮醉餘猶命酒右軍書罷欲籠鵝
溪頭月白人難寐小艇悠然送浩歌

題謝樗仙雲山小景

百疊峰巒水一方千童灌木繞溪堂仙源欲問無從不
滿地白雲春晝長

短歌行

春序載遷春晴可憐爰潔我几爰拂我箋草色盈庭花
光在樹憮然與懷憂并恨聚無出峽流非干雲枝有業
未竟逐逐何為歲月易磨譏謾易起弭之伊何曰惟修
已古人有言志士惜陰懸頰刺股挽我陸沉緬彼樞驥
踟躇却步一上燕臺驕嘶天路有山則高有水則深悠
悠霄壤孰測我心墨子含悲韓生飲辱長言莫伸短歌
以告

家君初度奉祝

運適千年會親當六表餘承傳空有托狂謬實慚余

嶽降元非偶天生定不虛壯齡常捧日踰艾即懸車
身隱心逾赤居閒意自舒絲綸歸釣艇桃李尚門閭道
德兼文藝山林勝珮裾黎元思樂只鄉黨頌恂如著賦
追天寶然藜陋石渠至人操鼓鑄大造廣吹噓平格終
膺奉精英信豫儲夜來南極曜炯炯燦吾廬

雨中侍家君避客惠山別墅

共言晴日登山好始識山中雨更宜桃李滿蹊芳潤浹
松筠繞舍翠華滋肩輿總勝泥乘輶草榻還堪醉賦詩
非為逃名遠城市聊憑仙侶獻春卮

莫中江年伯過訪家君子獲侍宴公乃屢索予詩

席上漫賦

何意星辰履能投草莽區別來無限思相見易為娛柔
遠須方岳經邦待廟謨陽春公夙擅下里自難敷

王巖潭年伯見訪奉呈

二十年前結駟遊論才豈合卧林丘揚眉總是風雲氣
落筆猶懸廊廟憂肯為寂寥遙命駕祗緣契誼欲相投
他時若念蒼生起竹舍還能過子猷

惠山寺同諸友宴集邑侯賦贈

使君平政遍棠陰載酒邀歡綠水潯赤舄由來能下士
青林時得一披襟行春已覺陽和至聚首俱懷惠澤深

清賞不須張樂待，訟庭元自有鳴琴。

暮春過友人別業

弭棹訪仙源，幽人久杜門。春將花事盡，晴喚鳥聲繁。窈窕同愚谷，蕭條類漆園。知君秉微尚，予意復何言。

梨花白燕圖奉家君韻爲鳳石春元題扇二首

瑤光初散晝方遲，銀井交枝院落宜。素羽差池來去好，賞心不待月明時。

九仙殿裏玉花飛，白羽雙雙映舞衣。春在上林君得意，夢魂疑向武陵歸。

和友人登臺晚眺二首

玄晏雙書暇，登臨日易曛。振衣天是路，投步鶴爲羣。遠渚烟光暝，殘陽樹色分。月明仙吹起，欸乃入孤雲。萬井喧初定，高臺日漸曛。登臨誰擬賦，孤寂迥難羣。樹杪星偏聚，天涯路不分。相思何所托，或恐是機雲。憑高一以眺，山色上斜曛。忽忽風塵表，翩翩鸞鶴羣。詎將人世隔，稍與俗情分。何處愁偏繫，燕臺深暮雲。

夏日小集中園王澄原有作見投次韻奉答

荒園星能聚，茅堂絕世氛。微歌灌細酌，促席領微薰。地僻元無暑，人間自樂羣。陽春一以賁，丘壑總成文。

夏日同友人坐雪堂禪室

長夏閒如許，祇園足偃眠。因期高士至，同話佛燈前。僧
眼看無俗禪，心悟有緣受。衣吾未得趺，坐且談玄。

己巳七夕舉子爲山澄原有作見慰次韻謝答

昨夜靈光燭，小庭商瞿。今幸一兒生，懸弧正及新秋節。
入夢還疑太白精，燕翼會看繩。祖武鴻篇何意賦，時
英不愁無後。聊應爾敢謂于門世德并。

徐慎所馬元瑞郁懷泉三春元見過因壯其成均之

行

昔年觀國邇雲霄，六絃歌沸海潮。懶我無因追舊侶，
羨君今始托高標。徑延佳客偏能掃，賞洽清歌不待

只恐飛騰從此去，好憑銀燭永今宵。

再和 家君詠蓮葉舟之作二首

周覽元輕萬戶封，試裁小艇學蓮峯。不論吳沼稱馳馬，
若擬昆池似逐龍。河朔賓朋真孟浪，江湄詩酒自從容。
濟川倘更需舟楫，孱眇何由得景從。

昔年轍下醉黃封，此日移舟戀九峯。挂席波光渾似鏡，
捲簾山勢盡如龍。直窺銀漢方酬興，肯向塵區復抗容。
太乙有時逢海上，仙源何處擬相從。

挽張樂玄

少微江滸隕旌櫬，上都還未識生平。面空傳歿後，編名

緣懷寶重死豈受人憐食報應無既封章待胤賢

冬日同鄭渭川畫史投步山中

窮冬彌月不出戶偶爾結客山中行石脚崎嶇荒塚亂
山腰鬢鬢晴雲生尋梅訪磻終自好問舍求田非我情
安得買縑常此住丹崖翠壁乞君成

贈山中人

青芙蓉簇倚高竒一線懸崖萬壑通千頃烟霞高士易
數村鷄犬上皇風付論勲業稱無競若混漁樵好是
就裏瓊英真可掇賞心欲問紫芝翁

柳枝詞

相送柳條青相思柳花白柳花飛作萍行人是歸客

太倉馮守之毋張夫人貞以壽友人索詩縉紳侈其
事猥及於予爲賦貞壽篇

昭代風還古堅貞世所尊坤靈伴獨發壺則望何掀德

身并同孟毋敦心緣從一定身為保孤存茹蘼

情偏苦丸熊志可論淒淒松柏操濯濯雪霜繁施報天

無爽麻嘉慶有源鵠雉方樹業鳳詔已旌門彤管褒

朝史綸音下帝閣雲程紛謝玉霞帔燁潘轅寶婺

光逾燦庭護綠正蕃長年方自此禧祝復何煩

鳳石挈往呂氏看海棠花

偶憶芳艷好携尊路不賒花明偏受日杯灑欲流霞買
燭仍須照無香亦自嘉錦城名獨擅耽賞合移家

金陵逢吳崑麓春元同寓鷲峯寺

偶乘秋色弄扁舟邂逅逢君分即投塵海廿年空夢想
禪房幾月共淹留久期宣室將虛席不道賢羅未拔尤
春至曲江堪舞榭君獨對鳳池頭

喜羅蓉江至因憶其問惠之勤賦此

館無鄉曲茲宵有故人交情貧始見芳訊寄能頻秉
爲還喜聯牀話更真客居荒落甚因爾忽生春

詎知憂旱後經月雨如湍苦霧千林合沉雲萬嶺攢陰
蟲啼不住鄉信到來難明日重闌閉秋陽好借看

家伯春濤家叔南英家兄方川過寓因成小坐

帝里清秋會竹林故鄉親老問家音庭闈定有懷思
賦城闕那堪寄遠酌尊酒莫辭籬下酌悲歡偏向話中
深雲霄咫尺翻鴻鴈一慰年來遲暮心

晴

積雨中秋過時陽半日明江雲仍帶潤溪岸已全平候
騎朝初發晴嵐晚欲生恨無新月賞離思坐還盈

秋試後飲秦振菴寓偶呈

旅室開文宴芳樽話故知秋期方半後嘉賞欲臨時几
席涵清樾盤餐薦伏雌風雲俱有待與念一停卮

十八夜得月

獨館愁霖積虛窓候月生家音湘鴈度城堞夜烏驚桂
子含風媚槐芽浥露清嘉期旬夕待那得不嬰情

方山駕部招飲鳳凰臺明日書此爲謝二首時同飲
者華古坡王見巖華述補暨乃弟勉齊令嗣少方也
公子園林闢鳳臺郎官張宴爲憐才携尊共愛天香蒲
秉燭還期霽色開樓閣祭差橫鳥道峯巒隱約接星台
主人賸有終宵興小榼留賓去復回

何年結圃傍高臺欲賦秋風愧不才蒲地草花琴筑潤
中天城闕畫圖開謫仙題品雄千古漢署衣冠逼上台
縱飲更期旬日後連鑣同聽鹿鳴回

爲釋小隱賦號

寄跡名山不問年野情得向靜中便懸知妙悟從棲隱
衣鉢今當第一傳

道上逢查澄源有感

帝里分違日家鄉南北天偶逢淮水畔歡揖 鳳城邊
拊臆偏懷舊相看各問年風塵堪浩歎回首欲潸然
訪鄭渭川鄭以病足不會者五月矣

策蹇長千里逢尋處士家徑深藏密竹門小翳繁花晤
語流雲外行吟積水涯莫因愁與病相對却生嗟

舍弟玉泉來寓志喜

幾宵春草夢喜汝故鄉來旅况三秋惡羈懷此夜開勝
遊歡自問密語坐停杯寧似孤征鴈嘹嘹天際哀

詠懷三首

翔鸞鍛其羽冲霄何由得河漢無津梁可望那可即一
經二十年研窮頗爲力既乏適用資且復愧生植修塗
固多岐平原亦孔棘迷繆苟無指望洋徒自盡進退
則然枯榮理靡識緬彼壯士懷垂老思奮翼時事

迴胡能終墨墨延首東方明拊膺三歎息

端居寡將迎卑棲託閒園時好旣靡治古道良可敦抱
一聊自適冥思絕攀援上交詎非分薄俗忌騰騫驥足
未及展讟謗成煩寃所以先機士晦跡甘丘樊玩弄五
千字紬繹幽悠言於理倘有契庶用清心菟

物情各異適恩慙有攸歸意念一相在讐結乃在微盜
蹠日爲利自文甘遜肥三以天下讓泰伯仍見譏尺坂
固云隘摧輪有危機貝錦一成織束縛難解圍老氏矢
明訓守柔而知幾三復期不忘千載揚餘輝

庚午除夕

上書初罷意方難又見年華逼歲闌
潦倒祇餘雙眼白漂零惟許寸心丹
春風入座宜尊酒倦翮經時怯遠翰
用舍無形聊自適恐教青髻似愁潘

雪窻獨酌和鄒思齋

獨臥寒齋憶友朋忽看窻外雪光凝
掌中竹葉愁能遣墻角梅花冷不勝
獻歲乍過春又至徵豐寧待穀初登
冗拋筆劄成踈懶偶接陽春念欲興

聞果公示寂

客歲長千里上逢結茅曾共白雲峯
談禪猶記風生塵授鉢空存歿後容
八十頭顱真出世五千沙界絕行蹤

山城不見詩筓至春社歸來淚滴重

簡所知四首

莫嫌長日閉門深祗爲愁多不自禁
喜有貧交相慰藉愧無幽賞助清吟
風雲我已成衰晚湖海人應笑滯淫
雅志未酬恩未報試窺雄劍欲沾襟

貧病年年只自知黃金一散事多危
烹魚每冀傳緘素剖橘虛言遇奕棋
肯怨南山歌白石祗憑緇帙照青藜
春來縱有看花興豪飲長吟好共誰

楚人懷玉世無知三獻歸來益自疑
壯志未應灰似燼丹衷真覺赤於葵
聞雞常是燈前舞聽鳥還投野外期

爲報雲霄裘馬士勲名莫負下帷時

澤國端居有所思幽棲堪寄復堪悲身緣未遇偏叢謗
心爲無營反負疑風雨幾番春事過緘書一與故人期
衡茅定有瓊瑤至午夜燈花光陸離

望仙歌

夏難忘芳白玉京迢迢碧漢雲英英微垣玄圃盡奇壯
紫府環列天墉城叢霄晃朗浩無際吞吐一炁涵虛清
羣真百靈通邀賞班麟青鳳時相迎天厨馥郁五香集
九韶雜珮參差鳴芝童日捧黃金座玉女手抗芙蓉旌
長風披拂羽翮舉側身謁帝求長生君不見許旌陽言

長庚九轉煉却還丹成刀圭入口生羽翼白日皎皎升
天行嗚呼我思兮欲與斯人且爲侶碧海青天共延佇
翛然物表御氣常飄翩安能跼蹐趨趨隨世而容與

喜白嶼金丈過訪

相逢俱恨晚把酒興如何炎夏來青舫荒園款綠蘿忘
年交始定談藝話偏多愁絕無懽賞因君一浩歌

園居雜詩四十一首

失意歸來日含愁祗杜門拙鳩真自笑衰鳳亦何言鄭
圃且逃跡於陵宜灌園投閒君莫訝違世道應存
長日小齋坐一區生事微非關逃世網自是戀庭闈野

鳥頻窺席緇塵不上衣避人吾豈敢相訊未應稀
花竹澹相映悠然淑景儲地當三讓里宅是百年居開
逕無塵鞅傳家有 父書乾坤吾老大歲月肯教虛
幽意在山水簞瓢恒晏如地偏人跡遠心懶世情疎已
見室如磬無勞食嘆魚當年題柱意未忍負公車
地偏塵不到笑語落花繁極目朝霞炫棲心夜雨昏詩
成還自語情至向誰論莫恨過逢少知希道始尊
一榻坐來深能滋不染心閒雲三徑合芳樹半庭陰湖
上子猷棹林中叔夜琴楚蘭吟倘就乘興訪知音
夙昔竹林會予方小阮狂風雲生劍氣杯酒動星芒

大倏然至悲歌徒爾傷何能錐穎脫一以慰 高堂
寂寂子雲廬年年此索居明農兼學圃說劍亦觀魚袖
有天人策門無長者車却慚嵇叔夜未草絕交書
池館共云勝拮据良已艱引泉謀掘井覆篲學爲山
親老官仍解園荒予亦閒只今慚祿養菽水漫承顏
遜世亦何營窮經兼耦耕苔斑亂人跡烏語雜書聲止
酒非緣禁耽詩寧爲名匡時愁不逮翻欲學無生
相憶心空遠孤吟興亦饒蒼松圍古榭叢竹映虛寮時
與幽賞遇漸令塵慮消忘言復忘象寂寞事玄超
一室寄微躬蕭條舊業空感時悲伏櫪適志愧冥鴻漫

擬隆中叟何如河上公遣懷憑小酌眠坐百花中
日長無外事抱易掩衡茅違世成駢拇忘機類繫匏晴
窓明素几叢薄隱枝巢染翰何能賦惟應續解嘲
小院淒風入蕭條歲欲闌蠹編貧可樂鶉服拙宜安孤
坐芳華歇卑棲去住難庭前丹桂樹暫作小山看
上書不得意歸卧北山南拵卷有神會對人無俗談脂
韋吾詎敢澹泊自湏甘獨愛嵇康懶年來懶漸諳
孤室坐蕭森冲虛養道襟非徒謝喧競直欲挽衰沉靈
草時供玩懶雲偏會心逍遙吾意適祇恐負高深
未緣諧俗好托迹混樵漁興至惟憑酒愁來并廢書雄

飛空有待濩落更無如賴是清宵月尋常到敝廬
無事始爲貴居閒良灑然風塵空碌碌脩習自年年紫
雪烹將餌黃庭悟可傳肯將遲暮意常受世人憐
三春甘雨遍一徑綠雲齊星作荀陳聚花同劉阮迷濁
醪時獨醉幽壑不辭棲只此堪遺世寧煩抱璞啼
有意未能白無媒還自傷祇湏終日醉寧復向來狂感
遇新題遍憂時舊草荒兀然清夜坐不語泣干將
夕照動郊坰層陰散晚汀盆魚晴自樂徑草濕逾青裘
馬憐同學江湖笑獨醒行藏俱莫問吾道屬沉冥
踈慵難偶世林壑且孤騫柳子慕愚谷元侯宜陸渾逢

人無蠟貌對酒有卮言櫛沐朝來廢誰應與細論
淑景因時換幽懷逐處生雖無千樹橘却薄五侯鯖世
泰能容拙才踈合避名 老親詩獨擅得句請批評
焚香開閣坐灌木下輕風古墅飛朝雨遙村散午鍾間
湏傾白墮狂欲躡青虹赤牘無由至憑闌數斷鴻
中歲慕玄寂蕭然常索居杜門成市隱拂案寫金書寧
復歌彈鋏無勞嘆曳裾北窓時獨卧清夢到華胥
琴尊棲息處花石自爲藩斷簡閒堪續幽窓靜不喧
恒期有始塞兌欲無言誰識巖居子咄咄道亦存
門巷綠成陰瀟瀟竹逕深數魚消永日嘗果入

下羲皇夢滕前山水音試披高士傳耽隱竟何心
荒徑無人到間齋坐自深尋山不出戶携冊每投林詎
是輕軒冕方期菴道心怡然幽賞愜黃鳥是知音
風翮方疑倦萍蹤仍未閒強吟心更苦善病久將頑
過嵇中散才非庾子山偶聽兒學語暫得破愁顏
憶昨事干謁徒然凋散表虞卿窮未送阮籍淚難收利
涉無江海丘園有滯留但令三樂備於世更何求
夷甫談玄塵淵明漉酒巾淹綿時一醉寂寞又三春病
閱方書遍閒調鹿性馴湏知種桃者不是爲逃秦
遠與付遐眺川原一望中晨星高閣散晴靄小窓融白

石歌難緩青萍舞尚雄幾時風力稱鷓鴣起秋空
落落寡遊士淹淹常杜門濯纓臨水面欹枕卧雲根酒
熟邀清賞文成待細論城中車馬客誰過辟疆園
斜日高城上孤亭小苑中雨餘群鳥喚春暖百花融地
似鹿門隱人猶蓮社風但令幽意愜莫放酒杯空
嚴親才命世廿載事驅馳開府臨遼左鳴驄度漢湄東
山仍繫望北闕尚恩私祿養吾方愧茅容或可師
春至烏聲換嘉辰坐亦幽青原三尺雨芳草一溪流警
枕縈心事棲塵識宴遊橫經不知暮獨樹暝鴉投
故人偶相慰乘夜欵柴關月影疑臨水松聲猶在山

遊何日遂杯酒此宵閒只恐孤鶩去清光難久攀
欲語竟無侶倦來仍獨遊鐘聲宵閣度鈴語曉齋收室
靜懸孤夢年侵聚百憂高臺荒沼上瞻望每淹留
玄晏談經處蓬門小徑斜雖無三釜祿賸有四時花失
馬愁方劇籠鵝興亦嘉如逢度關叟將爲乞丹砂
晨看溪上雨灑灑度遙岑小閣霏輕霧長林下密陰傷
心庭草色聒耳砌蟲音故里非爲客愁來也越吟
文史締深盟長吟薄世榮古苔全上壁病葉半棲颺事
少愁還少心清夢亦清試看塵境內空谷幾人行

送衛進齋學博致仕還武林

風亭鳥鳥離歌起五嶽祠前弄烟水青襟戀別夕陽中
畫舫朱簾暮空倚夫君自是吳會英落筆往往龍蛇驚
有才未凝棟清廟藝圃却羨蜚英聲一朝下邑來耆
德講幄儒紳盡顏色大匠由來鼓鑄神羣材不負陶鎔
力方期樂育躋明昌何事忽思桑梓鄉挂冠梅尉隱吳
市跡非二疏心能方聞君家住西湖口門前幾樹先生
柳有酒休辜頭上巾酒酣耳熱還鳴缶古來賢達重解
官底用高歌行路難揮手塵途賦歸去綠陰蒼靄投長
竿予亦年來留滯者萬事悠悠付飄瓦安道終當過子
猷退之定許交東野錢塘之水天目山勝遊汗漫同

攀中散脩真步兵醉追蹤往哲無慚顏

題嚴羽士山房

抱關曾記迓青牛白髮歸來玉檢留午夜星輝驅崇劍
中天龍躍望仙樓地瀆勾漏方爲令氣比嬰兒是致柔
七返玄功誰獨擅不才期共采真遊

暫寄趙都尉園居二首

公主園池勝人間亦掩門幽花晴自媚嬌鳥晚猶言倚
閣成玄覽披圖獲細論賞心殊不極臨水欲窮源
林居無俗駕興逐野雲開邀賞携尊俎乘間闢草萊小
窓梅雨靜深院竹風來尤荷居停主能憐下里才

卽席

玳瑁開筵雜管絲春姬方及楚臺期清歌豈是能生怨
不爲離愁亦歛眉

秋懷

十一年鐘動翠微客齋不寐賞心違千門露重寒欺褐
獨歸窓虛月射幃塞北狼烽乘夜發江南禾黍送秋歸
多愁宋玉渾無賴卧聽蕭蕭葉亂飛

放舟梁溪晚宿惠山僧舍

閉關常是厭塵氛偶憶名山到水濱九隴翠烟迷翠宇
五湖衰草滯寒雲乘閒自合扁舟訪愜興偏宜

入夜香燈歸院靜老僧參誦樂爲群

薄暮將訪內第胡德風舟中口占

夕照下長坂廣川弄輕舟飄飄任所適日暮非遠遊好
雨值農候纖禾已盈疇犁鋤滿歸載牧豎時迭謳爲問
幽人築遥指青楓樓長薄棲衆鳥依微霞光收因思柴
門閉時與童子謀望望不可到烟波空復愁

夏日王澄源携尊過叙奉家君韻致謝兼呈潜坤

爲山二丈

暑熱煩莫解所藉酒如泉多君抱逸致惠訪情獨偏折
閒邀二仲携榼軒窓前良會嘆不偶恍疑來遙天私喜

椿庭上巖廊方息肩長夏日無事忻對瑤筵累釋情
俱怡興洽論自玄四座足清賞卷帙相盤旋蘭音契方
結宛若揮朱絃而我何爲者猥辱交忘年跡弛乏承志
偏側如墜淵辟彼塊然石追琢資仁賢有懷難具陳聊
復安瓦全菽水足爲樂塞裳伴孤眠高雅倘不遺旦夕
期來還

客有憂多口者余爲釋之作已讒賦

粵邃古之洪荒兮維皇風之渾噩負元氣以乘時兮涵
鴻濛而未鑿譬太陽之方中兮奚鬼燐之耀燿迨神聖
之秉哲兮亦儉壬之肇託觀陰陽之貞勝兮宜正邪之

間作慨世變猶江河兮日乘流而下趨肆決排其狂瀾
兮忘道岸爲坦塗顧游言之延蔓兮裨善境之荒蕪或
騁辯以滅倫兮或挾智以襲愚或巧佞以規利兮或朋
讒而揜瑜或脂韋阿匹飾詐以取聽兮又簧言蝎諧之
弗諼或羅織營蠱而媒孽兮復中挽內結潛倚之爲奧
援爰指鹿以爲馬兮目軒之爲輕變白以爲黑兮議同
之爲異訟妍以爲醜兮反妖之爲瑞于是西伯羈幽申
生顛躓曾毋杼投伍負劍賜靈均憂憤而江沉伏波蕙
苾而功毀貞女冒奔藜之嫵庶士于貪墨之議長城且
自壞而成擒元勳亦給縛而就吏吁嗟乎固察之愬行

兮實道之將廢也豈命之所遭兮胡天之不畀也逮夫
亂極思治兮否往泰來貞元會合兮文運天開譬諸窮
陰之頓積兮見陽和之乍返亦猶炎熱之蘊隆兮值涼
颶之方回斯迺群奸屏跡衆賢和朝君子道長小人道
消國是定巷議息道揆明法守飭元凱崇兮驩兜放尼
父進兮正卯殛縱羅吉之箝網兮焉施彼汪黃之便娟
兮徒飾幸媚嫉之既遠忻忠賢之可式愷悌者庶以揚
其休鯁介者得以伸其直穎慧者用以展其籌翼爲者
固以終其職清脩者既以保其廉博洽者亦以弘其識
運兮隆洽家道兮平康彞倫兮攸叙政俗兮允成

諫兮必就無善兮不揚睠茲治忽之明徵尚繹余言之
剴切扶善類而永安植謹忠而靡折迸盃夫而罔遺斥
狂圖而遠絕矢精白兮秉心慎終始兮一轍又奚惑于
傲象之詭謀群叔之流言彼嬖之長舌也哉系曰生順
死安寄蜉蝣兮命不可執吾何尤兮彼讒者口匪擇讐
兮虺蝎虻蠱遇則投兮伏機巧中誰則籌兮靜一以守
惟靈脩兮橫逆猶是紛吾憂兮鷗鳳借棲亦拙謀兮飄
然遐舉庶其瘳兮

登焦山因與自然上人談焦隱君遺事書此遺之兼
訂後約

獨喫橫江控海門老僧林屋自爲村江風不動雲英歛
山雨時催午氣昏法界恍疑天上闕仙旗應返月中魂
何年共結蓮花社洗却煩襟與細論

北京行十首

岌業高城敞 帝宮 堯仁博施萬方同崇山大海俱
雄鎮絕勝秦中與洛中

天南瑞氣曉蔥蘢 闕下齊居列上公萬國金函齊
獻祝寶香馳入 壽明宮

我皇神武萬方聞猶說邊陲入虜羣十二京營貔虎士
盡鳴金鼓望秋雲

萬舸乘流集衛胥崇文門外是通衢僦車飛輓爭先入
共道瓊林有宿儲

玉竦金鰲地底迴瓊臺銀閣倚天開彩雲遙逐簫聲起
疑有青鸞月下來

弱柳絲絲拂御墻千盤馳道入雲長朱旗導出金鞍馬
知是 天閑小乘黃

玉珮聲清散早朝金貂濟濟競鳴鑣偶逢祖席 天壇
去一片飛塵夾路遙

三市迢遙接 紫宸兩街畢集異方珍青絲絡酒銀驄
馬妖女騎來不避人

曉鐘初動曙光浮處處啼寒夜不收歸客醉餘騎馬過
不知冷露濕貂裘

紫陌霜寒起曙烟青衿隨例亦朝 天雲臺麟閣須吾
事鼓篋重來又幾年

寄家書

秉燭夜難寐遥遥來曙鐘八行愁思疊一紙淚痕重路
隔青徐杳情違甘旨供休言不得意但報早相從

鴻山華丈七十壽詩

耽玄常卧綠溪涯海內雕龍推妙詞叢桂滿園開作社
碧山移席看生芝 賜衣曾遣夷王識秘典真從 御

府窺此日得歸堪介壽花前盡醉不須疑

奉和 家君戲詠白楊梅之作

火齊超凡果茲尤出異林守玄存素質知白抱貞心方
訝冰丸聚還疑玉液淋回思河朔飲瓜李自沉浮

送友人東遊

柳葉垂烟溪岸平片帆東下曉風輕從來岐路令人老
莫遣相逢白髮生

築圃

窮達恒不齊人生意須適君子有良圖乃在山與澤及
茲春日陽荒園草萊闢結廬倚松麓下臨千丈石門開

蔣生徑堂對葛祠栢于茅葺頽垣鑿渠覘新脉脩篁滿
高原猗猗六窓碧時邀渭濱叟兼得郢中客朝出溪風
寒暮歸山月白靜餘一披襟至理聊自格野人無長慮
巖廊有群策於以葆吾真庶幾慰疇昔

水簾

此下四首係惠山雜詠

曲磴蟠危崖虛巖啓雲竇疑是蕊珠宮點滴下簷溜

石壁

絕壁凌千尋却有海棠樹因想荷鋤遊或比桃源遇

石門

地脉逢蹊斷雙門據險開朝昏常不揜疑有至人來

山椒菴

一峯高一峯高峰起茅屋湖山繞屋多山人快幽獨

栖霞寺登眺

窈窕開初地嶽岑擁化城靈巖通鳥道紺宇接瑤京佛

嶺千形幻蓮泉細脉傾

寺有千佛嶺蓮花泉

雨花紛寶樹香閣捲

霓旌雁塔空中古慈燈望裡明村翁說遺事遊子展羈
情覓勝攀巢險登高度鳥輕日邊 雙闕麗雲外大江
橫拂袖烟霄迴飛觴鶴鶴迎行看天路近坐見海潮盈
長往堪逃世頻來擬結盟却憐歸去後愁逐暮鶯生

惜春口號

五城三市貯年華萬井千門樹樹花
親在故鄉身在國春來何得不思家

客途歲暮憮然興懷夢寐言歸寤而書感

終日思歸未得歸阮生心事與時違
愁中歲月驚仍恨夢裡家山是却非
六館得朋資麗澤尺書無雁報庭闈
窮途已逼青塲暮悵望雲天候日暉

烈婦篇爲杏村何公女賦

慕義片言重銜恩一死輕璧於泉下
合心與世間明張許堪同難冰霜元並清
貞魂含笑待指日寵書旌

送人還京師

風急高江起暮潮驪歌江畔客魂銷
千門楊柳催征旆三月鶯花伴使軺
燕士舊推臺上郭漢皇方待鄴侯蕭
如君直是丹厓鳳健翮行看奮九霄

客自秦還談故宮遺事因爲詩弔之

秦郊鹿走逐英雄禾黍萋萋繞故宮
繡幙金屏人不見空聞流水咽春風

孤坐三首

適晤安期叟言從海上回授書傳秘密
望氣樽前崑崙黃葉窺人墮青霞伴鳥來
莫言孤坐者株守是樗材
役役人間世忽忽度歲華誰能辭白髮
吾欲覓丹砂麟

閣尋常爾蓬壺去不遐試看庭下草已見長胡麻
海上無靈藥山中有至人病因知火候閒却喜身貧靜
極發天籟氣完生谷神仙踪休更覓此訣悟來真

夏日遣懷

華朝條炎候流景遷疑突代謝理則然氣機實靡竭小
窓足南薰芳滋未云歇灌木敷重陰雛鶯弄聲滑偃坐
狎羣籍日與魚豕許求羊不相過何況事公謁雨餘暑
氣清臨池坐超忽嵐潤翠欲浮始始淨林樾膝前流水
駛檻外崇山屹冥思意俱沉浩歌興遄發有懷詎能言
無名乃掀揭碌碌寰囂中紛紛笑俗骨寧煩賦四愁徒
爾營三窟山中陸羽茶樓頭庾公月有地藏吾真蓬萊
可晞髮不見郿塢金冰山共澌浹

蓬壺清曉歌奉次仲山年伯韻壽舅氏三徑翁八十
天墉之城帝座傍群仙飄飄雲錦裳蓬萊方壺渺何許
惟見扶桑若木交青蒼天雞三唱瑞氣揚初日杲杲明
東方中有真人煉九鼎黃芽紫雪烹爲糧俯視塵區不
可以寄跡直欲凌風御氣鸞鶴同相羊詎知興與廢那
記滄與桑無漏有真訣抱一非茫洋飢餐瑤圃之玉屑
渴飲玄澗之瓊漿嗟予樊籠尚羈束何能追蹤逸軌遺
世而翱翔絳縣老人四百四十五甲子更有靈椿千禩

堪稱觴招邀赤松侶王母周遊六虛隘八荒領括風月
歸奚囊吞吐元氣朝東皇

閉關四首

高枕不出戶區區難重陳一齋深歲月萬慮委囂塵林
叟安生死原思剖病貧琴書長日對只此慰沉淪
屏跡居城市冷然大隱心黃金任俠盡藥裹歲年深寂
莫詩千首蕭條風一林韶光荏苒過祗恐二毛侵
盛世春光好端居心事違門無題鳳客園有釣魚磯丹
柰披芸館細桃如竹扉年年花似舊故侶日應稀
坐看春色暮芳訊不相聞清夢迷花月浮蹤昵水雲

然株自守未得真空群却恠雙龍氣時能射斗文

隱菴為沐上人賦

偶尋名剎避歎蒸蒿隱逢師慮已澄愧我未諳僧是隱
願從耽隱學為僧

為釋東旭賦號

西土何人是大雄每從朝日契鴻濛還期得借秋陽暴
一照迷方萬劫空

苦熱

炎威何太烈病骨更難支北海杯應覆南州榻屢移詩
書閒侑坐棋局罷臨池心折燕山路當年馬力疲

秋至

山城一葉墮秋色到閭門日抱晴簷出風翻烟樹喧羽
書應絕寒禾黍已荒村謾訝謀非分他時經濟存

維舟金山送華豫菴姻丈赴闕

遠携兒女候行裝倚櫂中流思欲狂萬里海天開戶牖
八蠻筐篚會舟航漫憑烟樹分吳楚忍見征帆破浩茫
莫訝班生行色壯恩波元並大江長

閒適四十三首

塵世元如寄浮蹤此暫棲無為方是悟觀物豈能齊花
下冥蕉鹿尊前幻木雞蕭閒吾自適跼蹐爾何迷

高臥探玄化忘形事葆真寧求羶譽達一任馬呼頻阮
籍惟長嘯榮期本樂貧願持專氣訣永矢駐華春

池館經時變端居混俗情莓苔滋雨潤猿鶴啖風清底
用評堅白惟應寡送迎即看江海上應見少微明

萬事清閒好幽棲思不窮浮名山水外吾道酒杯中情
以刪詩適心因看劍雄平生無限意咄咄欲書空

無媒幽徑僻叢竹雨花斑五色瓜盈圃千章樹繞山焚
香坐終日揮翰了餘閒一棹乘風至人疑銷夏灣

簫條宮一畝魚鳥日相於頗類龐公築真成揚子居星
辰韜匣劍神鬼護藏書莫問升沉事年來只自如

荒園靜相依，劬書志不違。案頭東閣草，庭下北山薇。藝拙妨名盛，身貧幸客稀。從來觀物者，守黑是真機。懶性真成癖，窮年只閉關。風雲雙翮倦，今古此身閒。湖上東西灑，淮南大小山。倘傳方外秘，一爲轉衰顏。一雨衆芳茁，園亭事事幽。竹間怡鳳吹，溪上老羊裘。院靜似丹室，林荒非素侯。不緣愁與病，那得此淹留。若隣三市勝，景是一亭專。諷詠五千字，棲遲二十年。風塵堪涕淚，詩酒自山川。策足要津者，誰憐野性便。伯陵甘屏棄，予亦任清真。有道未爲病，無官寧是貧。龍謀竟拙調，鶴性初馴。一徑蓬蒿滿，惟應來故人。

返棹非乘興，冥棲是舊諳。青襟空老大，黃卷且沉酣。撫景歲年逼，逢人語笑慚。山中有叢桂，早晚事幽探。閉門張仲蔚，日日偃疎林。祗是愁難釋，因牽病屢侵。袖書空十上，駭骨自千金。積抱無能吐，誰應會此心。草野淹綿久，無心事遠遊。鳴絃羅洞小，散帙竹亭幽。風雨驚殘夢，雲霞上敝裘。區中紛變幻，寓目幾登樓。乾坤吾落魄，徙倚此園林。物物饒詩意，時時長道心。夢遊聊假寐，憶別幾虛襟。拚卷一舒嘯，冷然是太音。失計嗟身病，爲園喜宅連。林幽多異鳥，榻靜祗殘編。浪跡終期定，灰心或偶燃。何如守玄寂，長咏白駒篇。

龍臥仍江海雞棲復歲華莫言能遠俗猶是不離家五
絲戲偏樂數椽清更嘉寧知邊塞上日暮有鳴笳
跼伏幾經年雄飛詎偶然愁偏縈草帶選復愧青錢舊
雨歡難續窮途恨自牽欲將浮漢意長泛釣魚舡
世路一相失飄零誰復心含悽辭故侶孤室坐來深聊
爾耽雲臥行當起陸沉年華幸有待招隱未堪吟
撫景堪遺世閒心每欲飛謾爲三窟計且托一枝依倚
劍雙龍護揮琴獨鶴歸維摩寧是病爲報已忘機
鴛鴦衆方棄隙駒應倍傷風塵蓬鬢短海嶽草庭荒天
上青雲路人間白屋郎徒然懷獻納未擬賦長楊

早歲事趨庭窮年困一經未緣成豹變猶自學鴻冥池
浸墨花碧草翻書帶青幽窓無客話林鳥喚堪聽
三市人烟集吾廬趣亦偏古門依水岸喬木入雲天抱
膝吟梁父燃藜草太玄誰能來共此遺世事高眠
徑爲求羊闢門無車馬過披雲種脩竹拂石坐青蘿閱
世風波易論文感慨多試尋京洛主誰得似常何
謾訝春如海真憐谷似愚衡門無俗駕 聖世有清臞
霄漢麒麟閣神仙太乙都行戲渾未定祇合叩玄夫
塵世支離客憂懷詎可陳雕龍猶自愧夾日竟何因一
蹶名方掩三遷業尚貧終期罷巖築霖雨慰遺民

誰云幽館靜鳥語答孤吟詎是丹鉛癖其如微尚心倚
樓青霽聚穿徑綠筠深自信息機夕無勞懷漢陰
竹樹窓窓映花枝戶戶垂素封吾未得株守幸於斯魚
衍惠莊樂帖臨羲獻音無能畢婚嫁空有向平思
鼎鼎百年內誰哉諧素心一丘閒自適雙闕意徒深
行送遠雲度坐看馳景侵南華清可誦披寫對高林
蕭條門巷裏寂寞歲華過未就青雲計聊爲白石歌鄒
陽遊豈好賈誼淚偏多莫漫拋書史芸窓長薜蘿
逐物非吾好端居養性靈何辭類枯槁久已事沉冥觀
槿步朝野採芝行晚坳更窮高處目遠樹有雲停

境僻心能靜虛襟坐夜分池光涵露動花氣挾香聞院
宿金庭月林棲震澤雲倚闌渾不寐散帙待朝暉
莫愁機未息祗是性難虛獨與古人對能令塵慮除窓
前程氏易燈下伏生書至理倘有悟優游寧問餘
抱朴謝徒侶開軒聊自娛恣情披汗簡隨意貰村酤茶
竈烹雲潔松窓伴月孤遙思纓冕客此興定應無
空有策干主其如命不逢五禽聊自戲斗米尚堪春
於道愁窺管何能擬螭龍却慚班定遠投筆取侯封
倚馬才難售攀龍計未成緣源三畝竹負篋一經生郡
縣曾無刺兒童不識名愧非舟楫具空抱濟川情

飄泊已如此年華行復催停雲愁不極望氣志猶恢聞
欲投竿去時從相鳥來休辭常寂寞 明主或憐才
古慕夷齊義予崇陰李風三遷志未就九世業還同親
愛元無解提携務有終荀龍與薛鳳斯不負吾翁
抱膝東窓下無營意自歡鳥聲留野酌庭翠亂山冠蕉
葉經題遍梅花候使難夢遊翻汗漫幾夜訪騷壇
洛下淹遊騎山中事考槃荒畦行藥慣舊雨締盟寒掃
榻清塵夢携書伴澤蘭野吟頻扣角莫作飯牛看
至趣閒方得玄機悟始真有營非繕性無垢是全神雲
暗花龕影風清棐几塵平生遊俠侶那復往過頻

閉閣經年臥愁長與世踈思邊猶似馬忘水不如魚卿
月每懸興客星偏照廬優游何所事揮翰復揮鉏
挾策罷干 主高眠仍著書心超千古上帙富五車餘
草色迷青簡芸香散蠹魚從來四方志深愧似懷居

秋夜獨坐得舜峯姻丈芳訊

炎蒸宵轉劇一雨坐來澄鶴警荒庭露蠹投小院燈無
言還自省不寐只孤憑忽報來青鳥開械喜欲騰

贈高邑博維石次龔嘉興韻

經術清時彥官閒却揜扉草玄來問字撫景坐忘機鵬
力雲霄近陽春邑里輝徵書蕪報典早晚下 端闈

吳玄錢馬雞見贈侑之以詩次韻奉答二首
聞君移宅五湖傍筆札時時遣興長貌得朱禽兼賦至
令人詩思滿藜床

點染初成遠寄將翠冠堪繫五絲長携來日伴蕭齋坐
疑有啼聲午到床

續俞伯子集終

盛明百家詩 續俞仲子集

予仲子沂蚤遊成均遂好古文辭不復爲舉子業及
長又多病業屢徙焉究其終專以虛一靜篤爲主不
自覺其入於老莊也然學雖主於無爲而孝弟之實
終身允蹈有與生而俱生者讀其詩及感遇七十餘
篇槩可見矣予隱居北園三年不見其詩茲續前刻
強而後可隆慶己巳春忘言老人是堂翁再識
城東別墅

一畝築居新虛綠學葆真獨吟時引釣可以慰閒身
行園

寥落疎林澹夕暉清遊蕭瑟戀重衣漫尋幽徑娛塵目
猶有寒花傍竹扉檻外種魚投釣集雲間馴雀認巢歸
滄洲白石閒如許孤坐冥冥杜德機

觀太湖

川瀆南來此巨都天開形勝接三吳滄波總是魚龍窟
游氣應將日月扶幻術不存悲曼倩浮名那得累陶朱
壯遊莫遣愁懷惡野色荒荒歲欲徂

城東別墅

抱朴全身隱者心草堂幽寂繞重林家貧地僻親朋少
日暮天寒雨雪深種秫一畦聊釀酒荷鋤三徑每披襟

只今已是忘情久老大從教歲月侵

元日中園燕集

嘉辰集芳燕五辛具盤餐中庭列絃歌聊奉親友歡三
元布微陽旭日明林巒清歌事幽討蹊逕發叢蘭

湖中夜泛

遠水連雲映落暉蘭橈雙駕疾於飛怡然忘却風波險
明月高高露滿衣

送友人歸越

旭日東城下河橋送客時言歸去路遠惜別放舟遲坎
壘憐同業飄零感故知離懷不可遣長望一登陴

行園感述

草木頽枯榮年華易遷改占占富貴心浮生亦何追

餞別梅花下

花下開筵海月生笑談杯酒慰離情夜深客散主人卧
花自芬芳月自明

咏落梅

調如夢令

牆外有人吹笛牆裡落花如雪不道便飄零負我賞春
時節蕭瑟蕭瑟踏碎一庭明月

閒居

讀書固所好干祿非余情閒居愜真性優游娛此生

曉行南園登御風樓

入戶塵慮釋喧然群鳥鳴丹霞映林薄忻此春日晴春
日晴且寒積雪岩崕明岩崖互迴曲出沒紛崢嶸清溪
石欄橋磴道相縱橫橋平可垂釣水清思濯纓古樹多
變態怪石如奔驚石上側足度樹間接藤行東向登層
樓樓高俯孤城游目亘宇宙引領迷蓬瀛身從中天出
勢與五嶽爭還期御風去非復世間情

行園

中林媚春色多爲桃李枝蒙茸夾猥徑交加覆清池藉
此風日妍豈悟零落時埋沒蔓草中亦有蘭與芝棄置

固如是寸心終不移

東園梨花

每欲尋春未得閒
閒來春事已闌刪
梨花似雪開初遍
聊與遊人一解顏

勸客飲

花開花落暮春天
片月當庭醉可眠
富貴幾時人易老
豈能花月共年年

園居雜興

場圃乍晴芳草合
櫻桃初熟翠禽啼
忘情宴坐不覺晚
歸路月明烟滿溪

兩夜宿城東別墅

水繞城隅五畝家
野人生計有桑麻
梧桐一夜蕭齋雨
青鳳飄零滿地花

步至山中

憂來每說山林好
遁迹山林惜未能
今日優游郭西路
林丘山麓步峻嶒
風塵逐逐驚時晏
刈穫家家喜歲登
此去中峰有蘭若
畏人真欲傍禪僧

送別 調長相思

下西樓出溪頭
孤劍冷然事遠遊
行行不可留
解輕舟
東流紅樹青山
萬里秋悠悠
總是愁

山家 調風流子

勞生疑造化，輒坤裡人物競喧囂。願絕迹塵中，卜居山下，傍溪開逕。編竹鋪茆，草廬靜檻前，雙瀾出簷外。數峰高麥，飯布衣襟懷落落，華門圭竇。楓葉蕭蕭，尋幽時信步。漁樵侶喜聽朴俗歌謠。隨處晚風禾黍，楊柳溪橋。向村翁買酒，怡然歸去，閒吟細酌，容我逍遙萬古同歸。一夢說甚英豪。

食齋

寧辭抱瓮拙，暫免灌園疲。採採日方晏，青青春不遲。鹽梅非所羨，淡泊總相宜。不是夷齊蕨，何如四皓芝。

卧病有懷

烟雨沉沉春更寒，豈緣多病憶交歡。鄒枚逸思時方重，王謝風流世所難。藥圃爲生聊寄迹，林居無夢逐飛翰。疎簾寂寂西齋晚，零落梅花不忍看。

強起

強起因春色，西簷負日暄。會情留短句，抱病入新年。偏憐風塵下，支離藥裹前。時聞喧鳥雀，於我慰沉綿。

咏燭

虎下星月晦，庭前雲霧深。不惜捐微軀，向君明此心。

閨怨 詞如夢令

續命何事集 卷五
經盡雨花風絮望斷楚雲秦樹底事不歸來十載五溪
孤戍何處何處夢裡片魂飛去

自警

何時命之舛運兮時彷徨而撫膺吁雄心之欲折兮魂
夫人之面朋哀直道之斥絕兮惟嫵媚以相仍務詭譎
而俾進兮乃炫燿而驕矜隨俯仰如桔槔兮實非余之
所能思祛邪而崇正兮類拔劍而逐蠅何巧言之喋喋
兮與令色之繩繩秉孤衷而相抗兮柰紛紛而見憎惡
臂以當車轍兮嗟螳螂之曷勝宜息肩而屏迹兮弱吾
志而存吾恒擇林立而棲托兮枕清流而曲肱求無嬰

於世網兮衛微躬而戰兢

讀蘇季子傳

高位與多金機深禍必深苟云蘄可得於我亦無心

讀傅介子傳

持節逕萬里報國輕一死格斬樓蘭王秉哉傅介子

病卧南園 家兄以夏日間居之作見投敬次元韻

奉和

嗚乎造化者於我足唐突厥疾云弗瘳魄情神欲竭絕
迹茂林下雄心此消歇間齋赤日未野鳥聲滑滑慨茲
歲月促俗尚靡所訐而今亦何言夙昔醜干謁傷哉志

士懷俯首徒忽忽，援琴來薰風。隣樹過清越，心與死灰
等。身同塊石，屹念彼附驥。蠅時復一感，發又何雙。病翻
竟爾，盤餐揭無如。營丹砂，可以脫靈骨。且四五千言，希
微探玄窟。列子行御風，周生懷中月。天宮有玉童，富貴
輕一髮。長生求無涯，萬象借我沒。

王僅初山人見訪病不得會

懷我素心人一別，十餘載茲晨。忽來過嗟余，病方殆無
因。覲顏面空自憶，神采相見復何時。日月恐不待會少
多，別離形骸豈長在。

聞黃雀樓火

黃鶴高樓插空起，峭拔峻嶒信奇詭。夫何少小一登臨，
彷彿於今廿年矣。江流汨汨江風涼，江草離離江路長。
梁恩半冒星河影，棟宇先占日月光。當時太白槌不碎，
此日神仙竟何在。緣知萬物有虧成，莫是山靈解譎晦。
西齋坐月因感神仙之事，良父得詩。

氣蕭天高落日低，坐來清徹類夷齊。海中何處求王母，
浪說嫦娥是弄妻。寶訣不傳青鳳鳥，金光遙憶彩麟蹄。
遭逢未得刀圭餌，貧病年年重慘悽。

奉送家兄遊太學

乘時忽騫翥，萬里躡雲霞。去去天還近，行行日每斜。攀

龍人似玉獻賦筆生花金馬留方朔瑤琴得瓠巴別離
遊上國瞻望憶還家弱弟身多病 嚴親髮已華最慚
歸省日瓊樹喜交加

遣愁

調長相思

朝也愁暮也愁愁去愁來如水流去來無盡頭 名也
休利也休微利浮名起寇讐利名非所求

九日送人還浙

住向梁溪久來從越嶠賒半生長作客九日獨還家南
國江天月西風木槿花片帆烟際去望望發長嗟

書南溪醫隱圖

溪南子綦隱人境隔烟霞曲水橋通壑清陰樹掩家灌
園移短艇採藥過前沙定與仙源近春深有杏花

病中對雪有懷因以多病故人踈為韻賦詩五首

愁中殫歲月撫景惜蹉跎僵卧渾無賴褰帷抱膝歌芳
情與幽興不似向來多

雨雪已崇朝竹樹澹相映羸骨清以肅空壻皎如鏡不
有裹飯人誰憐子桑病

祛服臨前除寓目愜貞素茆齋絕塵紛雀下庭樹抱
病易寒暑微衰感新故

九十甘凍餓啟期樂其真淵明尚清節陋室安於貧咄

續前集 卷之三
咄前簷下依依念斯人

捫口毛髮立積雪盈堦除敝裘不掩脛那念良無魚貧
病窮歲月自憐生計踈

立春日作

陋室春回轉寂寥湖山久矣罷招邀梅花發處今非昔
愁慮胡然結不消多病却思盧扁術畏煩兼棄許由瓢
隨時俯仰情逾惡蹤跡真堪遠市朝

元日姚潛坤見過病不得會二首

經旬風雪暗湖天禊袂支頤思惘然東郭及門三正日
西齋下榻五經年有懷無奈身多病相憶空餘酒似泉

僵卧不知何日起白頭青眼共談玄

獨因新歲感蹉跎茆屋春寒雨雪多原氏肯嫌貧且病
子桑何意笑還歌交心久荷忘年重曳屣猶煩此日過
訪戴自知乘興至西風回首柰君何

正月六日胡鳳石見過病不得晤

十載相過不厭貧交歡况是謝家親思君忽爾來高駕
顛我其如欲盡身百歲流光俱是客一年明日又逢人
何當共坐梅花月歎息青陽處處春

人日齋居 前月十八日立春

高齋晏坐重太息擾擾百年哀此身胡云新歲才七日

續自序
一
條爾入春已兩旬梅花芬芳候雁返草木萌動條風淳
間居雖病亦自好况乃久甘西阮貧

金仙歌對丹客漫書不竄一字

形則以道全命則以術延長生有真訣古語不妄傳至
人識衆妙達士求先天戊巳歸一炁上下合兩弦流戊
以就已上坤而下軋靜翕則動闢動直則靜專偃月耀
光彩流珠亦周旋候視有盈縮吐露法自然黃庭會五
氣尾閭朝百川優游巡轆轤上歷崑崙巔前降而後昇
絡繹如轉圜還返竊造化任督相勾連得一萬事畢名
之曰金仙閉錮三百日面壁仍九年積功以俟時德成

茂罪愆茂罪愆大休歇謝却輪迴未超脫向來憂慮悉
蠲除無復寒暄與飢渴膺錄受闔朝玉京金書玉簡遙
相迎皈依倏忽辭下界跨雀御風遊太清遊太清辭下
界從有入無人莫解五行攢簇四象合煉氣化神長不
壞長不壞壽無疆昔聞此事誠荒唐玄言奧旨不易識
下士大笑如聾盲如聾盲隔視聽寧與鄙夫談至聖嗟
余淪落塵網中三十五年貧與病貧與病學無為顏闔
固窮心不移麤衣糲食樂吾樂真惡富貴非余誰非余
誰拙可藉上善若水水居下浮生事業不忍談言行乖
違醜狙詐爾為爾我為我任爾呼牛與呼馬我則無可

無不可無不可意自平富貴榮華一羽輕彼棄我取性
與命我棄彼取利與名利與名歲禍患能使至親成大
怨獨存一念守規中壹是委之良勝美良勝美絕愛憎
物之不齊物之情人各有能有不能有不能甘蹭蹬屏
迹衡門樂清靜邇來欲覓生死根日把道書閒究竟閒
究竟一何幸了悟上乘如對鏡閉箴三寶謝紛華總攝
五官脩性命脩性命無所爭君子素其位而行惟精惟
一而已矣允執厥中亨利貞亨利貞心了了稊米太倉
形至眇榮枯得失竟何為矧余自是傷弓鳥傷弓鳥驚
餌魚身在何妨此索居豁違愛尋高士傳扶搖思執化

人祛意叮嚀言反覆衛汝滿堂金與玉勿教役役戕汝
生喜怒哀樂愛惡欲愛惡欲劇鳩毒虺蝮螫于則斷于
虺蝮螫足則斷足排患難杜德機六十四卦探玄微只
今旋入無何有不識人間是與非是與非每顛倒非是
是非歸一笑惟將真宰候神明子午屯蒙循竅妙循竅
妙慎行持踵息開關與立基在家出家教所謂無欲之
欲世罕知世罕知如夢寐死絕生頻替代可憐相繼
塚如林一失此身那得再那得再亟為之採藥歸來秉
道樞何當齟齬如如境自爾逍遙事事無事事無名大
道茲術世人良至要有生微此終成空誰見老來能更

少慚余踈劣慕玄真寄語人間富貴人朱紫有年心未
退金錢無筭尚愁貧縱使百年稱上壽落髮踈皮肉
皺吁嗟來日苦不多行盡若馳曾莫救曾莫救漫悲哀
富貴榮華安在哉門前桃李銷春色泉下衣冠掩夜臺
掩夜臺何所肖旦日相歡暮相吊他人入室勢固然有
子傳經孰能料孰能料君勿疑寄語語君君早為長生
真訣無多語只在東西與坎離坎離交龍虎應咫尺仙
凡分逆順逆則成禍順則凡人皆可以為堯舜餌得刀
圭詎可論功成行滿會騰鸞周流上下無罣闕九祖認
昇庇子孫君不見亘古來千萬世一一神仙留傳

胎冲舉闡玄風拔宅飛昇著靈異著靈異伏丹砂煮石
分杯頃刻花桑田變海身長在蓮葉為舟棗似瓜棗似
瓜龍是騎濟物利民仁與義非從天降與地出亦是世
人之子弟之子弟學長生志決功多道亦成炁作萬靈
形作幻散為一炁聚為形言可徵匪無據旌陽斬蛟記
鐵柱當有地仙八百人雜出五陵此其處此其處此其
時千二百年方在茲將來四十有八載即是群仙際會
期際會期倘可冀至道須知一生二萬物芸芸人最靈
伴獲此身毋自棄毋自棄莫蹉跎猶豫其如老去何不
詣正理由邪說空自勞勞益障魔益障魔千里繆直道

綿綿非逕竇三百六十合周天既未也蒙符火候符火
候十月終令子三遷造化同生生有道無窮盡口口相
傳頃刻中又不見周與冷尹與張近自我 明遊帝鄉
當時 天子恒賜見却似癡愚又似狂又似狂又似
黠一動一言人叵測紛紜變幻不可量刀鋸莫加除障
厄火不焚水不溺氣歛形消入金石不變不易無成虧
混沌鴻濛歸太極歸太極滅踪跡海宇茫茫求不得誰
謂神仙事渺茫分明傳得神仙訣神仙訣妙難陳秦皇
漢武豈其倫不識親踈與真偽大都祇是百年人親踈
混真偽隣真其偽而偽其真親其踈而踈其親踈其親

何所倚鰥寡窮居斷生理由之似是而實非况復處之
荆棘地舍易圖難相彼此相彼此靡所恃舉世弗成良
有以望之不得其涯涘反謂有生必有死吁嗟乎反謂
有生必有死必有死日易過流俗迷漫訛更訛莫待途
窮方稅駕不辭繭縷向君歌

元夕

春城何事有喧囂月白風寒攬散韶學道又諳無欲貴
不知今夕是元宵

夢過城東看梅

常憶東林老梅樹兩年與爾罷交懽踈枝亂發疑殘雪

續前集子集 卷五
昨夜分明夢裡看

山茶

形如刻鏤色如繪濃艷偏增細雨中開向歲寒君解否
不將桃李妬春風

童子拾得玉蘭花瓣玩而賦之

瓊枝玉樹豈關狂想見烟霞海上山白似截肪香似麝
天風吹落滿人間

齋前海棠柯條落落花才數朶感而賦之

愛看名花手自栽那堪病骨轉摧頽豈緣寂寞春無主
自是含情不忍開

憶城東杏花

當年青眼對花明小苑春風樹樹榮我欲學仙因憶汝
東方元是歲星精

有談佛法者詩以曉之

好善而惡惡古今同此情如何髡首者輕重而重輕釋
教被中土肇禍實漢明身死國亦滅拙哉楚王英爲善
乃最樂胡不如東平

養生

吾知玄冥中有藥大於黍生化合畧刻採摭謹時序日
月相炳煥水火互烹煮服之通神靈面壁擬冲舉可以

入金石不復苦寒暑郢客歌陽春伎絕寡儔侶每爲下
士笑彼此殊取與鐘鼓樂燕雀車馬駕懸鼠至人有至
言鉗口不得語

春日病中四首

檢曆知春半已饒鼓歌還藉女夷調東風萬物生顏色
何事偏令病骨銷

數椽茆屋寂無春爲憶桃源好避秦渾似燕山寒谷裡
不知吹律藉何人

閒居僻性自相宜多病年來起更遲靜裡倉庚啼
可憐春日載陽時

鷓鴣悲鳴日影遲青春又值鬪花時獨憐憔悴巖居子
把鏡踟躕重可疑

燕至感述

真宰涵濡化機無何物換人非只有梁間燕子年年秋
去春歸

病中讀史感述

萬物何職職悉從無爲殖人生於兩間靈異固超特盤
古開混沌羲皐逝消息念彼太古民質樸無淑慝鑿井
以爲飲耕田以爲食內通而外平何有於帝力唐虞及
三代綱紀彰法式桀紂隨滅亡四凶有竄殛賢愚係興

廢否泰豈差忒周孔乃至聖湯武亦盛德凌遲及春秋
敗壞由戰國斯民斃縱橫吾道紊揚墨宇宙劇災眚日
月相薄蝕諸侯盡隳瞽士庶轉簧惑赤帝斬白蛇應運
起亡匿頗類商與周九土聊拂拭唐宋紹其統擬議有
慚色下上千百年間亦屢通塞淳風日遼遠蹊逕逾偏
側恭惟我 皇祖直與堯舜逼德業光四表繼天以
立極文命被遐徼禮樂昭典則億萬於斯年元氣實天
植沂亦草野臣歌頌伸 得微躬亦何幸罔此仁化域
傷哉環堵中貧病罹孔棘引領黃金臺不得奮羽翼日
暮扃衡門感歎淚沾臆

清明

春光欲暮日行遲風俗清明戴柳枝花鳥不知何處
只教添得歲時悲

初夏述懷

林卧病弗瘳感歎節屢變開窓來薰風檐際拂雙燕碧
落疑白雲遊絲罥花片對此情亦嘉甞勉事筆硯新句
忻有得淺薄聊自見抱拙象帝先福僻豈在猶榮華與
道德久矣罷交戰處常以待終富貴非所羨

送人還閩

才得相逢又別離片帆南去使人悲平生况有烟霞癖

便欲隨君到武夷

病中王李二術士至遂書其扇

落落人間三十餘年來轉覺與時踈知生未得焉知死
學圃無成更學書文摯漫攻龍叔病鄭聲寧卜屈平居
芸芸旋入無何有竹几方牀日宴如

七夕

水邊臺榭白蘋秋良夜迢迢暑氣收漢武神仙空月色
阮咸兄弟最風流雲中暗度青鸞駕天上相逢白玉樓
巧拙不須驚寵辱單居寥落使人愁

月夜

避俗親書卷閒緜秋水篇晚來雲散盡天際月初圓子
美愁難破相如病不痊有身真是患搔首意茫然

秋夜

調燭影搖紅

天地依然年華今古頻流轉掉頭春去又秋殘往事今
誰見閒把身謀尋遍富與貴誠非所羨良田美宅駟馬
高車底須留戀 大道玄玄此生百歲空飛電太初無
我亦無名何事多遷變世態令人厭倦塵境裡幽居自
便晚來孤坐風汎叢蘭月明深苑

竹軒詩贈人

東郭構層軒周遭十畝園蒙茸萬竿竹窈窕隔塵喧白

日不到地清風常在門幽居無一事羅列長兒孫
送日者還成都二首

八千里外送君回十五年前賣卜來此日正當鴻雁至
到時應見海棠開

年少擔簦萬里遊世人求爾爾何求只因傳得君平業
白髮還家爲爾愁

無雪

風急晚颼颼匡牀攬敝裘祗云寒有雪不謂雨如秋竟
阻王猷興惟添杜甫憂春回臘欲盡占候野人愁

除夕

又是一年盡年年不盡愁微茫滄海上何處有丹丘

斷酒

神禹拜昌言而復惡旨酒惹哉後世人歷歷武其咎嗜
嫌陶令癖趣豈桓温有我欲觀又生飲氣濯塵垢兩年
持戒心一滴不入口自爾明六根萬物總芻狗

寫李南城號圖遂題其側

隱居奕世城南得姓元從老聃日與此君爲侶時招上
客清談僻性不殊黃九苦吟何似陳三我欲卜隣於爾
塵網實非所堪

燕至

一室三年卧草莱年年春色不曾回空梁冷落塵花滿
那得雙飛燕子來

憶城東梨花

東林有嘉樹惟彼斧斤厄因之結藩籬場圃稍開闢擁
腫大十圍婆娑高百尺頗宜馮異坐雅稱謝玄宅日暖
香氣生春盡苞始拆附枝鬱如蝟花發皓無隙翩然雲
欲起皎若雪乍積黃鳥競熠燿粉蝶難別白風動相參
差月出滅踪跡聞者遠近至見者恒嘖嘖造物豈無意
愜我好竒癖於茲忽三載抱病營藥石待盡一室中咫
尺遂離隔每及春歸時念念懷夙昔却笑生死間顧此

復何益時序日以往我形日以瘠跌坐北窓下擊節重
悲惜

負暄

江南二三月此地獨無春晴日茆簷下依依病裡身

病中作

謀生豈緒餘常道本冲虛一榻身如俑經旬髮不梳賣
文供買藥株守羨鶉居造化浮休耳窮愁學著書

讀莊子

一卷南華坐曉窓玄玄老氏古無雙能令病骨生春色
自笑雄心不早降

病中雨夜不寐

人生忽忽幾悲懽得失紛然思渺漫抱病有懷三歲矣
踈燈無焰五更殘華陀莫解施工巧列子那能借羽翰
憑裡歲華高士傳夢中湖海達人觀牀頭飢鼠窺空橐
戶外鳴梟擬蓋棺每畏群輕堪折軸豈緣先達慕神冠
兒童檢曆時方改稚子傳經意亦寬富貴自來輕玉帛
返還誰說餌金丹終宵滴瀝空階雨布被支離木榻寒
生寄死歸恒爾爾如何猶有淚闌干

咏扇

自是天邊月周生手內持須知未盈處即是已虧時

獨坐

不爲折屐謝公何況投閣揚雄游心已超物外此身猶
在夢中

齋前手植桃樹迄今三載尚未有花立夏日雨中獨
坐玩而賦之

何事栽花花不生三年今日又朱明春光欲去那能挽
草木無知豈有情烟雨淋漓侵戶窄枝柯條達與檐平
靈株莫是蟠桃種直到三千歲始榮

燈花

彷彿星星出自然須臾粒粒向人懸烟銷結作二蒼字

火底生成太乙蓮零落不隨風汎汎芳菲寧共草芊芊
殷勤未卜將來意又入黃昏伴草玄

祈雨有雷

蒼黃霹靂傍檐楹掣電凌雲隱隱鳴却怪卧龍驚不起
憑誰將雨濟蒼生

病中楊秀才携具見慰談玄夜坐即席賦詩七首時
余斲酒者二年矣

三年無客到幽居何事親交病益踈惟有多情楊伯起
只今於我自如如

一卷黃庭語未終緣知微妙與天通傷心病骨今如許

可得逍遙共爾同

底須杯酒慰蓬蒿獨醒何曾愧二豪五氣三花談至理
對君渾似飲醇醪

荒齋秋半似春回載酒非關問字來萬事不如無欲貴
十年今見好懷開

虛窓曲席夜談玄紅燭燒殘月滿筵七返九還諳秘術
存三抱一理真詮

皎皎流珠欲去人萬金神劍不沾塵何當謝却人間事
收拾桃源洞裡春

何時病骨起衰殘聞說長生有大冊清夜細論情自好

不知明月上欄干

秋夜長七十韵病中送楊秀才游仙因謁孝豐吳石

岐公

秋夜長殊未央東林月出滿屋梁清風習習來中堂
敝裘兀坐增慨慷余實顛蒙同混茫二十六年游義方
百家羽翼墳典彰仲尼駕說名教昌讀書談道金玉相
四十萬言存紀綱遭遇盛世如陶唐事事錯迂悲參商
始覺此身為我妨昔時意氣不可當學詩學禮十五強
衆中落筆驚輝煌下視一世如糝糠放浪不逐群龍翔
用之則行舍則藏浮生得喪那可量片言摧折志士腸我

之不遇非臧倉令人却憶陳思王邇來憔悴病若狂
造化小兒亦見殃乃知思患失豫防豈有二豎居膏肓
致使百脉紛垂張千二百日半在牀遂爾棄世攻老莊
吾道戰勝物欲亡睥睨富貴輕毫芒矧以寵辱為低昂
楊君爾亦丈夫行少小優游翰墨場四十五成文章干
祿羞渠執戟郎憐君自是孤鳳凰肯與衆鳥相頡頏
卜居學圃臨陂塘一畝之宅樹以桑時乎拂釣歌滄浪
即其位而樂其常甘嗜淡泊如膏粱種竹栽花結草堂
簞瓢陋巷神揚揚玄竅妙識中黃離世異俗無匆忙
一念自衛如金湯上德不德超羲皇江南八月桂花芳秋

氣蕭森泛一航道書一笈菜一囊寶劍蝕月搖光銍雪
溪南下茗溪傍烟樹歷歷雲泱泱去若得逢吳剛白
石為飯瓊為漿仙凡隔絕毋相忘還丹倘得分餘光更
乞萬斛返魂香盡起枯骨同春陽古來離別多感傷東
西去住生淒涼孟冬之月日在房為道此時歸故鄉趣
駕勿令三徑荒間關道路饒風霜端居日夕遙相望端
居日夕遙相望

題畫

灌木繞村墟幽然愛爾居諸山遙入戶一水暗通渠地
僻無塵鞅人間把道書藩籬蔽曲折斟酌似吾廬

一儉積堂失去雲林山水一軸余以時畫一軸賠補其
處旋又失之至是詢得其人既往不咎付之一笑而
已漫成此章

縮地山重疊叅天樹幾株升堂忽不見四壁轉清虛漫
訝同蕉鹿番疑飽蠹魚潛來一已甚將去并何迂顧虎
癡還絕攘羊笑不虛存亡奚必較爾我本無殊腐鼠猶
梁國斯湏况此乎

題畫

青山林隙路白屋水邊籬有客抱琴至令人憶子期
秋夜偶得二百五十字

人文輯昭代冠蓋繼行列俯仰徇榮利爵祿靡後傑儀
禮雜真贗往復苦出屑金多結交易勢重炙手熱先鳴
習鷄鬪患得效鼠出桐桃李妬華美荆棘紛挐跌擾擾迺
欺誑鬱鬱深愧切出身有鑑戒守黑罷申說智圓而行
方捫口以結舌畏人學佯狂處變思珮玦拂袖歸空林
屏迹謝危轍心已若灰冷性亦似鳩拙歛華以就實垢
膩時別挾折節讀道書衆累咸撲滅因搜五禽戲兼得
九還訣動靜洽後先卦象有陳設不顯亦不晦或作而
或輟著述慚鹵莽墳典藉提挈餬口日一飯蔽體衣百
結寸心向誰語獨行非自別在牀彈五絃倚柱歌一闋

秋聲重淒楚旅雁亦幽咽夜久風蕭條天寒月皎潔徘徊
細樂間曠箕踞愛清絕誰云輕富貴聊以安蹇劣

古風七十四首

歲月恒替代人事迭廢興禍福相筒伏好惡殊愛憎易
乎旣已逝孰辨淄與澠念之使人懼閉戶學茂陵寧為
西尾龜莫作嗜汁蠅載誦五千言至道何恢弘控銳而
解紛渙兮若春冰賢哉曹子臧違節非所能失節固不
敢守節良可憑昭昭吾誰欺斯語堪服膺先聖惠苟得
筆削垂勸懲

龜勉振頽俗禮讓實可重子良讓於鄭茲父讓於宋惟

善以為寶厥德亦邁種賢者操則存愚者舍則縱一沾
西伯化虞芮輟其訟

泰伯乃至德讓國而順親亡匿來荆蠻志決意自真示
以不復用斷髮文其身爰及千載下仁風裕斯民瞻望
如弗及余亦思效顰

一氣太極先混沌無澆淳陰陽肇開闢而有天地人生
化益繁夥庶類何紛綸三百餘萬年移世逮獲麟與奪
立綱紀尊卑正彝倫誰識孔仲尼天縱實聖神有德乃
無位設教庇萬民百代以為準一貫無異論凡有血氣
者莫不知尊親余亦誦其言五内生陽春

迤邐委巷中陋室掩蓬戶草草圭竇間不足蔽風雨豈
有儋石儲何以慰貧窶使者問顏闔奉幣入環堵善言
給使者拜至不復覩聊以道自娛肯以身自苦胡為石
季倫鬪富甲中土一日遭喪亂跼蹐就俘虜乃曰利吾
財於是竟何補一富與一貧的的有所取貧乃士之常
富者怨之府

公鉏不違親知雄守其雌得喪事既往蓄愠徒自危謹
恪供乃職強勉克爾私善乎閔馬父於是實誨之臧紇
豈不智見遂誠在茲要君竟遺臭逆旅無還期君子則
不然順事而恕施

衆草凌孤芳皆醉慮獨醒懷玉而被褐衣錦則尚綱敢
曰志於道守已良獨難惡衣與惡食齷齪聊自安不見
鄭子臧身妃聚鷓冠

三郎起藩臬遊樂厭萬機寧無色荒懼寵幸一貴妃姊
姊盡封爵奴僕皆輕肥致令安祿山出入黃金扉醜虜
竊覬覦昂畢犯太微天下忽破碎羽書日夕飛艱難
魚國衰謝僅得歸道逢孔父妻美艷生光輝攘奪
憚妖冶世所稀身喪禍及君白日昏陰霏宋督
嘉亦任其非傾城與傾國難免後代譏關雎乃風好

慎閨闈

南山若虎踞西山若游龍山下百葉花山上五鬣松花
落異朝夕松老無秋冬花以色自銜色衰竟無庸松以
節自高不改千歲容獨愧五大夫汚彼呂政封

傷哉穎考叔念之豈不賢片言感莊公母子獲全忠
孝翁君親鄭國賴以安及其伐許時車卓見何偏怨固
不在大生死實係焉執旗以先登子都射之顛事去恨
不滅使我心茫然何如雲林下抱朴全其天

古人重不朽尚志學聖賢今人重出俗相啻綠君
子坦蕩蕩用舍法自然小人長戚戚患得患失焉種德
莫如滋窮困意益堅去惡莫如盡克己而勉旃去惡若

去稗種德若種田穠藂之不輟終當獲豐年

皎皎雙白雀飛戾中天仰望雲間翼不見雀上仙高
岡變深谷東海為桑田榮華若朝露於我何有焉願得
不死術傾心事幽玄

荀營德鄭賈如實出已者賈乎去之齊慚愧寧是舍我
則無其功收以恩自假倒戟脫趙盾翳桑之餓人欲以
問其處亡歷不自陳去去復何顧報德意已伸

注矢殺建成代父有其國豈知天倫愛魚肉以寵逼駘
驕乃如此無論奪之貪古學心務本善教不右直於是
兩失之何以為則式譁譁骨骸之墜落悴顏色翩翩鵠

鷓鳥狼籍摧羽翼生者乃遺臭死者由自惑顧望遭族
滅蜚遞庶為得安知不為狼使我淚沾臆美哉呂秦伯
孔子稱至德

項籍欲東歸韓生說之止善策不見從沐猴而冠耳霸
業都關中為人豈不美危言以賈禍自為乃如此酈生
下全齊魯不費一矢韓信乃襲之因以雪其耻千慮而
一失誰謂以智死吾愛魯仲連出處善終始

白日下西山明月出東海來去若跳丸忽忽千萬載生
人始於寅混沌訖戌亥人為萬物靈造化合直宰其如
百歲中老去不相待無因駐顏色何必居鼎薦榮華豈

長有富貴實危殆韓彭徇功利束縛就薤臨夷齊尚清
節白首甘凍餒孰若兩釋之荷衣紉蘭芷素其位而行
踪跡無定在放浪山水間捷給歌歎乃不顧身後名庶
免噬臍悔寧為下士笑莫負懷璧罪

齊侯患膏肓而曰不食新菘茲桑田巫明術殃其身負
君以登天言夢及小臣閉兌而示拙可以全吾真
年華換人代顏色非昔時風吹落花去不復還故枝花
落豈足惜春歸猶有期人老不再少後後將何為
北山有愚公東谷有智叟愚智吾不知澹泊聊自守愚
不欲自用智不任掣肘猶豫者久之得一得解其紐

父與夫孰親先後有義理雍姬意未釋商之於母氏人
皆可為夫父則一而已殺夫以活父輕重實如此緹縈
倉公女上書漢天子徒跣望九重懇切代父死為子止
於孝千古彰懿美如何沛公者悖逆竟如彼高俎置太
公殺之須臾耳至有分羹言曾不若犬豕

為國有常刑杜伯將何辜結交不愛死伊友曰左儒於
王實爭之九復心不渝而言既不易無罪卒見誅儒豈
苟生者慷慨與之俱吾知晉與鮑易地當不殊中道忽
參商耳餘誠鄙夫

吾生苦憂煎墮落在塵劫晨興每搔首夜卧不交睫三

日讀道書恬淡意頗愜忽若有所悟於是圖卒業莫患
仁不富湏識勇能怯律已玉一班貽子書一笑去去覓
仙侶五嶽恣登涉飢則飯松栢寒則衣木葉苟欲超彼
岸從此理舟楫

鄭裒剗楚姬愛友匿兵鎧逢吉逐韓李狡險殊可畏嗟
彼何人斯而得容覆載敏於詐教誘賢者遭誑給胡乃
蒙報施欲以問真宰吾日省吾身自是有餘罪飲之以
甘泉溺之以苦海少壯不自立老大徒自悔明德而日
新所幸身尚在無友不如已過則勿憚改

成立一何難從善乃如登覆墜一何易從惡則如崩三
十有六年改過實未能脩身以為本持守而戰兢
聖人無全能天地無全功竒偶異得喪嗜欲多雷同下
士驚寵辱達人執其中萬物有成笑智術徒匆匆劉季
固龍種楚漢勞相攻趙克代周昌先見方與公文帝託
夢幻富貴一嬖童相有餓死法不得私鄧通所以君子
人樂道而固窮

上古無澆淳海內不足治中古訖三代至治有仁義爰
及叔季世上下交征利金多薄親戚奔走徇高位無德
而有之內省蔑顧息易曰負且乘因以致寇至磊落天
下士隱居以求志

絲竹傳子集 卷五
白日出暘谷明明麗中天萬物一瞻卽容光必照焉陰
靈忽障暄雲霧方油然誰能誑風伯洗滌繩其愆於以
清六合蕩蕩而平平

行藏旣不易用舍豈不難寸心報知己倏忽生波瀾晁
錯方盡忠必使劉氏安衣盜讒殺之得以成其奸鄧公
白其事死者寧復完使我千載下言之重辛酸却羨彭
澤宰三月而掛冠容與草野間貧賤能自寬

三女旣奔密社稷隨滅亡天子且不堪小醜何足當受
之乃不獻違天背君上賢母見甚明親訓茂義方先聖
不我欺神禹戒色荒

前日雨霖霖湖天渺無涯短褐不禦寒蕭齋重凄其昨
占旭月初晴光照簾帷鳥雀競喧噪燠若長夏時今日
登西樓極目東南隳疾風驅浮雲拂拭靡子遺明日復
何似顯晦不可期人生天地間枯榮亦如之昧者固不
識悅偶而惡奇明者達至理所寓恒坦夷

卜筮兆吉凶筮短龜則長獻公乃溺愛嬖姬遂為殃嬖
佞相賂遺媒孽何多方兼之二五耦皆室終墮傷士為
有良策善言甚之亡巾生不違親孝道益以彰得喪曷
足顧生死理之常所願奉君歡歲歲樂未央

陋室飯粗糲實宜於考槃讀書是牆下切切尋其端思

惟聖人言不啻親芝蘭食不必求飽居不必求安所願
菽水間斑衣奉

親歡

毋不敬小人恭已忍其垢林甫嫉九齡幾不免虎口無
心與物競遜言以自守子儀見盧杞而獨屏左右貌陋
者心險處之以謹厚誠哉聖人言見惡人無咎

碌碌復碌碌人苦不自足求田與問舍得隴又均望蜀湖
海饒風波道路多屈曲參商競錙銖色肉劇鴆毒念之
越辛楚肝膽何局促吾生浮漚耳胡乃自桎梏知自守
其黑知榮守其辱澹兮似若存舍此非所欲

先聖疾巧言復曰惡利口青蠅點白璧禾黍雜稊
家武皇帝英毅鮮匹偶一惑江充徒猶豫不易剖忿恚
竊父兵太子一何苟愚者乃咎人賢者必自咎伯竒與
申生不辯亦不走殺身以順親胡不可之有身死豈足
惜悖逆良可醜充也何所利族滅異身首高高望思臺
臺毀恨不朽

察察者不明行行者多過片言啟其黨衆口相附和剛
甚勢必折於是殺宋座漫爾思及之令我心膽破處之
得其當慎靜勿怠惰悅而懼不繹克已日自課因慮骨
易銷遂使面可唾貴實莫貴名好學莫好貨六經恣探
討一室堪坐卧柔弱可長久闡茸任其漚吾道法自然

故能成其大

中夜不得寐悽然擁孤衾踈燈照虛室揮手調素琴當
春召南呂林木殊蕭森矧茲貧病日披拂多哀音激微
變夾鍾淑氣何駸駸豈以憔悴質於焉莫能禁命宮而
揔之一一澄余心高山仰止間流水清以深因憐廣陵
散廢絕不可尋

先軫黜狼蹕狼蹕赫然怒以之赴秦師得所復何顧善
哉勇而義果決知所務華元享於士羊斟乃不與因之
快私忿出入重所御於民以弱國疾惡寧爾恕存者胡
為乎死者獲其處蹕也善必彰斟也惡亦著

吾聞賢達士善為子孫地積書未必讀無乃擁虛器積
財未必守勿念身後利愚則益其過賢亦損其志必曰
如之何積德庶幾是

假虞以伐虢虢滅虞亦亡貴貨不貴德受賂卒見殃美
玉產垂棘屈乘豈不良鮑魚食豚餌犬豕狎虎狼覆水
不再收棄置如糞糠獨有宮之竒去國增悲傷

胡亥乃極愚人頭而畜鳴慕位逆父命矯詔戕其兄殺
身望夷宮社稷條已傾所利竟何有愴惻傷余情無如
任閒曠守黑韜其精恬淡有真樂曷事富貴榮卜居雲
山下宛然葺蓬衡青山滾滾來白雲冉冉生抱膝日危

坐曳杖時獨行曾無得失念豈受寵辱驚愚者昧已著
智者見未萌延州來季子棄其室而耕全身以遠害君
子無所爭一意不可奪千秋垂令名茫茫天壤間孰能
與之京

徒聞父生術未遇却老方在世百年耳人苦不自量齷
齷徇功利汲汲如病狂意思而力爭髮短心甚長持盈
莫如已多積者厚亡竇灌卒受戮楊惲亦見殃吾愛陽
城侯明達不可當抑損而自守以繼劉辟強

比干豈不仁洩冶豈不忠直諫遭殺戮世喪道亦窮念
彼蜚遜者千古揚清風至今五湖上想見陶朱公

日短而後長月死而後生陰極則陽復士困而後亨留
侯負意氣志廣事不更狙擊始皇帝報韓終不成一逢
黃石公納履移其情三試而教之千古垂令名

物各有其性志亦不可移鳳不食腐鼠龍不生溝池鴻
鵠念高舉燕雀那得知所以王仲翁誇寵於望之

陳平畫奇計而以匡漢室自曰多陰謀不久當廢黜李
廣卒自刎寧復對刀筆誰謂數不偶亦有殺降失天地
職覆載太上貴守一是故忠於主而不免見疾况乃賊
仁義得志於隱密上帝實鑒汝何以逃白日

孰以羽為輕積之可沉舟孰以鞭為少投之斷江流衆

毀易銷骨片言成釁讐崇侯譖文王而有妾里囚絳灌
嫉賈生昭代不見留浸潤互媒孽依阿相比周吁嗟聖
賢徒遭遇罹百憂矧茲後世人羔袖於狐裘知難而不
退寧免三至愁無庸惡讒佞莫善於自脩嗒然罷將迎
專氣以致柔

卞和何為者明足以識玉所遇非其時而乃不自燭枉
道以從人汲汲蒙拜辱無乃不如葵葵亦衛其足痛哭
而後明於是終莫贖退不過貧賤進則罹慘酷與其學
畫虎莫若效刻鵠

吉人之辭寡喋喋將何為誠不如守中聃也百世師

哉三緘訓復有孔仲尼多言惑時中天道不易知裨竈
欲襍火子產恒折之火亦竟不拜術亦非不奇是故君
子人義理惟其宜

秦國有善馬亡逸以及岐岐下三百人同得而食之穆
公不之罪賜酒益以慈貴人而賤畜理則當如斯無何
韓京戰藉以脫其危

慢語適兆禍徵舒恚而嗔染指子公怒異味曷足珍豈
以有上貴嬉戲戕其身抑亦君不君致彼臣不臣三復
子犯言所寶惟仁親

所志在勲業哲人固非常能不念舊惡處柔以克剛夷

吾射小白幾至於殺傷而乃授之政齊國日以昌諸侯
遂九合天下賴一匡重耳始播越鳧須竊其藏因以遭
困頓乞食於道旁及乎返國時來歸布其長不獨赦其
罪乃復加顯揚任賊而用盜計勝怒者強項籍已富貴
亟欲歸故鄉一聞逆耳言韓生任其殃陳涉傭耕者起
為張楚王慚志殺故人狹隘終自妨不記貧賤時而曰
無相忘一朝出泥塗吞噬若虎狼於焉不能久怒勝計
者亡

代有傾巧士恐懼不敢談指鹿以為馬朝四而暮三余
實蒙昧者若此非所諳寄迹受鴟嚇微躬畏狼貪守已

慕清節粗糲誠所甘隱約遠華薄典墳事幽探括囊息
衆累抔土營一龕勵志於道德悅繹而研覃昉悟遠由
近無異青自藍昔人貴忠信我以為指南片言感知已
朱暉報張堪勿謂一節少中心幸無慚

寒暑互來徃日月相晦明第恐老將至幡然學無生恒
慮滿必覆善哉困而亨我心不可轉防意如金城無庸
美田宅奚必垂令名此身非所有天地之委形杜門忽
五稔養性捐七情瞻望伯陽子思惟歲星精願言餌靈
藥以冀朝玉京

殺盟以徵亂伊戾惑宋公可欺以其方市虎三至同穆

叔悅豎牛上下遂不通由是殺二子身亦弗獲終季札
藥石言可否傾蓋中妖夢何見誣楚丘術亦工

遭遇豈偶然茫昧不可道顏子竟天扎原壤乃壽考龍
逢反加戮盜跖死於老為善者疑懼造物何草草多岐
昧攸底余心怒如擣得喪遽如許辨惑湏及早側聞神
仙輩蛻迹往蓬島履歷千百年顏色越美好浮生血肉
軀昕夕異鱣薨勿種東陵瓜試覓安期棗上經示深旨
次第劇探討揮霍釋九愁事業統三寶造詣由下乘跌
坐學枯槁

眇然寓而形何以異蟻矇而乃事機械曾臆苦填海
事得丹法令我認鉛汞取喻地底雷因識靜中動內視
只一念外閉畢九孔網紀踵息間萬象忽頽洞
鉏麀不違君亦不賊民主於是兩得之慷慨觸庭樹磊
落忠信士一死以自取趙孟滅智伯餘燼悉臣虜豫讓
必報之在已實何補功名等芻狗富貴若冀土殺身乃
細事義重心獨苦中士竊緒餘藉以立門戶釣譽而徇
欲曾不異質豎始知金張革碌碌不足數
悠悠天地間誰是中庸者每見富後貧歷聞暴寡物
各有定分慎獨無苟且元景渴賣菜仲尼正假馬侈不
得僭上儉不可逼下

雲霧漸充塞能蔽日月明雞豚競謹噉能奪鐘鼓聲小
人事諂佞能亂君子情我欲訴真宰激濁而揚清掉舌
不敢下舉趾仍却行黃鳥有好音非春曷能鳴桃李有
美色非春曷能榮干時懼招禍晦迹斯利貞陋室可容
膝杜門罷將迎讀書困竒字著述慚大成好此遂為癖
而復勞我形暮吹青藜火想見太乙精

后羿逐帝相寒泥遂弑之少康方在妊長仕虞君思辛
苦三十年亡匿遭艱危區區一庖正於悒將何為布德
以兆謀恢復自有時一成撫其衆一旅興王師劬力在
獲物賢哉故臣靡如何康王構畏懦不自持甲士
下府庫亦足支切齒君父讐隱忍若罔知苟且襲尊號
苟促東南隅猶豫委奸佞忠良獲誅夷卒以滅社稷雪
耻終無期賢愚既已異興亡竟如斯

身世莊周蝶得失塞翁馬柘棘無鸞鳳部婁茂松檟博
物張茂先委棄若土苴宜哉謝靈運見絕遠公社知難
而不退未有獲免者前事之不忘後事之師也
銖寸十年學所志一何陋風雲失攀附德業慚領袖蚩
蚩路旁子與爾微大繆方之治農者孰薄而孰厚苟秀
而不實何似苗不秀直不百步耳無以異於走
結交在同調所遇有通塞伍負申包胥意氣固相得一

旦生別離禍始費無極覆楚雪父讎復楚臣子職負也
憑闔閭操縱寫胷臆三戰而入郢報復意已亟平王用
讒佞幾致傾社稷包胥乞秦師果決情愴惻晝夜倚牆
哭七日不飲食為之賦無衣卒以返其國忠能不愛死
孝亦竭其力忠孝有如此使我三歎息

褒神化為龍茫昧不可解夏后三卜之請禱乃吉卦更
歷暨三代歲月已云邁厲乃啟其端幽則任其敗何物
彼妖子媒孽肆狡獪讒佞既得志綱紀必大壞開卷寃
始末周折越詭怪雖曰子不語紀以昭鑑戒

非子善養馬建國為附庸斯人抑何功遂爾裂土封濫
賞乃如此天災兆其凶致使竊棄地駸駸大而宗王室
亦見夷吞并散合從毀聖壞王制覆載所不容徃復理
之常假手於祖龍

漢王入彭城高會以自賀無乃得之易將卒遂驕惰項
籍還救之乘銳竟襲破於是失太公楚寶獲奇貨局促
越草莽恐懼歷遭播業已遭困辱計不免凍餓造次廣
武間一語劇摧挫舜竊負而逃豈曰懼賊刺已而踐尊
位誇已明父過輕父而重利所見一何左蓋由詐力輩
而以為輔佐戡亂之功小不孝之罪大

吾生昧攸暨世道如亂麻勿以瓊樹枝見嫉桃李花勿

以鸞雀質紛紜混虫沙處厚不處薄居實不居華一卧
幾易歲頑然若匏瓜

鳳鳥非山雞那肯嬰束縛美玉下燕石工巧與礱錯既
已薄其厚豈不厚其薄是以靈瑞物委棄如振落孔子
大聖人用舍無適莫兩觀少正誅一語萊夷却畏匡既
不免足迹亦見削奔走半天下老去何所托西狩而獲
麟春秋以之作值此叔季世惟以道自樂誰乎識之者
亦有仲孫獲首代沽緒餘布路為木鐸

多財易生怨高位勢必危水則能載舟而亦能覆之俱
選逸秦鍼五刑加李斯吾生有真境曷事富貴為

越勝理針砭賴維持鼓腹飽饘粥吹噓愛貧窶白日明
戶牖青天覆茆茨百家為我朋六經為我師放筆書不
惡得韻句亦竒吐納坐來久春暖睡起遲得意有如此
智者不足知

聖代昭至治謀猷盡夔龍赤子抱春陽黎民變時雍尊
賢以高位下士食上農海外畢重譯殊方皆附庸樂道
山水間高尚忻我容

事有幽隱者上智不得擬豈以淺近故將無偶然耳靈
均楚之良卒以忠見毀放逐不自顧沉淪汨羅水田和
相齊國得地二千里篡逆僭王號傳世十餘紀季氏逼

其君富有乃如此范滂不為惡而以禁錮死既已是其非乃更非其是吾因而惑之于以知所止高蹈白雲鄉言從赤松子

下德不失德上德為無為文字代結繩淳風遂乖離吾道載墳典竊以文其私孔子必觀行衆人溺浮辭天地固元默萬出而萬中四序潛運移品物自變動以身教者從以言教者訟

少小慕仙術沉潛窈玄樞嗜欲滅志慮神魂出泥途而域產精金南溟足流珠靈劍有會合陰氛疾驅除失之若天懸得之在須臾取坎以填離自有而入無窮

知化擬議凌太虛勿以貧賤故蔑視一鄙夫丹法七十二小子其庶乎

己巳元日

誰能為解紛元日病方殷咫尺衡門下令人望白雲

正月十三月下

又是元宵候空庭片月新何時蘓病骨一振綵衣塵

三月三日病甚抵暮少蘓誦示措兒

一日不知人淹然與鬼隣天乎或不起須爾事吾親
寂莫

肯以寂莫為嫌今以寂莫為樂寂莫焉能樂余樂自生

盛明百家詩 李生集

嘗閱計有功唐詩紀事載唐人能詩者千一百五十家而未卷有僕二人一爲咸陽郭氏捧劍之僮一爲池陽刺史戟門門子朱元夫以唐代三百年餘詩人千百家餘而所得僕人止二子蓋亦難矣隆慶庚午酷暑中姚山人寄予李生詩一卷乃江都司訓歐崙山大任家丁素善騰寫者也爲之驚喜刻入後編泰岳山人邵正魁嘗叙生詩云李生者李英也故以青衣給事南海歐先生又能宗先生爲詩於是與歐先生遊者識李生又稱李生詩自是李生有聲藝林予

亦從歐先生遊識李生愛其詩叙而傳之李生字少
芝亦南海人又天目山人讀李生詩作詩勗之有云
朱家何處得青衣廣柳車中似爾稀縱是備書稱下
走終當斷席化雄飛能詩况在方回上戀主寧言穎
士非萬里遠遊名姓變蒼梧千騎自東歸由是觀之
生豈在唐人下耶生詩具載集中閱者當自得之是
歲六月二十二是堂野史俞憲汝茂父識
初去故園留別諸友

風烟一以別把酒戀同遊人去江樓晚帆飛海國秋青
山馳遠夢黃菊動離愁管是滄洲不能無念白鷗

晚發五羊驛

舟發五羊城西風無限情海雲開曙色江鴈渡潮聲目
極秦山遠天低楚樹平柁樓回首處萬里是王程

臨江越陸過瑞州馬上晴望

舍舟蕭水驛程催遙望西筠霽色開一片鄉心幾行淚
楚天無數鴈飛來

過廬山宿東林寺

投策前朝寺空門積雪多猿聲千澗落鴈字五峰過白
社惟同醉青山只自歌遠師能愛客禪講夜如何

登汝南城樓

漢江東去渺烟波鵝鴨城邊思若何
萬里崧高不堪望西來山色白雲多

初至燕京宿報國寺英上人禪房

驅馳萬里至燕關下馬投居野寺閒
上界清都連北闕中天禪院近西山
下聽齋磬逢僧話暗數郵程損客顏
此夜思鄉人更遠天涯何處問刀環

登樓懷友

故人何事各西東萬里登高恨不同
絕嶂浮雲連碣石諸天佳氣滿華嵩
長城驛路遙看處故國音書悵望中
獨有歸心南海去不堪斜日送征鴻

十月京師紀事

蕭關風急馬頻嘶四塞河山動鼓鼙
獨立高臺望烽火胡笳多在薊門西

送鄉友南還

故人天上別相送出雲間海樹藏官舍
江帆過楚山遠程隨鴈去生計伴鷗閒
若到家庭日封書願早還
寒夜懷羅政

客舍清寒處悠悠動所思故人經歲別
尺牘隔年期杯酒誰同醉梅花獨賦詩
寥天鴻鴈盡霜月夜眠遲
夜過張氏諸子館

天涯同作客良晤每難期
星象遠今夕風流自一時
禁烟籠樹密海月到窓遲
對酒吟芳草遠憐碧柳絲

席上賦得明月

光分驄馬色彩散侍臣衣
飛蓋還高會西園客未歸

長安早秋

清宵玉露下金溝
草色萋萋倦倚樓
鳩鵲雲中雙闕曉
芙蓉天外萬山秋
文園獨抱經年病
杜曲誰憐遠客愁
此際不堪勞極目
大江南北路悠悠

都下逢王仔三黃廷翰

憶昔盱江話別時
天涯此會更何期
夢歸滄海青萍在

書寄關河白鴈遲
萬里浮雲聊獨望
三秋明月正相思
燕歌喜得懽今夕
操筆還堪一賦詩

王黃二子將有行期過訪客舍

風塵倦客不勝悲
把袂三秋問去期
枕上不堪千里夢
尊前又賦四愁詩
西風鴈過華陽館
北極霜飄太液池
金谷黃花還共賞
天涯寧許便分離

中秋周氏園同沈氏諸子登臺玩月因話西湖風景
有作

清光搖動暮雲收
竹下幽期此復留
濁酒共看燕市月
新詩曾寄洞庭秋
江鄉只有餐霞興
世路空慚把劍遊

回首錢塘心獨遠却令飛夢到滄洲

歲暮旅懷

天涯留滯歲將除短髮蕭條嘆客居楓葉共飛遊子夢
梅花不見故人書雲浮關樹千山盡夕照江烽萬里餘
回首旗亭心更遠每看征馬一踟躇

雪後過訪林氏諸子因留飲

歲晏憐羈旅尋君過竹林梅花殘雪夜杯酒故人心鴉
暝迷宮樹雲愁斷塞砧相看能一醉誰復問黃金

乙丑元日 闕門瞻望

宮殿雪初消祥光滿 聖朝千官鴛鷺集百樂鳳凰調

曉鵲棲珠樹冰花散玉橋中天回首處 御輦駕雲霄

送鄉友南還二首

翩翩旌旆去如飛獨立河梁對落暉皂帽不堪爲客父
青門頻送故人歸看雲經歲鄉書絕臨水傷春樂事稀
燕粵迢迢萬餘里塞鴻聽盡思依依

楊柳霏霏鎖綠陰薊門春盡落花深琴尊羨爾能雲臥
書劍憐予尚陸沉萬里河山遊子夢中原涕淚故人心
別來握手知應早預想秋期在竹林

答黃悅可見寄

故人久別益淒其誰遣瑤華慰所思丹鳳城頭不堪望

五陵春草深歸期

夏日集鄉友館

消渴憐羈旅相逢意若何
交情惟筆札歸計在烟波
桂玉慚書劍衣裳憶芰荷
非才猶自媿難報郢人歌

送鄉友南還

一片鄉心對落暉
風塵去住兩相違
自憐燕市長爲客
又向河梁送客歸

贈管生

天涯誰骨肉歲月爾相親
執手仍談藝交情不厭貧
倦遊三輔日長醉五陵春
莫擬滄洲隱持竿共釣鱗

送畢國美之吉州

章江秋色早君去意如何
二水青螺出千山紫氣多
登樓窺竹月把酒聽漁歌
遠客題書尺還能念薜蘿

秋夜同葉文君步月過劉汝賢高齋因望西山作

秋風吹白露寒色滿皇都
海樹浮雲盡江天明月孤
踈北塞羣鴈過西湖
愛此瀟涼夜黃金一醉無

中秋夜同陳張二子集蒙子館中玩月

西山落葉滿長安
把袂蕭條一倚闌
霄漢月明雙闕迴
胡天風急九關寒
望中邊塞烟塵淨
笛裏梅花道路難
七夕尊前君且醉
明年秋色共誰看

方遊大慧寺

其出郭不辭勞野寺雲邊共爾曹白日西飛秦樹杳
秋南望楚天高書逢故國愁烽火客久中原有佩刀
一郢心且沉醉風流誰道五陵豪

秋
風

秋風一夜渡江干月滿西樓十二闌金馬門前霜氣早
白狼城北角聲殘蓴鱸偏引江鄉夢裘帽翻憐客舍寒
萬里家山雲樹裏鴻書誰復念長安



國家圖書館, NATIONAL CENTRAL LIBRARY, TAIWAN, ROC